





# مَعْنِيَا سَدَا

## اثر خاتمه احمد جودت

ایک بابت  
ترجمہ  
کتاب

مقدمہ مکاتب ابتدائیدہ تدریس اوستق اوزرہ تألیف اولئش  
رر بالہدر فقط قالین حروف ابجد طبع اولئان محالری متن  
مقامندہ اولہرق مکاتب رشیدیہ درج اولئو تدریبلہ بیلور

طابع وصاحبری! قرہت و قصبار

MILLI EĞİTİM  
RAGİP P. S.  
MÜDÜRÜĞÜ

ارف نظارت جالیہ سنک فی ۱۷ ذی القعدہ سنہ ۱۳۰۲  
و ۵۳۰ نومرولی رخصتنامہ سنک

2364

ایکینجی دفعہ اولہرق طبع اولئشدر

اسم کتابی

تشخص ایتیمو (طبعہ سی - باب عالی جادہ سندہ نومرولی ۱۳۰۳)  
کلی دینلور  
کیم علملر



جلدہ دخی

وبعضی  
عقبیسنک

هر برینہ

ود اولان  
ہیدی  
سکرہدن  
صوردر  
سنک

تکرندن  
تابت

مور  
فردی

افراد  
سنک

یکرہ

طابق

برسنہ



بسم الله الرحمن الرحيم

## مقدمه

معنايه موضوع اولان لفظك دلالتی اوج درلو  
 اولور که مطابقت . تضمن . التزام در  
 چونکه لفظك موضوع لهی اولان معناك تمامنه دلالتی  
 مطابقت و جزئیه دلالتی تضمن در  
 مثلا ارطه لفظك درت دیوار ایله طوائك مجموعه  
 دلالتی مطابقت و بونلردن یالکز برینه دلالتی تضمن در  
 كذلك انسان لفظی حیوان ناطق یعنی ذی روح و صاحب  
 نطق معناسته موضوع اولدیغندن حیوان ایله ناطقك  
 مجموعه دلالتی مطابقت و ایکیسندن بریسته  
 دلالتی تضمن در

لفظك معناسته ذهنده لازم کلان خارج بر شئیته دلالتی  
 التزام در . نه کم ضرب لفظی التزاما ضارب و مضروب  
 ت ایلر زیرا ضرب بر آدمك دیکرینی اورمسی دیمك  
 اولدیغندن ضربك معناستی تصور اولندقدنه بهمه حال  
 ضارب و مضروب دخی خاطره کلور

بر لفظك جزئیله معنای مطابقتك جزئیه دلالت قصد  
 اولتماز ایسه مفرد دینلور و قصد اولنور سه مرکب دینلور  
 مثلا انسان مفرد در زیرا بو لفظك مجموعی بالمطابقه  
 حیوان ناطقه دلالت ایدر یوخسه مثلا الفیله حیوانه  
 و دیگر بر حرفیله ناطقه دلالت ایتمز

وقاطع الشجر مرکبدر که اغاج کسن دیمك اولوب  
 حالبو که قاطع کسن و شجر اغاج معناسته دلالت ایلر  
 و عبد الرحمن بر شخصه علم اولدیغی صورته مجموعنك  
 انجق اول شخصه دلالتی مراد اولمغله مفرد در اما  
 رحانك قوی معنای مراد اولور سه اول حالده مرکب اولور.  
 مفردك معنای تشخص ایدر سه جزئی دینلور و اکر  
 تشخص ایتمیوبده افراد کثیره یه صادق و شامل اولور سه  
 کلی دینلور

ه کیم علملر یعنی زید و عرو و موسی و بکر و استانبول

جده دخی

و بعضی

بعضیسنك

هر برینه

ود اولان

ه یدی به

سکره دن

صور در

ه سنك

تلرندن

ه ثابت

مور

فردی

افراد

سنك

بکره



واذر نه کبی بر شخصک یاخود بر شهرک نامی اولان اسملر  
هپ جزئیدر

اسم اشارت لر دخی بوقیبلدندر نه کیم شوآدمه باق بو کتابی  
کتور دینلده شوو بوافظری کبی  
اما انسان کلیدر زیرا ذی روح وناطق اولان هر فرد  
انسان اطلاق اولنور و انسان مفهومی اول فردلر بیننده  
مشرک اولور

کذلک شهر افضی دخی کلیدر که استانبول واذر نه و مصر  
کبی بیوک بلدهلر هپ شهر دینلور

بوراسنی بر مرتبه ده اوضاح ایدهم شویله که سن بر شیئی بیلدیگک  
وقت ذهنکده اول شیئک صورتی حاصل اولور ایسته اول صورت  
سنک ذهنکده بولندیغی جهته علمدر و بوجهتدن قطع نظرله معلوم  
ومفهومدر ومفهومک مجرد ذاته نظر ایله یعنی خارجدن بتون  
بتون قطع نظر ایله عقل آنک خارجده افراد کثیره به صدق وشمولنی  
یعنی افراد کثیره نك آندء اشتراکنی تجویز ایلر ایسه جزئیدر  
وتجویز ایدر ایسه کلیدر

مثلا زید جزئی و انسان کلیدر زیرا زید نامنده کوروب بیلدیگم  
بر شخصک ذهنمده حاصل اولان صورتی خارجده انجق اول شخصه  
منطبق اولوب ذهنم اول صورتده دیگر اشخاصک اشتراکنی تجویز  
ایلر اما انسان مفهومی تصور ایتدیگمده ذهنم خارجده افراد  
کثیره نك اول مفهومده اشتراکنی تجویز ایلر  
بالاده مذکور اولان ایضاحاتدن اکلاشدیغی اوزره هر مفهوم

کلینک افراد ذهنیه سی غیر معدود و غیر محصور اولوب خارجده دخی  
افراد غیر معدوده سی بولنور  
اما بعضی سنک خارجده افرادی معدود و محصور اولور و بعضی سی  
بر فرده منحصر اولوب بشقه افرادی بولنماز یاخود بوانه ماز و بعضی سنک  
خارجده هیچ بر فردی بولنماز و یاخود بولنه ماز  
مثلا انسانک خارجده افرادی غیر معدود و غیر محصور اولوب هر برینه  
انسان دینلور

سیاره ایسه انسان کبی کلی اولندیغی حائده موجود اولان  
افراد سی معدود و محصوردر شویله که فلاسفء متقدمینه کوره یدی به  
منحصر اولوب سبعه سیاره دینلور و فلاسفء متأخرین صکره دن  
دها زیاده سیاره لر کشف ایتدیلر ایسه ده یته جله سی معدود و محصوردر  
شمس دخی کوکب منی دیو تصور اولنوب افراد کثیره سنک  
وجودی ممکن ایکن خارجده بالکنز بر فردی بولنور  
واجب الوجود مفهومی دخی کلی ایسه ده الله تعالی حضرتلرندن  
بشقه بر فردینک وجودی ممکن اولندیغی برهان توحید ایله ثابت  
اولور

وعتایی یوزی انسان یوزینه بکرر بر بیوک قوش دیو تصور  
ایتدیگمده افراد کثیره سنک وجودی ممکن ایکن خارجده بر فردی  
بولنماز

وشریک الباری مفهومی تصور ایدرکن بونک ایچون ذهنده افراد  
کثیره فرض اولنوب حاله که بوا افراد فرضیه دن هیچ برینک  
خارجده وجودی ممکن دکدر

مفهوم کلی افراندده متفاوت اولور ایسه کلی مشکک دینلور .  
قرمزی کبی که افرادینک بعضی سی چوق قرمزی اولوب یکدیگره  
تسایله قیرمز یلقده سیان اولملر



واگر مفهوم کلی افرادند متفاوت اولان ایسه کلی مؤاطی دیناور .  
انسان کی که افرانینک کافیه حیوان ناطق مفهومیست سیاندرلر .  
جزئی بعضاً اخص معتلسنده قوللانیاور که اعمک تحتفده مندرج  
دیمک اولور و بوکا جزئی اضافی دیناور

نته کیم انسان مفهومی جزئی حقیقی اولان فردلرینه نسبتله کلی  
اولدینی حانده حیوانه نسبتله جزئی اولور حیوان دخی ذاتا کلی  
اولدینی حانده جسم نامی به نسبتله جزئی اولور

هر لفظده ایکی احتمال وارد بری لفظی مراد اولمدر نته کیم کلدی  
فعل مانیدر دیدیکم زده مراد انجی کلدی لفظیدر .

دیگری لفظک معناسی مراد اولمدر و جزئی ایسه معناسی مدلولی  
اولان شخصدن عبارتدر

اما کلی ایسه آنده ایکی احتمال واردر . شویله که یا مفهومی مراد  
اولور نته کیم انسان کاید دیدیکم زده مراد انجی حیوان ناطق مفهومیست .  
ویا خود مفهومیست ماصدق علیهی اولان افرانی مراد اولور . نته کیم  
انسان یراچر دیدیکم زده انسانک افراد خارجیست مراد اولور .

لفظلرک معنای یبندده نسب اربعه یعنی مساوات . مبیانت . عموم  
و خصوص مطلق . عموم و خصوص من وجه ازانور

و هر ایکی مفهوم کلی یبندده بحسب الصدیق والجل یعنی مفوملرک  
ماصدق علیهملری اعتباریه بونسب اربعه دن بری بولنور .

شویله که ایکی کلینک هر بری دیگرک جمیع افرادینه صادق وشامل  
اولورسه یکدیگره مساوی اولورلر .

ناطق ایله ضاحک کی که ایکسی دخی انسانک اوصاف مخصوصه سندن  
اولوب هر ناطق ضامکدر و هر ضاحک ناطقدر دیناور .

واگر ایکی کلینک هیچ بری دیگرک هیچ بر فردینه صادق وشامل  
اولان ایسه یکدیگره مابین اولورلر .

انسان ایله آت کی که هیچ بر انسان ات دکلدر و هیچ برات انسان  
دکلدر

واگر ایکی کلینک بالکن بری دیگرک جمیع افرادینه صادق وشامل  
اولورسه یبندده عموم و خصوص مطلق بولنور . یعنی بری مطلقاً  
اعم و دیگری مطلقاً اخص اولور .

مثلاً حیوان یعنی ذی روح مفهومی انسانه نسبتله مطلقاً اعم و انسان  
اکا نسبتله مطلقاً اخصدر زیرا هر انسان حیواندر . اما هر حیوان  
انسان اولیوب بلکه بعضیسی انسان و بعضیسی آت و اینک وقوش  
کی انسانک غیری اولان حیوانلردر .

واگر ایکی کلیدن هر بری دیگرک بالکن بعضی افرادینه صادق وشامل  
اولورسه هر بری دیگرینه نسبتله من وجه اعم و من وجه اخص  
اولور و شویله کوره بر ماده ده متصادق و ایکی ماده ده متفارق اولملری  
لازم کلور .

انسان ایله بیاض کی که انسانلرک بعضیسی بیاضدر و بیاضلرک بعضیسی  
انساندر و بیاض انسانده ایکسی دخی متصادق اولورلر و زنجی  
ایله لکلکده متفارق اولورلر که زنجی انساندر لکن بیاض دکلدر  
ولکلک بیاضدر لکن انسان دکلدر

جزئی ایله اکا شامل اولان کلی یبندده عموم و خصوص مطلق بولنور  
و هر جزئی کندویه شامل اولیان کلی به مابین اولور

و جزئیلر دائماً بر برینه مابیندر زیرا هیچ بری کندیدن بشقه بری  
اوله ماز

و بعضاً مفهوملر یبندده بونسب اربعه ماصدق علیه اعتباریه اولیوب  
انجی بحسب التحقیق یعنی ازمان و احواله کوره تحققلری اعتباریه ازانور .

شویله که ایکی مفهوم هر وقت و حانده بر برندن اولمالر ایسه یکدیگره  
مساوی اولور



طلوع شمس ایله وجود نهار کی که هر نه وقت کونش طوغارسه  
کوندوز اولور وهر نه وقت کوندوز اولورسه کونش طوغش  
بولنور. واکر ایکی مفهوم هیچ بروقت وحانده برابر بولماز لر  
ایسه یکدیگره مبین اولور لر

طلوع شمس ایله وجود لیل کی که هر نه وقت کونش طوغارسه کیجه  
بولنه ماز وهر نه وقت کیجه اولورسه میمانده کونش بولماز  
واکر ایکی مفهومیدن یالکز بری هر وقت وحانده دیگرندن آریلیوب  
اما او بری اندن بعض اوقات واحوالده آریلور ایسه بیلرنده عموم  
وخصوص مطابق بولنور

خانه نیت آیدنلغی ایله طار ع شمس کی که کونش طوغدغه خانه دخی  
آیدنلق اولور اما هر نه وقت خانه آیدنلق اولسه کونش طوغش  
اولق لازم کلز زیرا کیجه قنبدیل ایله دخی خانه ده آیدنلق اوله بیلور  
واکر ایکی مفهومیدن هر قنبدی بولندیغی حانده دیگر کی بعضاً  
بولنور وبعضاً بولماز اولور ایسه بیلرنده عموم وخصوص من وجه  
بولنور.

کونشک طوغشی ایله روزگارک اسمی کی که بعضاً کونش طوغارکن  
روزگار دخی اسر وبعضاً کونش طوغار ایکن روزگار اسمز وبعضاً  
کیجه لین روزگار اسر.

مفهوم کلی افراد ذهنیه سنه نسبتله ماهیت تسمیه اولنور وافراده  
خارجیه سنک ضمنده بولندیغی جهته حقیقت تسمیه قلنور و ماهیت  
هر مفهومه شامل اولور کرک خارجده افرادی بولنسون وکرک  
بولنسون اما حقیقت انجق خارجده افرادی بولنسان مفهوملمره  
مخصوص اولور و حقیقت انسان دینلیدی کی ماهیت انسان دخی  
دینلور اما ماهیت عنقا دینلیدی کی حقیقت عنقا دینلور

بناء علی ذلک ماهیت ایله حقیقت بیننده عموم وخصوص مطابق بولنور.

بالاده مبسوط اولان مقدماندن اکلاشدی که هر حقیقت کندی  
افراد خارجیه سی ضمنده بولنوب هر برینه محمول اولور  
مثلاً حقیقت انسان خارجده موجود اولان افراد انسانیه ضمنده  
بولنوب بولرک هر بری انساندر انجق تشخیصیه یعنی اوزونلق  
قیصه لقی بیاضلق قاره لقی اسمرک کی عوارض مشخصه ایله یکدیگرندن  
مخیر اولور لر

ایشته بوکا یعنی مع الشخص حقیقته هویت دینلور  
ابحاث سابقه مفردلره دائر اولوب شمدی مرکب لک احوال مخصوصه  
صه سنه کله لم

مرکب بعضاً نسبت ناقصه افاده ایدر شویله که انک اوزرینه  
متکلمک سکوتی صحیح اولمیوب مخاطب بشقه سوزه  
منتظر اولور

نته کیم مهارتلی کاتب وکاتبک مهارتی دینلده سوز تمام  
اولمیوب مخاطب الت طرفنده نه دینله جک دیو منتظر اولور.  
وبعضاً نسبت تامه افاده ایدرک بر کلام اولوب متکلمک  
سکوتی صحیح اولور انجق بودخی ایکی قسمدر

قسم اول کلام انشائیدر که نفس الامر تطبیق ایله  
طوغریدر یاخود یلاندر دیکه محل اولماز

فلان ایشی بویله یاپ دیو بر کسنه یه امر یاخود فلان  
شی بویله میدر دیو استفسار ویاخود کاشکی بویله اولیدی  
دیو تمی الملك کی



قسم ثانی کلام اخباری در که نسبت تامه خبریه بی مفید  
اولان کلام در نه کیم فلان شی بویه در یا خود بویه دکادر  
دیند یکی کبی

مفردک معناسنی بیلک تصور دن عبارت اولدیغی کبی  
نسبت ناقصه بی و نسبت تامه انشائییه بی بیلک دخی تصور  
قبیلندندر اما نسبت تامه خبریه بی علی وجه الازعان  
بیلک مثلاً عالم حادثدر و عالم قدیم دکادر دیو حکم ایتمک  
تصدیقدر

الحاصل علم یا تصور و یا خود تصدیقدر و هر بری یا بدیهی و یا خود  
نظریدر . بدیهی نظر یعنی فکر ایله اکتسابه موقوف اولمیان علمدر  
صیغاتی و صوغوغاتی تصور و کون ایله کجه برلشن دیو تصدیق  
کبی . نظری نظر و فکر ایله اکتسابه موقوف اولان علمدر . —  
روح و ملک و جنی تصور و عالم حادثدر دیو تصدیق کبی  
فکر مجهوله توصل ایچون امور معلومه بی ترتیب ایتمکدر

فکر ایله انسان معلومات تصورییه دن مجهولات تصورییه بی و معلومات  
تصدیقیه دن مجهولات تصدیقییه بی کسب ایدر فقط بو خصوصیه  
بعضاً خطا ایلر

ایشته ذهنی بویه افکارده خطادن حفظ ایدن علم منطقدر که معلو-  
مات تصورییه و تصدیقییه دن بحث ایدر.

هر علم برچوق مسائلی مشتملدر و بویه برچوق مسائلک سائر علوم  
و فنوندن آریا ویده بر علم مستقل اخذ اولغمی جهت وحدتلمی  
اعتباریله در

جهت وحدت ایکیدر بری جهت وحدت ذاتیه و دیگرى جهت  
وحدت عرضیه در

جهت وحدت ذاتیه علمک موضوعی و جهت وحدت عرضیه علمک  
غایتی در

بر علمک موضوعی اول علمده احوال ذاتیه سندن بحث اولنان شیدر  
وغایتی فائدۀ مترتبه سیدر

مثلاً علم حسابک موضوعی عدددر و غایتی معلومات مخصوصه دن  
مجهولات عدیه بی استخراج ایتمکدر

و علم منطقک موضوعی معلوماتدر غایتی دخی فکرک صحیح و فاسدین  
تمیز ایتمکدر

هر علم ایکی وجهه یعنی یا موضوعی و یا خود غایتی اعتباریله تعریف اولنور  
علم منطقی دخی موضوعی اعتباریله تعریف ایده جک اولدیغمرده  
معلوماتدن مجهولاته موصل اولدیغی جهتمله بحث ایدر بر علمدر دیرز  
وغایتی اعتباریله تعریف ایده جک اولدیغمرده بر علمدر که آنکله فکرک  
صحیح و فاسدی بیلنور دیرز

علم منطقک موضوعی معلومات تصورییه و معلومات تصدیقییه منقسم  
اولدیغندن علم منطق دخی ایکی قسمه تقسیم اولنور قسم اول تصورات  
و قسم ثانی تصدیقاتدر

بناء علی ذلک بر دخی بورساله بی ایکی مقاله اوزرینه ترتیب ایلدک  
مقاله اولی تصورات حقنده و مقاله ثانیه تصدیقات حقنده در



## مَقَالَةُ اُولَى

(تصورات بیانده اولوب ایکی بابی مشتملدر)

### باب اول

ایساغوجی یعنی تصوراتک مبادیسی اولان کلیات  
خمس مباحثی اولوب اوچ فصلی حاویدر

### فصل اول

کلیتک تقسیمی واقسامک تعریفی حقنددر  
کلی بشدرکه نوع جنس فصل خاصه عرض عام در  
زیرا ماهیتلر ایکیشر جزدن ترکب ایدر و بر ماهیتک ایکی  
جزئندن بری اول ماهیتدن اعم یعنی آنکله دیگر ماهیتلر  
بیننده مشترک اولور و دیگرکی اول ماهیته مساوی اوله رق  
آنی سائرلرندن تمیز ایلر یعنی آنی سائر ماهیتلرندن آبیروب  
بر مستقل ماهیت قیلار.

ایشته اول ماهیته نوع و جزء اعمه جنس و جزء  
مساویسنه فصل دینلور و فصل جنسی مقسم و نوعی مقوم  
اولور.

مثلا انسان ماهیتی حیوان ایله ناطقدن مرکبدر و حیوان  
جزء اعم اولوب انسانلره و سائر حیوانلره شامل اولور  
ناطق ایسه انسانه مساوی اولوب آنی سائر حیوانلردن  
تمیز و حیوانی تقسیم ایلر و آنکله انسان ماهیتی مقوم  
اولور یعنی آت و قوش کی سائر حیوان ماهیتلرینه مبین  
و مستقل بر ماهیت اولور شو حاله کوره انسان بر نوع  
اولوب حیوان دخی آنک جنسی و ناطق فصلیدر.

کذلک مثلث قائم الزاویه ماهیتی مثلثک برنوعی اعتبار اولنغله مثلث  
آنک جنسی و قائم الزاویه فصلی اولور.

الحاصل جنس و فصلک بر لشمسیله بر ماهیت تحصیل  
ایدرکه نوعدر ایشته اکا بر طاقم صفتلر عارض اولور  
و بو صفتلر اکر بر نوعه مخصوص اولورسه خاصه  
دینلور و اکر بر نوعه مخصوص اولیوبده دیگر نوعلرده  
دخی بولنورسه عرض عام دینلور.

ته کیم ضاحک انسانک خاصه سی و متعسف عرض  
عامیدر زیرا ضاحک نوع انسانه مخصوصدر سائر انواع  
حیوانانده ضحک طبیعی بولنماز متعسف ایسه انسانه  
مخصوص اولیوب حیوانتک دیگر نوعلرینه دخی عام و شمل  
اولور.

کذلک زاویه قائمه بی موتر اولان ضلک مربعی اول زاویه بی محیط



اولان ایکی ضلعک مربعلری مجموعنه مساوی اولمق کیفیتیک شکل مثاندن قائم الزاویه نوعنک خاصه سیدر زیرا مثلثک دیگر نوعلرنده بولنماز اما مثلثک اوج زاویه سی ایکی قائمه به مساوی اولمق کیفیتیک مثلث قائم الزاویه نوعنه کوره عرض عامدر زیرا بو کیفیت قائم الزاویه مخصوص اولمیوب مثلثک دیگر نوعلرنده دخی بولنور

ایشته علم منطقده مذکور و مشهور اولان کلیات خمس بونلر اولوب اوج اولکیسی یعنی نوع و جنس و فصل کلی ذاتی و خاصه ایله عرض عام کلی عرضیدر

زیرا کلی اول امرده ایکی قسمه تقسیم اولنور ثوبله که برکلی دیگر برشی اوزرینه محمول اولدقده اول شی کرش جزئی اولسون و کرش کلی اولسون محمول اولان کلی اگر اول شیئک ذاتندن و حقیقتندن خارج دکل ایسه ذاتی و خارج ایسه عرضی دینور و ذاتی یا اول شیئک حقیقتنک عینی یا خود جزئی اعمی و یا خود جزئی مساویسی اولور

عرضی دخی یا بر حقیقته مخصوص و یا خود حقایق مختلفه به عام و شامل اولور

مثلا زید نام شخص انساندر دیدیمکرده انسان اول شخصک ذاتندن خارج اولمیوب بلکه حقیقتنک عینیدر زیرا هر شخصک حقیقتی نوعنک عینی اولوب یکدیگرندن انجق عوارض مشخصه ایله متمیز اولورلر بناء علی ذلک انسان ماصدق علیهی اولان فردلرینک ذاتیسیدر نه کیم انسان حیوان ناطقدر دیدیمکرده حیوان ناطق مفهومی انسانک حقیقتندن خارج اولمیوب بلکه آنک عینی اولمغله اودخی کلی ذاتیسیدر

کذلک انسان حیوان ناطقدر دیدیمکرده حیوان و ناطق انسانک

حقیقتندن خارج اولمیوب بلکه حیوان آنک جزئی اعمی و ناطق جزئی مساویسی اولمغله ایکسی دخی ذاتیدر

اما ضاحک انسانه مخصوص و متفلس اندن اعم اولمق انسانک حقیقتندن خارج اولمغله ایکسی دخی عرضیدرلر و کذلک بر مثلث قائم الزاویه نک حقیقتی قائم الزاویه نوعنک عینیدر و جنسی اولان مثلث آنک جزئی اعمی و فصلی اولان قائم الزاویه جزئی مساویسیدر بناء علی ذلک اوجی دخی اول حقیقتندن خارج اولمدقنری جهته ذاتیدرلر

اما وتر قائمه نک مربعی دیگر ایکی ضلعک مربعلری مجموعنه مساوی اولمق کیفیتیک که خاصه در و اوج زاویه سنک مجموعی ایکی قائمه به مساوی اولمق کیفیتیک که عرض عامدر مثلث قائم الزاویه نک حقیقتندن خارج اولمغله ایکسیسیده عرضیدرلر

شمعی تحقیقات سابقه به کوره کلیات خمس بشقه بشقه تعریف و تحدید ایدلم

نوع	بر حقیقتک عینی اولان کلی ذاتیدر
جنس	حقایق مختلفه نک ذاتیسی اولان کلیدر
فصل	یا لکز بر حقیقتک ذاتیسی اولان کلیدر
خاصه	بر حقیقته مخصوص اولان عرضیدر
عرض عام	حقایق مختلفه به شامل اولان عرضیدر

ایشته شو تفصیلاتدن کاینیغی اکلاشدی که نوع و جنس و فصل ذاتی و خاصه ایله عرض عام عرضیدر و نوعلر جنسک جزئیاتی اولوب نوعک جزئیاتی ایسه حقیقتلری بر و انجق عوارض مشخصه ایله متغایر اولان شخصلردر و خاصه بر حقیقته مخصوصدر عرض عام ایسه بر حقیقته مخصوص اولمیوب حقایق مختلفه به شامل اولور



بناء على ذلك نوع هم بحسب الشرکه و همده بحسب الخصوصيه ندر  
ديو واقع اولان سؤاله جواب اولور

مثلا عمر عثمان على نام کيسه لر ندر ديو سؤال اولندقدہ انساندر  
ديو جواب ويرلديکي کي يالکز برندن سؤال اولنوب مثلا عمر نام  
کيسه ندر دینسه کذلک انساندر ديو جواب ويريلور زیرا بالاده  
بيان اولنديغي اوزره هيسنک تمام حقيقتي انساندر

جنس ايسه انجق بحسب الشرکه ندر ديو اولنان سؤاله جواب اولور  
مثلا انسان آت وقوش ندر ديو سؤال اولندقدہ حيواندر ديو  
جواب ويريلور اما انسان ندر ديو سؤال اولنسه حيواندر ديو  
جواب ويريله من زیرا سائک مرادی انسانک تمام حقيقتي اولنوب  
حيوان ايسه انک بر جزئيدر.

اما بر حقيقتدن ياخود بر هویتدن ذاتنده قنغي شيدر ديو سؤال  
اولندقدہ ذاتیسی حسیله قنغي شيدر يعنی جنسک قنغي قسم  
ذاتیسيدر ديمک اولسيلاه سائک مطاوي ميم ذاتی اولديغندن بو  
سؤاله جوابا اول حقيقتک فصلي سويلنور.

مثلا انسان ياخود بکر نام شخص ذاتنده قنغي شيدر دینلکده ناطقدر  
ديو جواب ويريلور

واکر بحسب العرض قنغي شيدر دینلورسه مطلوب انجق ميم عرضی  
اولديغندن اکا جواب اوله رق خاصه سويلنور.

مثلا انسان بحسب العرض قنغي شيدر دینلکده ضاحکدر ديو جواب ويريلور  
اما عرض عام ذاتی اولنديغي جهته ندر سؤالنه جواب اوله مديغي کي  
بر حقيقتي ديکر حقيقتلردن تمير اولديکي جهته قنغي شيدر  
سؤالنه دخي جواب اولماز.

شمعی شو ايضاحاته کوره دخي کلیات خسی تعريف ايله بر مرتبه ده  
ايضاح ايده لم

نوع بر کلیدر که حقیقتلری بر وانجق عوارض مشخصه  
ایله متغیر اولان جزئیات کثیره دن یاخود بو جزئیاتک  
يالکز برندن انلر ندر یاخود او ندر ديو سؤال اولندقدہ  
سويلنور.

جنس بر کلیدر که حقیقتلری مختلف اولان جزئیلردن  
انلر ندر ديو سؤال اولندقدہ سويلنور اما بو جزئیلرک  
يالکز برندن او ندر ديو سؤال اولندقدہ جواب اوله رق  
سويلنور.

فصل بر کلیدر که بر شیدن ذاتنده قنغي شيدر ديو سؤال  
اولندقدہ سويلنور.

خاصه بر کلیدر که بر شیدن بحسب العرض قنغي شيدر ديو  
سؤال اولندقدہ سويلنور.

عرض عام بر کلیدر که حقایق مختلفه ناک ماصدق علمی  
اولان افرادینه وصف عرضی اوله رق صادق وشامل  
اولور.

ایشته بو وجهله کلیات جنس کما یانغی معلوم و بر برندن تمیر  
اولور فقط بعضا اعتبارات مختلفه ايله برشیده متصادق اولورلر  
مثلا ماشی یعنی یوروپچی مفهومنده خاصه ايله عرض عام متصادق  
اولور زیرا ماشی حیوانه نسبتله خاصه و انسانه نسبتله عرض عامدر  
و بر شی هم نوع و هم جنس و هم فصل و هم خاصه و هم عرض  
عام اوله یلور.



نه کیم ملون یعنی رنگلی مکیفک نوعی ویشیملک جنسی وکشیفک  
فصلی و جسمک خاصه سی و حیوانک عرض عامیدر

زیرا مکیف بر کیفیت ایله متصف دیمک اوله رق رنگلی و آجی  
وطاتی کی نیجه مفهومیله شامل اولدیغندن ملون انک بر نوعیدر  
ویشیل وقاره و قیرمزی کی رنگلی شیلره هپ ملون دینلدیگندن  
ملون بونلرک جنسیدر وکشیف مفهومی جسم ملون دیو تعریف  
اولتوب جسم لطیفدن انجی رنگ ایله تمیز اولدیغنه مبنی اکا  
نسبتله فصلدر و جسم اولیان شیلرده رنگ اوله مدیغنه نظرا جسمه  
نسبتله دخی ملون خاصه اولور

ورنگ کرک ذی روح اولان وکرک ذی روح اولیان جسملرده  
بولندیغندن حیوانه نسبتله دخی ملون مفهومی عرض عام اولور  
والحاصل کلی بر جنس اولوب نوع و جنس و فصل و خاصه و عرض  
عام انک انواعیدر.

فقا بونلر ماهیات اعتباریه اولوب معتبرک اعتباریه یکدیگرددن  
تمیز اولورلر و بر وجه بالا اعتبارات مختلفه ایله بر ماده ده مجتمع اوله  
یلورلر بوراسنی بر مرتبه ده ابضاح ایچون ماهیت حقیقیه ایله  
ماهیت اعتباریه یی بر وجهاتی بیان ایدلم

ماهیت حقیقیه انسان و آت کی خارجه موجود اولان ماهیتدر که  
بزم اعتباریمزک مدخل اولقسنزین نفس الامرده کندیوسندن خارج  
اولیان شی انک ذاتیسی و خارج اولان عرضیسی در

ماهیت حقیقیه انک ذاتیات و عرضیاتی تمیز و تعیین ایسه اشیانک کنه  
و حقیقته واقف اولقه موقوفدر بناء علی ذلک ماهیات حقیقیه انک  
ذاتیات و عرضیاتی تمیز ایلک بعض حکما عندنده متعسرو بعضیلری  
عندنده متعزدر

اما ماهیات اعتباریه بزم اعتباریمزله ذهنده موجود و متمیز  
اولدیغندن ذاتیسی عرضیوسندن تمیز ایلک امرسهلدر

مثلا علم صرف و محدود بر شخصه پاخود دیگر بر شیئه دلالت ایدن  
کلمه اسم دینلرک اسم بر نوع اعتبار اولنش اولمسیمله کلمه انک  
جنسی و اول وجهله دلالتی انک فصلی دیمک اولدیغندن آخری ساکن  
یا متحرک اولمق و دیگر کلمه یه مضاف اولوب اولماق کینیتلری اسمک  
عرضیاتندن اولور

کذلک علم هندسه ده اوج ضلع ایله محاط اولان شکله مثلث دینلرک  
مثلث بر ماهیت اعتباریه اولوب شکل انک جنسی و اوج ضلع ایله  
محاط اولمق فصلی اعتبار اولنش اولمسیمله بونلرک خارجه ده اوله رق  
مثلثه عارض اولان حالر هپ عرضی اولور

ایشته کلیات خمس دخی اولوجهله برر ماهیت اعتباریه اولوب  
ذاتیات و عرضیاتی اهل منطق اعتباریه کوره بالسهموله تمیز اولنور  
مثلا جنس بر وجه بالا حقایق مختلفه انک ذاتیسی اولان کلیدن عبارت  
اولمسیمله کلی انک جنسی و حقایق مختلفه انک ذاتیسی اولق فصلی  
اعتبار اولنش اولدیغنه مبنی حقایق مختلفه دن ندر دیو اولنان  
سؤاله جواب اولمق کینیتی انک خاصه سی و علی الاطلاق سؤاله  
جواب اولمق انک عرض عامی اولور

تکمله

سؤال

یوقارویه ناطق انسانه مسـاویدر دینلدی حالبوکه طوطی دینلان  
قوش دخی نطق ایدر بناء علیه ناطق انساندن اعم اولمق لازمکلور

جواب

نطق ایکی معنای واردر بری سوبلمک و دیگری کلیاتی ادراک ایلکدر  
واولکیسی نطق ظاهری وایکجیسی نطق باطنیدر و نطق ظاهری



اگرچه طوطیده دخی بولنور ایسه ده انک نطق طبیعی اولمیبوب  
انجق تعلیم ایله در انسان ایسه بالطبع ناطقدرد اما نطق باطنی انسانه  
مخصوص بر کیفیتدر زیرا انسان کی سائر حیوانلردخی جزئیاتی  
مدرک ایسه لرده کلیاتی انجق انسان ادراک ایدر وبالطبع ناطق اولمسنک  
منشائی دخی بودر

شویله که انسان علم صرف ونحوه بیان اولنان قواعد کلیه اوزرینه  
بر طاقم موادی تصریف وکله لری یکدیگریله ترکیب ایدرک  
ما فی الضمیرینی افاده ایده جک عبارتله ترتیب ایلر طوطی ایسه  
کندوسنه نه درلو سوزلر تعلیم اولنور ایسه انجق انلری سوزلر  
وکلیاتی مدرک اولدیغندن اول سوزلره قیاسا بشقه عبارتله ترتیب ایده من  
بناء علی ذلک ناطق اگر انجق معنایه جل اولنور ایسه سؤال  
وارد اولماز واکر اولکی معنایه جل اولنور ایسه مراد من نطق  
طبیعیدر دیو جواب ویریز

### سؤال

کرک نطق ظاهری وکرک نطق باطنی ضحک کی انسانه انجق  
وجودندن صکره لاحق اولان وصفلردر بناء علی ذلک ناطق ایله  
ضاحک انسانه نسبتی بردر شو حاله کوره ناطق فصل وضاحکی  
خاصه عد ایملک ترجیح بلامرجحدرد

### جواب

ناطق و متعجب وضاحک هب انسانه مساوی وصفلردر فقط ضحک  
منشائی تعجب اولوب تعجب دخی امور غریبه بی ادراک دیمک  
اولدیغندن کلیاتی ادراک معناسنه اولان نطق باطنی انلردن اقدام  
اولور بو بابده قاعده ایسه بر نوعه مخصوص اولان اوصاف  
مرتبه نك اقدامی ذاتی و دیگرلری عرضی عد اولمقدرد

### سؤال

بو جواب اگر ماهیات حقیقیه نك ذاتیات ویا عرضیاتی تمیز ایملک  
متعزدر دینلره کوره تسلیم اولنسه دخی متعزدر دینلره کوره  
مسلم اوله ماز

### جواب

فی الواقع ماهیات حقیقیه نك ذاتیات و عرضیاتی تمیز ایملک متعزدر  
دینلره کوره ناطق فصل وضاحک خاصه در دیو حکم اولنه ماز  
فقط علوم مدونده قواعد کلیه نك تشمینی متعلم مبتدیلره تسهیل  
ایچون جزئیات ایله تمثیل اولنه کلدیکندن اهل منطق دخی بر طاقم  
امثله مرتبه وضعنه محتاج اولملریله جوهر و جسم نامی و حیوانی  
هب ذاتیاته مثال اوله رق وضع ایتدکلی صروده ناطق دخی بروجه  
بالا انسانه مخصوص اولان اوصاف اقدامی اولدیغنی جهتله فصل اعتبار  
وانسانی حیوان ناطق دیو تعریف ایلدیلر بوندن غرض انجق  
تمثیلدر تمثیل ایچون دخی اهل فنک وضع و اعتباری کانیدر اما  
بولنرک نفس الامرده ذاتی اولدقربی اثبات ایملک صددمزک خار جنده در

### لاحقه

ماهیت	یا جوهر و یا خود عرض اولور
جوهر	ذاتیله قائم اولان شیدر
عرض	غیریه قائم اولان شیدر

مثلا طاش جوهر وانک رنکی وقتیلغی عرضدر زیرا طاش کندو  
کندویه قائم اولور رنک وقتیلغی ایسه کندو کندویه قائم اولمیبوب  
بهر حال بر جسم ایله قائم اولور



كذلك نفس ناطقة انسانيه جوهر وانك ادراكی عرضدر زیرا  
نفس ناطقه ذاتيله قائم اولوب ادراك ايسه انكله قائم اولور  
جوهر یا مادی ویاخود مجرد اولور  
جوهر مادی جسمدر که ابعاد ثلثیه یعنی طول وعرض وعمق قابل  
اولان جوهردر

جوهر مجرد ايسه ابعاد ثلثیه قابل اولماز نفس ناطقه انسانيه کبی  
جسم یا نشو و نمو ايله حصوله کلوب جسم نامی تسمیه اولنور  
ویاخود طاش کبی جامد اولور  
جسم نامی دخی یا حیوان اولور ویاخود اغاج و اوت کبی حیواندن  
بشقه ذی نمو اولان جسملر اولور

حیوانی بونلردن تمیز ایدن حس ايله حرکت اراده اولدیغندن  
جسم نامی حیوان ماهیتک جنسی وحس ايله حرکت ارادهدن  
بری انك نصلي اوق لازمکاور حالبوکه ایکسیده حیوانه مساوی  
اولوب قنغیسی فصل اولدیغنده تردد اولنمغه حیوانک تعریفنده  
ایکسی دخی برابر انور و حیوان (حساس متحرک بالاراده اولان  
جسم نامیدر) دیو تعریف اولنور

## فصل ثانی

(ذاتیاتک اقسامی بیاندهدر)

نوع ایکی قسمدر قسم اول نوع حقیقی و قسم ثانی نوع  
اضافیدر .

نوع حقیقی بالاده بیان اولنان نوعدر که جزئیاتی هوینلر یعنی

نوع ايله عوارض مشخصه دن مرکب اولان شخصلردر .  
بوکا نوع حقیقی و نوع الانواع دینلور و تحتنده بولنان کاییه  
صنف تسمیه قلنور .

شوبله که نوع حقیقی عوارض کلیه ايله مقید اوله رق صنفلره منقسم  
اولور .

صنف ايسه نوع ايله عوارض کلیه دن مرکب اولدیغنه مبنی ساسیه  
ذاتیاتدن خارج قانور و نوعک خاصه سی قبیلندن اولور .  
الحاصل نوع حقیقیکن تحتنده بشقه نوع بولنماز .

نوع اضافی بر ماهیتدر که انكله دیگر بر ماهیتدن انلر ندر  
دیو سؤال اولندقدده بر جنس اکا جواب اولور یعنی بر  
کلی ذاتیدر که فوقنده بر جنس بولنور

مثلا جوهره نسبتله جسم و جسمه نسبتله جسم نامی و جسم  
نامی به نسبتله حیوان و حیوانه نسبتله انسان نوع اضافیدر  
زیرا جسم ايله نفس ناطقه دن انلر نه در دیو سؤال اولندقدده  
جوهردر دیو جواب ویریلور و جسم نامی ايله طاش ندر  
دینلدکده جسمدر دیو جواب ویریلور و حیوان ايله اغاج  
ندر دینلدکده جسم نامیدر دینلور و انسان ايله آت ندر  
دینلدکده حیواندر دینلور .

ایشته بو درت مرتبه نوعلر هپ نوع اضافیدر اما نوع  
حقیقی بونلرک انجق دردنچیسنه اطلاق اولنور بوجهته  
نوع اضافی نوع حقیقیدن اعم اولور .



و جنس دخی قریب و بعید دیو ایکی قسمه منقسم اولور .  
 شویله که فصل اولده بیان ایدیکمز وجهله جنس بر ماهیتک جزء  
 اعمیدر یعنی اول ماهیت ایله دیگر ماهیت بیننده مشترک بر جزء در اعم  
 ایسه اخصده مندرج اوله رق اعمک جزئی اخصک دخی جزئی اولور  
 بو جهته بر ماهیتده متعدد جزلر بولنه یلور و جزء اخس دیگر لرینی  
 جامع اوله رق اول ماهیتک تمام جزء مشترکی اولور ایسته اکا جنس  
 قریب و انک جزئی اولان دیگر جزء مشترکله جنس بعید دینلور .  
 مثلا حیوان انسان ماهیتک جزء مشترکی اولدیغی کبی حیوانک جزء  
 مشترکی اولان جسم نامی و انک جزء مشترکی اولان جسم و انک جزء  
 مشترکی اولان جوهر دخی بالواسطه انسانک جزء مشترکی اولور .  
 فقط اوچی دخی حیوانده مندرج اولغله حیوان انسانک تمام جزء  
 مشترکیدر بناء علی ذلک انسانه نسبتله حیوان جنس قریب و جسم  
 نامی و جسم و جوهر جنس بعیدر و حیوانه نسبتله جسم نامی جنس  
 قریب و جسم ایله جوهر جنس بعید و جسم نامی به نسبتله جسم جنس  
 قریب و جوهر جنس بعیددر .

و ایکی مختلف حقیقتدن انلر ندر دیو سؤال اولندقدن سائلک مطلوبی  
 انلرک بیننده کی تمام جزء مشترک اولدیغندن جنس تریک تحتنده مندرج  
 بر ماهیت ایله دیگر مشارک لرینک هر قنغی برندن بو ایکی شی ندر دیو  
 سؤال اولندقدن جواباً هپ اول جنس سویلنور .

اما جنس بعیدک مندر جاننده جواب هپ بویله بر اولیوب دکی شور  
 مثلا انسان ایله آت ندر دینلدکده حیواندر دیو جواب ویرلدیکی  
 کبی قیون و اینک و قوش و سائر انواع حیوانانندن هر قنغی بریسی  
 انسان ایله برابر انوبده بو ایکسی ندر دینلدکده هپ حیواندر  
 دیو جواب ویریلور زیرا جله سنک بیننده تمام جزء مشترک  
 حیواندر اما انسان ایله اغاج ندر دینلدکده جسم نامیدر دیو جواب

ویریلور و انسان ایله طاش ندر دینلدکده جسمدر دینلور ایکن  
 انسان ایله آت ندر دینلدکده جسمدر یا خود جسم نامیدر دیو  
 جواب ویریله من زیرا هیچ بریسی انسان ایله آت بیننده تمام جزء  
 مشترک اولیوب بلکه تمام جزء مشترک حیواندر که جسم نامی  
 بالذات و جسم بالواسطه انک جزلریدر

الحاصل بر ماهیت ایله جنسده مشارک لرینک هر قنغی برندن بو ایکی  
 شی ندر دیو سؤال اولندقدن جواباً هپ اول جنس سویلنور ایسه  
 جنس قریبدر و اگر بعضیلرنده اول جنس سویلنوبده دیگر بعضیلرنده  
 جواب بشقه اولور سه جنس بعیددر .

بر وجه بالا نوعک درت مرتبه سی اولدیغی کبی جنسک  
 دخی درت مرتبه سی اولوب انجق نوعک مراتبی یوقارودن  
 اشاغی اعتبار اولنه رق نوع سافله نوع الانواع و نوع  
 حقیقی دینلور جنسک درجاتی ایسه اشاغیدن یوقارو  
 اعتبار اولنه رق ال یوقاروده بولنان جنسه جنس الاجناس  
 و جنس عالی دینلور و جنس عالی ایله جنس سافل اره سنده کی  
 جنس بعیدله جنس متوسط دینلور

مثلا انسانه نسبتله حیوان جنس سافل و جسم نامی ایله  
 جسم جنس متوسط و جوهر جنس عالیدر

و نوع حقیقی به جنس دینله مدیکی کبی جنس عالی به دخی نوع دینله من  
 بناء علیه جنس ایله نوع اصنافی بیننده عموم و خصوص من وجه  
 بولنور

فصل دخی یا فصل قریب یا خود فصل بعید اولور



شویله که اگر ماهیتی جنس قربنده کی مشارکارینک جمله -  
سندن تمیز ایدرسه فصل قریبدر واکر یالکز جنس  
بمیدده کی مشارکارندن تمیز ایلرسه فصل بعیددر  
نته کیم ناطق انسانک فصل قریبدر زیرا انی سائر حیواندن  
تمیز ایلر

اما حساس یاخود متحرک بالاراده حیوانک فصل قریبی  
وانسانک فصل بعیددر زیرا حیوانی جسم نامیده کی  
مشارکارینک جمله سندن تمیز ایلر وانسانی انجق جسم  
نامیده مشارکی اولان نباتاتدن تمیز ایدوب آت و سائر  
انواع حیواناتدن تمیز ایلر

کذلک قابل ابعاد ثلثه جسمک فصل قریبی وانسان و حیوان و جسم  
نامینک فصل بعیددر زیرا جسمی جوهرده مشارکی اولان جمیع  
مجرداتدن تمیز ایدر اما سائرلرینی جمیع مشارکاتدن تمیز ایلر  
انجق بعض مشارکاتدن تمیز ایلر

### استطراذ

بالاده ایراد اولنان امثله هپ جسم و جوهر سلسله سندن اولان کلیاتک  
مثالدر  
حاجوکه جوهره مقابل اولان عرضک تحتند دخی اجناس و انواع  
مرتبه واردر  
مثلا بباضاق و غیر مزبلق برر ماهیت حقیقه اولوب بوتلرک فوقنده  
رنک وانک فوقنده کیف واردر

بناء علی ذلک بو مقامده عرضک انسانی بیان اولنق مناسب کورلمشدر  
عرض طغوز قسمدرکه . کم . کیف . این . منی . وضع . ملک .  
اعتناغت . فعل . انفعال . در  
بونلره مقولات تسعه دینلور و جوهرله برابر اون اولوب جمله سنه  
مقولات عشره دینلور

ایشته بونلر اجناس عالیله اولوب اجسامک کافه سی جوهره منتهی  
اولندیغی کی عرضلر دخی باقی مقولات تسعه دن برینه منتهی اولور  
و کم ایله کیف عرض غیر نسبی اولوب باقی یدیی اعراض نسبیه در  
کم ذاتا انسانی قابل اولان عرضدر وایکی قسمه منقسمدر قسم اول  
کم منفصل و قسم ثانی کم متصلدر  
کم منفصل عدددر که تقسیم اولندیغی تقدیرده ایکی قسمک اره سنده  
بر حد مشترک بولنماز مثلا اون عددی تنصیف اولندقدده بش برنجی  
قسمده والی ایکنجی قسمده قالبوب بو ایکی قسمک اره سنده بر حد  
مشترک بولنماز

کم متصل ایکی قسمدر قسم اول قارالذات و قسم ثانی غیر قارالذات در  
قارالذات اجزاسی مجتمع دیمکدر بو دخی مقیداردن عبارتدر که  
خط . سطح . جسم تعلیمدر

خط یالکز طول و سطح هم طول و هم عرضا قابل انقسامدر و جسم  
تعلیم که جسم طبیعیک طول و عرض و عمق دیمکدر هم طول و هم  
عرضا و همده عمتا انسانی قابلدر

و بونلر تقسیم اولندقلری تقدیرده قسملر بیننده متلاق اولدقلری بر  
حد مشترک بولنور

مثلا بر خط تنصیف اولندقدده ایکی قسمک متلاق اولدقلری نقطه  
ایکیسی بیننده مشترک اولوب یالکز برینه مختص دکلدر



کم متصل غیر قارائذات زماندر و حال تسمیه اولنان آن زمان ماضی  
ایله زمان مستقل ارسنده حد مشترکدر  
بناء علی ذلک زمان کم متصلدر فقط غیر قارائذاتدر زیرا اجزائی  
مستقر و مجتمع دکلدر بلکه صو کی اقوب کیدر بر عرض سیالدر  
شوبله که اجزائی اولان انلردن بری پکر و دیگر کی کلوب او دخی  
کیدر هیچ بری استقرار بومانز و دیگر یله مجتمع اولماز  
کم منفصل علم آرتما یقائنک و مقداردن عبارت اولان کم متصل قارائذات  
علم هندسه ناک موضوعیدر

و مقدارک بر رسمی اولان خط مستقیم و غیر مستقیم و خطوط متوازیه  
و غیر متوازیه کی قسملره منقسم اولور و خط مستقیم بر ماهیت  
اولوب خط انک جنسی و مستقیم فصلی در و بونک جنس عالیسی  
مقوله کدر سائر لری دخی بوکا قیاس اولنه  
نقطه و وحدت اصلا قابل انقسام اولدقلری جهته مقوله کیفده  
داخل اولور

کیف بر عرضدر که ذاتا یعنی ماهیتی حسبیه نه کم کی انقسامی  
قبول ایدر و نه ده اعراض نسبتیه کی نسبتی اقتضا ایلر  
سیاهلق و بیاضلق و اجیلق و طائللق کی که بونلر ذاتا قابل انقسام  
دکلدر در فقط معروضلرینک انقسامیه تبعاً انلر دخی منقسم اولور لر  
مثلاً بیاض کاغذ ایکیه تقسیم اولندقدده بیاضلق دخی بو ایکی پارچه یه  
تبعیه منقسم اولور

وجهلر عرضلر غیر یله قائم اولدقلری جهته نسبتی اقتضا ایدرسده  
زیرده بیان اولنه جغی وجهله اعراض نسبتیه ناک ماهیتلرنده نسبت  
واردر کم ایله کیف ایسه من حیث الماهیه نسبتی اقتضا ایتمزلر  
اشبو مقوله کیف درت قسمه تقسیم اولور قسم اول رنگلر  
و اجیلق و طائللق کی حیاس خمس ظاهره ایله حس اولنان کیفیتلردر  
قسم ثانی کم متصل و منفصله عارض اولان کیفیتلردر استقامت و استداره کی

قسم ثالث کیفیات استعدادیه در قاتیلق و عو شافلق کی  
قسم رابع کیفیات نفسانیه در بودخی اکر محالده راسخ و مستحکم  
اولور سه مکه والا حال تسمیه اولور  
نته کیم کتابت ابتدای امرده حال قیاندندر لکن کثرت ممارسه  
و تکرر عملیات ایله راسخ و مستحکم اولیجق اهلنه ملکه اولور  
و بر علمی او کرونوبده اول علمک اهل و اربابی اولمق اول علمده کسب  
ملکه ایتک دیمکدر مثلاً فلان اغندی علم هندسه بیلور دید بکمرده  
انک هندسه ده ملکه سی واردر دیمک اولور یو خسه اشکال هندسه یی  
بر کره کوزدن پکچور مکه علم هندسه اربابندن اولمق لازم گلر کله لم  
اعراض نسبتیه

این بر شیئه بر مکانده بولنسیه عارض اولان حالتدر بر کیسه ناک  
اوطه ده یاخورد عربده و یاخورد قایقده بولنسی کی  
متی بر شیئه بر زمانده بولنسیه عارض اولان حالتدر فلان کون  
کونش طو تملق کی

وضع بر شیئه بعض اجزاسنک دیگر بعض اجزاسنه و کندوسندن  
خارج شیلره نسبتی ایله عارض اولان هیئتدر ایاتده طور مق و صندالیه  
اوزرنده اوطور مق و مندر اوزرنده باصلانق و یا صدیغه طیانق  
و بر اوزرنده اوتوروب دیزچو کلک و یاخورد مربع نشین اولمق کی  
ملک بر شیئه کاملاً کندوسنی یاخورد بعض اجزاسنی محیط و انک  
انتقالیه منتقل اولان شیلر سببیه عارض اولان هیئتدر جبه یا  
ستری کیمک و صارق صارنق و یوزن طانق کی

اضافت بر حالت نسبتیه متکرره در یعنی بر نسبتیه قیاس ایله بر  
شیئه عارض اولان دیگر نسبتدر اوغوللق بابالق کی که اوغله نسبتیه  
بابایه بابالق عارض اولدینی کی بابایه نسبتیه دخی اوغلنه اوغوللق  
عارض اولور



فعل بر مؤثره دیگر شیءه تأثیر ایدیشیدر نته کیم بر کیمسه یه قلمی  
کسر و شیشیهی قیوار ایکن عارض اولان حالت کبی  
انفعال بر شیدک دیگر شیدن متأثر اولشیدر نته کیم قلمه کسیلورکن  
و شیشیه قیویلورکن عارض اولان حالت کبی

## فصل ثالث

(عرضیاتک اقسامی بیانده در)

خاصه یا ماهیتک جمیع افرادینه شامل یعنی اکا مساوی  
اولور

مرکز دائره دن محیطه چیتان خطوط مستقیمه نک تساویسی  
کبی که بو تساوی کیفیتی اول خطلرک کافه سینه شامل  
اولور

ویا خود ماهیتک جمیع افرادینه شامل اولیوب اندن اخص  
اولور

انسانه نسبتله طبیب و مهندس کبی که هر طبیب و مهندس  
انساندر لکن هر انسان طبیب و مهندس دکلدر

وضاحتکدن بالقوه ضاحت معنایی مراد اولور ایسه  
انسانک هر فردینه شامل اولمغله قسم اولدن اولور

واکر بالفعل ضاحت مراد اولور ایسه انسانک هر  
فردینه شامل اولدیغنه مبنی قسم نایدن اولور

و خاصه یا نوعک خاصه سیدر بالاده ذکر اولنان مثالدر کبی  
ویا خود جنسک خاصه سیدر حیوانه نسبتله متنفس و جسمه  
نسبتله متحیر کبی

برجنسک خاصه سی تحتده کی نوعک عرض عامی اولور  
انسانه نسبتله متنفس و متحیر کبی  
کرک خاصه و کرک عرض عام یا عرض مفارق و یا خود  
عرض لازم اولور .

عرض مفارق ماهیتدن انفکاکی ممکن اولان عرضدر .  
کرک بالفعل و سرعت و یا خود بطائت ایله مفارقت ایلسون و کرک اصلا  
مفارقت ایلسون .

ننه کیم وجه انسانک اوتامغله قیوارمسی و قورقغله صارارمسی بالفعل  
و جابوق مفارقت ایلر عرضلردر و کججک بالفعل و فقت بطائت ایله  
انساندن مفارقت ایدن عرضدر و بالفعل زنکین اولمسی ممکن اولان کسنه به  
عارض اولافقر دائم هر نقدر اندن بالفعل مفارقت ایتمسه دخی انفکاک  
ممکن اولمغله ینه عرض مفارق قییلندندر .

عرض لازم ماهیتدن انفکاکی متمنع اولان عرضدر بو دخی اوج قسمدر .  
شویله که اکر یالکز وجود خارجیده لازم اولور ایسه لازم وجود  
خارجی دینلور حرارتک آتسه لزومی کبی  
واکر یالکز وجود ذهنیده لازم اولور ایسه لازم وجود ذهنی دینلور  
کلینک عنقابه لزومی کبی

واکر هم وجود خارجیده و همده وجود ذهنیده لازم اولور ایسه لازم  
الماهیه دینلور زوجیتک درده لزومی کبی .  
وبو لزومی ذهنک جزم ایتمسی اکر دلیمه محتاج ایسه لزوم غیر بین



دینلور اوج زاویه سی ایکی قائمه به مساوی اولمق کیفیتک منلنه لزومی  
کبی که بر قضیه نظریه اوله رق برهان هندسی ایله اثباته محتاج اولور .  
و ذهن اگر لازم و ملزومی تصور ایتکله یئلرنده کی لزومی جزم  
ایدیورسه لزوم بین دینلور .

ایکی قسم متساوی به منقسم اولمق کیفیتک درده لزومی کبی که ذهن  
بو انقسام ایله دردی تصور ایتدکده بر دلیله محتاج اولمق سزین اولوجهله  
انقسامک درده لزومی یعنی در دک قسمین متساویینه انقسامنی جزم ایلر .  
بوکا لزوم بین بالمعنی الاعم دینلور برده لزوم بین بالمعنی الاخص واردر  
که ملزومک تصویری لازمک تصویرنی موجب اولمق دیمکدر نه کیم  
جهلک تصویری عملک تصویرنی موجب اولور ایشته علوم عقلیه  
احجابیه کوره دلالت انترامیهده معتبر اولان لزوم اشیی لزوم بین  
بالمعنی الاخصدر .

اما علوم عربیه احجابیه عندنده معتبر اولان لزوم فی الجمله لزوم ذهنیدر  
ولو که اعاده قرآن ایله اولسون بناء علیه جمیع معانی مجازییه مدلولات  
انترامیه به درج و ادخال ایلدیلر .

## باب ثانی

(قول شارح یعنی تعریف بیاننده در)

تعریف یا حد یا خود رسم اولور و بونلرک هربری یا تام  
و یا خود ناقص اولور .

حد تام بر شیئک جنس قریبی ایله فصل قریبندن ترکیب  
ایدر انسانی حیوان ناطق ایله تعریف کبی .

حد ناقص بر شیئک جنس بعیدی ایله فصل قریبندن ترکیب  
ایدر انسانی جسم ناطق ایله تعریف کبی .

یا لکز فصل قریب ایله تعریف دخی حد ناقص قبیلندندر  
انسانی ناطق ایله تعریف کبی .

رسم تام بر شیئک جنس قریبی ایله خاصه سندن ترکیب ایدر  
انسانی حیوان ضاحک ایله تعریف کبی .

واکر بر شیئک جنس قریبی و فصل قریبی ایله خاصه سی دخی بر لکده  
ایراد اولنور ایسه بودخی رسم تامدر فقط بوکا حد نامدن اکل رسم  
تام دینلور انسانی حیوان ناطق ضاحک ایله تعریف کبی .

الحاصل تعریف اگر یا لکز ذاتیاتدن ترکیب ایدر سه حد اولور فقط  
ذاتیاتک کافه سی حاوی اولور سه حد تام دینلور بودخی جنس قریب  
ایله فصل قریبندن ترکیب ایتکده توقف ایدر اما جنس قریبک یرینه  
جنس بعید قونلقدده یا خود یا لکز فصل قریب ایله تعریف اولندقدده  
ذاتیاتک بعضیسی ناقص اولور .

مثلا حیوان یرینه جسم دینلدکده نامی و حساس انسانک ذاتیاتندن اولد-  
قلری حائده تعریف انلری حاوی اولماز کذلک یا لکز ناطق ایله  
تعریف اولندقدده تمام جزء مشترک اولان حیوان خارج قالور بناء علی  
ذلک بونلره حد ناقص دینلور .

و تعریف یا لکز ذاتیات ایله اولمیوبده ذاتی و عرضیلردن مرکب یا خود  
یا لکز عرضیلردن عبارت اولور ایسه رسم ناقص دینلور مثلا انسانی  
جسم ضاحک یا خود ناطق ضاحک و یا خود متنفس ضاحک دیو تعریف  
ایلسک رسم ناقص اولور .

کذلک یا لکز خاصه ایله تعریف دخی رسم ناقص قبیلندندر انسانی  
ضاحک ایله تعریف کبی



و كذلك انسانك تعریفنده ایکی آیفقری اوزره یورر طرناققری کنش  
دریسی تویسر مستقیم القامه ضاحك بالطبع دینلسه رسم ناقص  
اولور برشیئی تقسیم و تمثیل ایله ایضاح دخی رسم ناقص قیلندندر  
نته کیم مقداری تعریف و ایضاح مقامنده مقدار یاخط یاخود سطح  
ویاخود جسم تعلیمدر دیو تقسیم اولنور و جنس حیوان کی نوع انسان  
کی دیو تمثیل ایله تفهیم و ایضاح قیلنور و مطلقا تعریف یا حقیقی و یاخود  
اسمی اولور تعریف حقیقی خارجه و وجودی معلوم اولان بر ماهیتی تعریفدر  
بر وجه بالا انسانی حد تام و یا ناقص و یاخود رسم تام و یا ناقص ایله  
تعریف کی

تعریف اسمی بر اسمدن فهم اولنان معنایی وجود خارچیسندن قطع  
نظر ایله کشف و ایضاح ایتکدر عنقا مفهومی تعریف کی  
علوم مدونده موضوع اولان اصطلاحاتک تعریفاتی دخی بوقیلندندر  
بالاده بیان اولندیغی اوزره صنفلر عوارض مخصوصه کلیه ایله مقید  
نوعلر دیمک اولوب ابروجه برر حقیقت دکلردر بناء علی ذلک  
بونلر دخی ماهیات اعتباریه قیلندندر اولدققری جهته بونلرک تعریفی  
دخی تعریف اسمی قیلندندر اولور و نوع حقیقی انلرک تعریفلرنده  
جنس اعتباری اوله رق بونلور نته کیم رومی انسان ایین وزنجی  
انسان اسود دیو تعریف اولنور

تعریفلرده اطراد و انعکاس شرطدر

اطراد تعریفک اغیارینی مانع اولمسی یعنی معرفک افرادندن اولمیان  
برشیئک تعریفده داخل اولمسی دیمکدر

انعکاس تعریفک افرادینی جامع اولمسی یعنی افراد معرفدن اولان بر  
شیئک تعریفدن خارج قالماسی دیمکدر

فقط بعضیلر حد ناقصده اعم ایله و رسم ناقصده هم اعم و همده اخص ایله  
تعریفی تجویز ایتلردر

وهر حالده تعریف معرفدن دهها واضح و جلی کرکدر  
بناء علیه برشیئی کندوسندن دهها خفی اولان لفظ ایله تعریف ایتلک  
صحیح دکلدر

نته کیم آنشی لطافتده روحه بکزر برشیدر دیو تعریف کی  
کذلک برشیئی وضوح و خفاده کندوسنه مساوی اولان لفظ ایله  
تعریف دخی صحیح اولماز

نته کیم روحی موجب حس و حرکت اولان شیدر دیو تعریف کی  
برشیئی بیلنسی بالذات یاخود بالواسطه کندوسنه موقوف اولان  
شیله تعریفدن دخی احتراز اولنمیدر

نته کیم کیفیتی مدار مشابته اولان شیدر دیو تعریف ایتدکنصکره  
مشابهتی دخی کیفیتده اتفاقدن دیو تعریف کی که کیفیتی بیلک  
مشابهتی بیلکه و مشابهتی بیلک کیفیتی بیلکه توقف ایدیوربو ایسه  
دور باطلدر و نته کیم ایکی برنجی چقدر دیو تعریف اولندقدنصکره  
چغت دخی قسمین متساوینه منقسم اولان شیدر دیو تعریف اولنوب  
بعده اول متساویلر شول ایکی شیدر که یکدیگردن فضله سی اولماز دیو  
تعریف اولندقدنصکره اول ایکی شی ایکیدر دینلسه ایکی بی بیلک  
چفتی بیلکه و آتی بیلک متساوینی بیلکه وانلری بیلک یکدیگردن  
فضله سی اولمیان ایکی شیئی بیلکه وانلری بیلک ایکی بی بیلکه  
والحاصل دونوب طوله شه رق ایکی بی بیلک ایکی بی بیلکه توقف ایدر  
بودخی دور باطلدر

وبرده تعریفلرده الفاظ غریبه و معناسی قولایاقله اکلاشایسه حق  
تعبیرات مبهمه استعمالی جائز دکلدر

تفصیلات سابقه دن اکلاشایدکه تعریفدن غرض بر علم جدید حاصل  
ایتکدر اودخی معرفتی حدلرده اولدیغی اوزره کنه حقیقتیه و رسملرده  
اولدیغی اوزره سائرندن متمیز اوله حق وجهله موضح اوله رق  
تصوردن عبارتدر



فقط بعضاً تعریفدن اوله بر تصور جدید حاصل ائیلک مراد اولوب  
بلکه مخاطبک خزائن ذهنده مخزون و محفوظ اولان صورتی جا-  
طریقه کتورمک مقصود اولور ایشته بوکا تعریف تنبیهی دنیلور تعریف  
لفظی دخی بوقبیلدندر

تعریف لفظی بر لفظ مبهمی دلالتده اندن دهها واضح اولان بر لفظ  
ایله تفسیر ائیلکدر خیمه بی جادر واستری قاطرا یله تفسیر ائیلک کی

### تذنیب

حدلر بعضاً اجزاء خارجیه دن ترکیب ایدر  
نتیه کیم اوطه بی درت دیوار ایله بر سققدن عبارتندر دیو تعریف  
ایتدیکم زده حد تام اولور  
فقط اهل منطق نظر کیلیاته منحصر اولدیغنه مبنی انلرک بحثلری  
اجزاء ذهنیه دن مرکب اولان تعریفلره منحصر در



### مقاله ثانیه

(تصدیقات بیانده اولوب درت بابی مشتملدر)

### باب اول

(قضایای مطلقه بیانده اولوب درت فصلی مشتملدر)

### فصل اول

قضیه نك تعریف و تقسیمی بیانده در

مقدمه نك آخرنده بیان اولندیغی اوزره نسبت تامه خبریه بی  
مفید اولان کلامه کلام اخباری دنیلور که واقعدن یعنی  
نفس الامر دن حاکی اولان جمله خبریه در . و بو نسبت  
خبریه بی علی وجه الاذعان بیلک تصدیق دیمک اولمسیله  
کلام اخباری تصدیق متضمن اولور .

ایشته علم منطقده بو کلام اخباری به قضیه دنیلور  
و قضیه (برسوزدر که آنی سویلینه بوسوزنده صادقدر  
یا خود کاذبدر یعنی بوسوزی واقعده مطابقدر یا خود  
دکادر دینلک صحیح اولور) دیو تعریف اولنور  
بو تعریفده (سوز) جنس و (دینلک صحیح اولور) جمله سی  
فصل اولور



اجزاء قضیه اوچدر محکوم علیه و محکوم به و رابطه در شویله که  
قضیه نك اولکی جزئه محکوم علیه و ایکنجی جزئه محکوم به  
و ایکنسک بیننده کی نسبت تامهیه دلالت ایدن شیئه رابطه دنیلور  
مثلا هوا آچقدر دیدیکمزده هوایه آچیق دیو حکم ایتش اولدیغمزدن  
هوا محکوم علیه و آچیق محکوم به و (در) لفظی رابطه در  
و فعللر هم اوج زماندن برینه دلالت ایلر و همده رابطه اولور  
نته کیم هوا اچیلدی . هوا آچیلور . هوا آچیله جق .  
دیدیکمزده هوا محکوم علیه و اچیلدی . آچیلور . آچیلور .  
آچیله جق فعللری هم محکوم به و همده رابطه اولور .  
قضیه نك متضمن اولدیغی تصدیقندن اول اوج شیئک  
تصوری لازم کلور شویله که اول محکوم علیه و ثانیاً  
محکوم به و ثالثاً بینلرنده کی نسبت تصور و بعده تصدیق  
یعنی حکم اولنور

و نسبتک و قوعیله حکم اولنور ایسه قضیه موجب و لاو قوعیله  
حکم اولنور ایسه سالبه اولور .

قضیه موجب نك مثاللری شمعی بالاده سبقت ایلدی بومثاللرک  
منفیله دخی قضیه سالبهیه مثال اولور نته کیم هوا آچیق دکلدر  
وهوا آچیله جق دکلدر دنیلور

قضیه یا حلیه و یا خود شرطیه اولور شویله که اگر محکوم به  
محکوم علیه در یا خود دکلدر دیو حکم اولنور ایسه قضیه  
حلیه دنیلور که طرفینی مفرد منحل اولور یعنی رابطه  
آیلور ایسه طرفینی مفرد قالور و بونک محکوم علیه نه  
موضوع و محکوم به نه محمول دنیلور

نته کیم هوا آچقدر هوا آچیق دکلدر قضیه لری حلیه  
و (در) رابطه ایجابیه و (دکلدر) رابطه سلبیه در و بو  
رابطه لری اولندقدده هوا و آچیق لفظلری قالور که ایکیسی  
دخی مفرد در و ایکی صورتده دخی هوا موضوع و آچیق  
محمولدر

واکر رابطه طی اولندقدده طرفین برر قضیهیه منحل  
اولور ایسه قضیه شرطیه دنیلور و محکوم علیه مقدم  
و محکوم به تالی دیو تسمیه اولنور

شرطیه دخی یا متصله و یا خود منفصله اولور .

زیرا شرطیهده محکوم به اولان مضمون قضیه نك محکوم علیه اولان  
مضمون قضیهیه اتصالیه یعنی موجب سنده بو اتصالک و قوعی و سا-  
لبه سنده لاو قوعی ایله حکم اولنور ایسه متصله دنیلور  
واکر ایکی مضمون قضیه نك یکدیگرنندن انفصالیه یعنی موجب سنده  
بو انفصالک و قوعی و سالبه سنده لاو قوعی ایله حکم اولنور ایسه  
منفصله دنیلور .

نته کیم (هر نه زمان کونش طوغار ایسه کوندوز اولور)  
دیدیکمزده (کونش طوغار) مضمونته (کوندوز اولور)  
مضموننک و قوع اتصالیه حکم ایتش اولدیغمزدن شر-  
طیه متصله نك موجب سی اولور و (کونش طوغار ایسه  
اخشام اولور دکلدر) دیدیکمزده (کونش طوغار)  
مضمونته (اخشام اولور) مضموننک لاو قوع اتصالیه



حکم ایتش اولدیغمزدن شرطیه متصلا نك سالبه سی اولور  
وایکیسنده دخی (کونش طوغار) جمله سی مقدم واولکیسنده  
(کوندوز اولور) وایکنجیسنده (اخشام اولور دکدر)  
جمله لری تالیدر

ونتہ کیم (یا کوندوز اولور یاخود کونش باتمش بولنور)  
دیدیکمزده کوندوز اولمق ایله کونش باتمش مضمونلرینک  
یکدیگردن وقوع انفصالنه یعنی ایکسی بروقده بولمقدقلرینه  
حکم ایتش اولدیغمزدن شرطیه منفصلا نك موجبہ سی  
اولور و (یا کوندوز اولور یاخود آی کورینور دکدر)  
دیدیکمزده کوندوز اولمق ایله آی کورنمک مضمونلرینک  
یکدیگردن لاوقوع انفصالنه یعنی کوندوزین دخی آی  
کورینه یله جکی جهته بولنرک بیننده انفصال و مباينت  
اولمادیغنه حکم ایتش اولدیغمزدن شرطیه منفصلا نك  
سالبه سی اولور وایکیسنده دخی (کوندوز اولور) جمله سی  
مقدم واولکیسنده (کونش باتمش بولنور) وایکنجیسنده  
(آی کورینور دکدر) جمله لری تالی در

ایکی اولکی مثالرده رابطه اتصال اولان (ایسه) وایکی  
صکره کی مثالرده رابطه انفصال اولان (یا) ایله (یاخود)  
طی اولندوقده مقدم و تالی برر قضیه جلیه اوله رق قالور.

بعضا قضیه جلیه نك محمولی ادات تردید ایله تعدد ایدوب بوکاجلیه  
مردده المحمول دینورکه منفصله یه شبیه بر قضیه جلیه در  
نته که (یا عدد چفت اولور یاخود عدد نك اولور) دیدیکمزده شرطیه  
منفصلا اولور اما (عدد یاچفت یاخود تکدر) دیدیکمزده قضیه  
جلیه مردده المحمول اولور

واکر حکم قصد اولتیوبده مجرد عددك مفهومی تفهیم وایضاح اولنق  
مراد اولورسه عددی تقسیم دیمک اوله رق اصلا قضیه اولمیوب بلکه  
تصورات قبیلندن اولور

زیرا مقاله اولانک باب ثانیسنده بیان اولندیغنه کوره تقسیم  
تعریفات قبیلندندر تعریف ایسه هر نقدر بر قضیه صورتده ایسه ده  
حکمی حاوی اولدیغی جهته حقیقه قضیه اولمیوب تصورات  
قبیلندندر.

چونکه تعاریف معرفك عینی اولوب فقط اجمال و تفصیل جهته  
بینلرنده فرق واردرکه معرف بمحل اولوب تعریف انك تفصیلیدر  
قضیه نك معنای ایسه موضوعك محمولده اندراجی و محمولك موضوعه  
شمولی ایله حکم ایتکدن عبارتدر بوجهته معرفك یرینه تعریف  
وانك یرینه معرف اقامه اولنسه مقصده خلل کلز مثلا (انسان  
دیدیکمز حیوان ناطقدر) دنیه جک یرده (حیوان ناطق دیدیکمز  
انساندن عبارتدر) دنیه بیلور اما (انسان حیواندر) دنیه جک  
یرده (حیوان انساندر) دنیه من

وبرده تصورجه معرف هر نقدر من وجه معلوم ایسه ده من وجه  
مجهول دیمک اولدیغی جهته اکا تعریف ایله علم تفصیلی حاصل  
ایدیلور قضیه ده ایسه موضوع و محمول من حیث التصور معلوم دیمک  
اوله رق بینلرنده کی نسبتك وقوعی یاخود لاوقوعی ایله حکم اولنور



الحاصل كرك تعريف و كرك تقسيم تصورات قبيلندن اوله رق ايکيسي  
دخی قضیه دکلردر

بناء علی ذلک ایکیسنه دخی ذاتا اعتراض اولنه ماز یعنی نیچون بویه  
تعریف و تقسیم ایدیورسین دینله من فقط (بو تعریف معرفت عینیدر  
افرادینی جامع و اغیارینی مانعدر و بولفظک معناسی بودر و بو تقسیم  
اقسامنی حاصردر یعنی خارجده بر قسم قلامشدر و مقسمدن خارج  
اولان برشی تقسیمه داخل اولامشدر و اقسامک هیچ بریسی مقسمک  
قسمی دکلدر تمامیه اصولنه موافقدر) کی دعوالری متضمن اولور لر  
ایشته بودعاوی ضمیمه یه اعتراض اولنه یلور

نته که بر مصور کاغد اوزرنده رسم یارکن ایستدیکي وجهله تصویر  
ایدر نیچون بوراسنی بویه یاییورسین دینله من فقط مثلا برکینک  
رسمی الدقه بورسم فلان کینک کورونشنه موافقدر فن مناظر  
قاعده لرینه مطابقدر دیو ضمنا دعوی ایش اوله جفتدن بو خطی  
زیاده اوزاتمشسین شوراسنی بویه یا بمشسین نسبتندن چیقمش اوکینک  
کورونشنه موافق دکلدر دیو اعتراض اولنه یلور .

## فصل ثانی

(قضیه حلیه بیاننده در)

موضوع قضیه نک مفهومه موضوع ذکرى و اصل محکوم  
علیه موضوع حقیقی دینلور  
و موضوع اگر جزئی ایسه مفهومی هم موضوع ذکرى  
و همده موضوع حقیقی اولور

نته که (موسى افندی کاتبدر) دیدیکمزده موسى لفظنک  
مفهومی موسى نام ذاتدر که کاتبدر دیو محکوم علیه اولان  
دخی اودر

و موضوع اگر کلی اولوبده نفس ماهیت اوزرینه حکم  
اولنور ایسه کذلک موضوع ذکرى ایله موضوع حقیقی  
برلشور

نته که (حیوان جنسدر دیدیکمزده جنسیت ایله حیوان  
لفظنک مفهومی اولان نفس ماهیت اوزرینه حکم ایش  
اولورز بناء علیه حیوان مفهومی هم موضوع ذکرى و هم  
موضوع حقیقی اولور

فقط کلینک بو وجهله استعمالی انجیق بعض علوم مدونه  
اصطلاحاتنه دائر اولان قضیه لرده در یو خسه قضایای  
سائرده کلینک مفهومی هپ مرأت ملاحظه اولوب اصل  
محکوم علیه انک ماصدق علیه اولان افراددر بو صورتده  
ایسه موضوع ذکرى بشقه و موضوع حقیقی بشقه اولور  
شویله که اول کلینک مفهومی موضوع ذکرى اولوب اکا  
وصف موضوع و عنوان موضوع دینور و افرادی موضوع  
حقیقی اولوب اکا دخی ذات موضوع دینلور

نته که حیوان بر ایچر دیدیکمزده حیوان مفهومی عنوان  
موضوع و حیوانک افرادی ذات موضوع اولور .



الحاصل قضیه نك موضوعی کلی اولدیغی حائده مفهومی اکثریا  
عنوان موضوع اولوب ماصدق علیی دخی موضوع حقیقی یعنی  
ذات موضوع اولور

قضیه نك محمولی ایسه ذات موضوعك وصفی اولق اوزره محكوم به  
اولمسیله محمولدن دائماً مفهوم مراد اولور

و ذات موضوعك عنوان موضوع ایله اتصافنه عقد وضع و محمول  
ایله اتصافنه عقد حل دینلور

مثلا انسان غافلدر دینلدکده انسانك ماصدق علیی اولان افرادك  
انسانیت ایله اتصاف عقد وضع و غفلت ایله اتصافلری عقد حل در  
قضیه حلیه نك موضوع ذکریمی جزئی حقیقی ایسه  
قضیه شخصییه و قضیه مخصوصه تسمیه اولور بکرافندی  
کاتدر بکرافندی مهندس دکادر دینلدیکی کی

و موضوع ذکریمی کلی اولوبده حکم اگر ذات موضوعه  
سرایتی قصد اولتمسزین مجرد عنوان موضوع اوزرینه  
اولور ایسه قضیه طبیعییه دینلور انسان کلیدر انسان  
حیوان ناطقدر دینلدیکی کی

و موضوع کلی اوزرینه حکم اگر افرادینه سرایت قصدیله  
اولوبده افرادك هر بری یاخود بعضیسی دیو کیتی بیان  
اولتماز ایسه قضیه مهمله دینلور انسان غافلدر انسان  
آگاه دکادر دینلدیکی کی

واگر افرادك کیتی بیان اولور ایسه قضیه محصوره

و مسوره تسمیه اولور و کیمته دلالت ایدن لفظه دخی سور  
دینلور

بو دخی ایکی وجهله اولور شویله که یا هر فرد اوزرینه  
حکم اولوب قضیه کلیه دینلور و یاخود بعض افراد  
اوزرینه حکم اولوب قضیه جزئییه دینلور

الحاصل قضیه محصوره کیمت افراد اعتباریله کلیه و جزئییه  
دیو ایکی قسمه منقسم اولور و بونلرک هر بری کیفیت  
یعنی ایجاب و سلب اعتباریله دخی ایکیشر قسمه تقسیم  
اولور و بو جهتله محصورات درت اولور

و جزئیته نسبتله کلیمته و سلبه نسبتله ایجابده شرف بولندیغندن  
محصورات اربعه نك اشرفی موجبۀ کلیه و ایکنجی درجه سی سالبه  
کلیه و اوچنجی درجه سی موجبۀ جزئییه و اک اشاعیسی سالبۀ  
جزئییه در

و موجبۀ کلیه انجق محمولك موضوع ذکریمی مساوی و یاخود اندن  
اعم اولدیغی صورته صادق اولور

نته کیم هر انسان ناطقدر هر انسان حیواندر دینلدیکی کی  
و سالبۀ کلیه انجق محمول ایله موضوع ذکریمی بیننده بحسب الحمل  
مباینت اولدیغی صورته صادق اولور

نته کیم انسانك هیچ بریسی آت دکادر آتک هیچ بریسی انسان دکادر  
دینلور و موجبۀ جزئییه محمول ایله موضوع ذکریمی بیننده بو وجهله  
مباینت اولمیان برلرده صادق اولور

نته کیم بعض حیوان انساندر بیاضلرک بعضیسی انساندر دینلور



وسالیه جزئیة محمولک موضوعه مساوی یا خود اندن مطلقا اعم  
اولدیغی صورتلرده صادق اولور

نته کیم بعض حیوان انساندر بعض حیوان بیاض دکلدر دینلور  
سالیه جزئیة نك سوری بو وجهله (بعض وکل) لفظلری اولوب  
انجق پک چوق دفعه سالیه جزئیة سوری اولمق اوزره رفع ایجاب  
کلی تعبیری قوللانیلورکه (هر بری دکل) لفظلریدر

نته کیم بعض حیوان انسان دکلدر بعض حیوان بیاض دکلدر مقامنده  
هر حیوان انسان دکلدر هر حیوان بیاض دکلدر دینلور

تفصیلات سابقه دن مستفاد اولورکه بحسب التحقق موجهه کلیه ایله  
سالیه کلیه وسالیه جزئیة ییتلرنده مبیانت اولوب موجهه کلیه نك  
صادق اولدیغی یرده سالیه لر وانلرک صادق اولدقلری یئرلرده موجهه  
کلیه صادق اولماز

کذلک موجهه جزئیة ایله سالیه کلیه ییتنده مبیانت اولوب برینک  
صادق اولدیغی یرده دیگرکی صادق اولماز

وموجهه کلیه موجهه جزئیة دن مطلقا اخصدر زیرا کایتک صادق  
اولدیغی یرده جزئیة دخی صادق اولور اما جزئیة نك هر صادق اولدیغی  
یرده کلینک صدق لازم کلر

بناء علی ذلک (هر انسان حیواندر) قضیه سی صادق اولیجق (بعض  
انسان حیواندر) قضیه سی دخی صادق اولور اما (بعض حیوان  
انساندر) قضیه سی صادق اولدیغی حالده (هر حیوان انساندر)  
قضیه سی صادق اولماز

بناء علی ذلک سالیه کلیه دخی سالیه جزئیة دن مطلقا اخصدر

نته کیم (هیچ بر انسان آت دکلدر) قضیه سی صادق اولدیغی کبی  
(بعض انسان آت دکلدر) قضیه سی دخی صادق اولور اما (بعض

حیوان انسان دکلدر) قضیه سی صادق اولدیغی حالده (هیچ بر حیوان  
انسان دکلدر) قضیه سی صادق اولماز  
وموجهه جزئیة ایله سالیه جزئیة ییتنده عموم وخصوص من وجهه  
بولنور

نته کیم (بعض حیوان انساندر) قضیه سی صادق اولدیغی کبی (بعض  
حیوان انسان دکلدر) قضیه سی دخی صادق اولور و (بعض انسان  
حیواندر) قضیه سی صادق اولدیغی حالده (بعض انسان حیوان دکلدر)  
قضیه سی صادق اولماز کذلک (بعض انسان آت دکلدر) قضیه سی  
صادق اولدیغی حالده (بعض انسان آتدر) قضیه سی صادق اولماز

قضیه مهمله قضیه جزئیة حکمنده در یعنی برینک صادق اولدیغی یرده  
دیگرکی دخی صادق اولور وعلوم وفتونده قضیه مهمله قضیه جزئیة  
مقامنده قوللانیلور

فقط محاورات وادیاتده بعضا مهمله نك قضیه کلیه مقامنده قوللانیلور  
واردر

نته کیم اوروبا اهالیسی چالشقانددر دینلور وکافه اهالی اوروبا مراد  
اولنور وبو مثالو قضایای ادیه نك کلینی عرف وعادته مستنددر  
یوخسه مسائل حکمیه کبی براهین عقلیه ایله مثبت دکلدر

قضیه شخصییه قضیه کلیه حکمنده در زیرا زیرده بیان اولنه جفی  
وجهله قضیه شخصییه بعضا قضیه کلیه مقامنده قوللانیلور

قضیه طبیعیه اعیان موجوداتدن بحث ایدن علوم حکمیه ده استعمال  
اولماز

قضایای محصورده حکم اگر موضوعک خارجده وجودی اعتباریه  
اولور ایسه قضیه خارجییه دینلور

واگر موضوعک خارجده وجودینی فرض وتقدير ایله اولور ایسه  
قضیه حقیقییه دینلور



مثلا (هر آتش صیقا قدر) دینلده کده اکر (خارجده بولنش یاخود بولنه جق اولان هر آتش صیقا قدر) معناسی قصد اولنور ایسه قضیه خارجیه اولور و صیقاقلقه انجق مقدا یاخود شمدی خارجده بولنش و یاخود بوندن صکره خارجده بولنه جق اولان آتشلر اوزرینه حکم ایدلش اولور

واکر (هرشی که خارجده بولنسه آتش اوله اول شی خارجده بولندیغی تقدیرده صیقا قدر) معناسی قصد اولنور ایسه قضیه حقیقیه اولور و حکم مذکور آتشک خارجده بولنش و یاخود بولنه جق اولان آتشلره منحصر قالمیوب بلسکه هم بوللره و همده آتشک خارجده وجودی مفروض اولان افراد ممکنه سنه شامل اولور شو حاله کوره قضیه نك موضوعی خارجده هیچ بر فردی بولنمیان کلی اولور ایسه قضیه خارجیه اوله میوب انجق قضیه حقیقیه اولور

نته کیم (عنقا اوچار) دینلده کده قضیه خارجیه اولق احتمالی اولمیوب انجق قضیه حقیقیه اولور زیرا خارجده هیچ بر وقت بر فردی بولندیغندن معنای اوله جل اولنه میوب انجق (هرشی که خارجده بولنسه عنقا اوله اول شی خارجده بولندیغی تقدیرده اوچار) دیمک اولور

واکر قضیه نك موضوعی انجق ذهنده موجود اولان شیلردن ایسه قضیه ذهنيه دینلور که حکم انجق افراد ذهنيه اوزرینه اولور

نته کیم کلیات جنس تکدر و جنس کلی ذاتیدر و عرض عام کلی عرضیدر دینلدیکی کبی

وقضیه ذهنيه نك موضوعی ممتنع اولوبده انجق فرض ایله ذهنده موجود اولور ایسه ذهنيه فرضیه دینلور

نته کیم اجتماع نقیضین محالدر دینلده کده ذهنده وجودی فرض اولنان اجتماع نقیضین اوزرینه محالیت یعنی امکانسزلق ایله حکم ایدلش اولور

قضیه نك کرک موضوعه و کرک محموله سلب ونفی قارشیمیوبده ایکلیسی دخی وجودی ایسه محصله تسمیه اولنور (انسان حیواندر) و (انسان آت دکدر) کبی لکن اکثرا محصله تعبیری موجبیه تخصیص اولنه رق سالبه سنه دخی بسیطه دینلور

واکر قضیه نك بالکن موضوعی عدمی اولور ایسه معدوله الموضوع واکر بالکن محمولی عدمی اولور ایسه معدوله المحمول واکر ایکلیسی دخی عدمی اولور ایسه معدوله الطرفین تسمیه اولنور (دیری اولمیان جاددر) و (عقرب کوز-زردر) و (حدینی بیلمیان حقیقت بین اولمیاندر) قضیه لری کبی

موجبیه معدوله المحمول ایله سالبیه بسیطه بیننده فرق بودر که موجبیه معدوله المحمولده محمول عدمینک وقوع ثبوتی ایله حکم اولنور بوايه ربط السلب دیمکدر و سالبیه بسیطه محمول وجودینک لا وقوعیه حکم اولنوب بودخی سلب الربط دیمکدر

وبرده علی العموم موجبیه لرك صدق موضوعک وجودینه توقف ایدر زیرا برشیئی برشیئله اثبات ایتک مثبت لهک ظرف ثبوتده یعنی خارجده اثبات اولنه جق ایسه خارجده ذهنده اثبات اولنه جق ایسه ذهنده موجود اولسنک فرعیدر نته کم ثبت العرش ثم انقش دیرلر و برشی معدوم اولدیغی حالده اکا بروصفک اثباتی ممکن اولماز سالبه لرك صدق ایسه وجود موضوعه توقف ایتز زیرا برشی معدوم اولیجق هر وصف اندن سالب اولنه دینلور الحاصل موجبیه معدوله المحمول موضوعک وجودینی اقتضا ایدر سالبیه بسیطه ایسه موضوعک وجودی دینی اقتضا ایتز



بناء علی ذلك هر نروده موجباً معدولة المحمول صادق اولور ایسه سالبه بسیطه دخی صادق اولور .

اما سالبه بسیطه نك صادق اولدیغی یرده موجباً سالبه المحمولك صادق اولمی لازم کلز .

نته کم (شريك الباری بصیر دکلدر) قضیه سی بسیطه اوله رق صادق اولور اما موجباً معدولة المحمول اولان (شريك الباری بی بصردر) قضیه سی صادق اولماز .

## فصل ثالث

(قضایای شرطیه بیانده در)

شرطیه متصله یالزومیه و یا خود اتفاقیه اولور .

زیرا متصله نك مقدم و تالیسی بیننده علیت کبی بر علاقه معلومه دن طولایی اتصالک وقوعی یا خود لاوقوعی ایله یعنی مقدمک تالی بی مستلزم اولمی یا خود اولماسی ایله حکم اولور ایسه لزومیه تسمیه اولور .

نته کم هر نه وقت کونش طوغار ایسه کوندوز اولور یعنی کوندوز اولمق لازم کلور و هر نه وقت کوندوز اولور ایسه کونش طوغش اولور یعنی کونش طوغش اولمق لازم کلور و هر نه وقت کوندوز اولور ایسه عالم ضیادار اولور یعنی عالمک ضیادار اولمی لازم کلور دینلده اشبو اوج قضیه نك برنجیسنده مقدمک تالی یه وایکجنسنده تالینک مقدمه علت اولسندن و اوججیسنده ایکسی دخی بر علتک معلولی اولمرندن طولایی لزوم اتصالک وقوعیه یعنی مقدمک تالی بی مستلزم و تالینک مقدمه لازم اولسیله حکم ایدلمش دیمک اولدیغندن اوجی دخی متصله لزومیه نك موجبیه سی اولور .

متصله ده تضایف دخی علیت کبی بر علاقه معتبره اولغله مقدم و تالی متضایفین اولدقلری حالده انلردن مرکب اولان شرطیه متصله دخی لزومیه در

نته کم بکر افندی عبدالله اغانک باباسی ایسه عبدالله اغا بکر افندی نك اوغلی اولور دینلده بکر افندی عبدالله اغانک باباسی اولیجی عبدالله اغا دخی انک اوغلی اولمی لازم کلور دیمک اولسیله بو شرطیه متصله دخی لزومیه موجبیه اولور

و کونش طوغار ایسه یلدزلر کورینور دکلدر یعنی یلدزلر کورنمک لازم کلز دینلده لزوم اتصالک لاوقوعیه یعنی مقدم بر سبب معلومدن طولایی تالی بی مستلزم دکلدر دیو حکم ایدلمش اولسیله لزومیه سالبه اولور

و اگر متصله نك مقدم و تالیسی بیننده بر علاقه معلومه اولدیغی حالده اتفاقی یعنی تصادفی اوله رق تالینک مقدمه اتصالی یعنی مقدم نفس الامرده متحقق اولدیغی حالده تالینک دخی تحقق واقعدر یا خود واقع دکلدر دیو حکم اولور ایسه متصله اتفاقیه تسمیه اولور .

نته کم هر نه وقت انسان ناطق اولور ایسه آت دخی صاهلدر دینلده انسان ناطق اولدقجه آت دخی صاهل اوله کلور دیمک اولسیله اتفاقیه موجبیه اولور و انسان موجود اوور ایسه البته عتقا دخی موجود اولور دکلدر دینلده اتفاقیه سالبه اولور

وبعضا متصله اتفاقیه ده مقدمک نفس الامرده تحقق الترام اولنیوب تحقیقی فرض ایله اکتفا اولور

نته کم کلر اچلمسه بیله بلبلار اوتر دینلور که بالفرض کلر هیچ اچلمسه دخی بلبلار یته اوتر دیمک اولور



شرطیه منفصله دخی یا عنادیه و یا خود اتفاقیه اولور .  
 زیرا منفصله نك مقدمیه تالیسنك نقیضی بینده یکدیگره  
 علت یا خود ایکسی بر عاتمه معلول اولق کبی بر علاقه  
 معلومه دن طولایی انفصالك وقوعی یا خود لا وقوعی  
 ایله حکم اولنور ایسه عنادیه دنیلور .

نته کیم ( بهمه حال یا کونش طوغشدر یا خود کیمه موجوددر )  
 و ( یا کوندوز موجوددر یا خود کونش بامشدر ) و ( یا عالم ضیادار  
 در یا خود کیمه موجوددر ) دنیلدکده اشبو اوج قضیه نك برنجیسنده  
 مقدم تالینك نقیضنه و ایکنجیسنده تالینك نقیضی مقدمه علت  
 و اوججیسنده ایکسی بر علتیه معلول اولدیغنه بناء انفصالك وقوعیه  
 حکم ایدلمش اولدیغندن اوجی دخی عنادیه موجب اولور  
 و ( بهمه حال یا کیمه اولور یا خود ییلدیزلر کورینور دکدر ) دنیلدکده  
 بر سبب معلومدن طولایی تالینك مقدمدن انفصالی واقع دکدر  
 یعنی یینلرنده عتاد و مبیانت یوقدر دیو حکم ایدلمش اولمسیله عنادیه  
 سالبه اولور

و منفصله نك مقدمیه تالیسنك نقیضی بینده بر علاقه  
 معلومه اولمیدیغی حالده اتفاقی اوله رق تالینك مقدمدن  
 انفصالی واقعدر یا خود واقع دکدر دیو حکم اولنور  
 ایسه منفصله اتفاقیه دنیلور .

نته کیم ( یا انسان موجود اولور یا خود عنقا موجود اولور ) دنیلدکده  
 منفصله اتفاقیه موجب اولور و ( یا انسان ناطق اولور یا خود جار  
 ناهق اولور دکدر ) دنیلدکده منفصله اتفاقیه سالبه اولور

مطلقا منفصله یا حقیقیه و یا خود مانعة الجمع و یا خود مانعة  
 الخلو اولور .

زیرا منفصله نك ایکی جزئی بینده صدقا و کذبا منافات  
 بولنور ایسه حقیقیه دنیلور که هم مانعة الجمع و هم مانعة  
 مانعة الخلو اولوب ایکی جزئی بر لکده صادق اولمیدیغی کبی  
 ایکسی بردن کاذب دخی اولماز یعنی نه وجودده مجتمع  
 اولورلر ونه ده ایکسی بردن مرتفع اولورلر بهمه حال  
 ایکیسندن بری بولنور

نته کیم عدد یا چفت اولور یا خود تك اولور دنیلدکده  
 هم مانعة الجمع و هم مانعة الخلو اولور زیرا عدد هم  
 چفت و هم تك اولمیدیغی کبی هم چفت و هم تك اولماق  
 دخی اولماز

واکر منفصله نك ایکی جزئی بینده یالکز صدقا منافات  
 بولنور یعنی اجتماعلری جائز اولمیوبده ارتفاعلری جائز  
 اولور ایسه مانعة الجمع دنیلور

نته کیم برشی یا حجر اولور و یا خود شجر اولور دنیلدکده  
 مقدم و تالی بینده یالکز صدقا منافات وارددر دیو حکم  
 ایدلمش اولور چونکه برشی هم حجر هم شجر اوله ماز  
 اما حجرده شجرده اولمیوبده حیوان اوله بیلور



واکر منفصله نك جزری بیننده یالکز کذباً منافات بولور  
یعنی ارتفاعلری جائز اولموبده اجتماعلری جائز اولور ایسه  
مانعة الخلو دنیلور

نته کیم برشی یا لاججر اولور و یا خود لاشجر اولور دنیلدکده  
مقدم وتالی بیننده یالکز کذباً منافات واردردیو حکم  
ایدلمش اولور چونکه تفیک تقیی اثباتدر بو جهته لاججرک  
منفیسی حجر ولاشجرک منفیسی شجر ارلور ولا حجر ایله  
لاشجر ایکسی بردن مرتفع اولسه لر برشی هم حجر هم  
شجر اولق لازمکلور بناء علیه ایکسنک دخی ارتفاعلری  
جائز اولماز اما ایکسی برلکده بولنه بیلور نته کیم بالاده  
ذکر اولندیغی اوزره حیوان هم لاججر وهم لاشجر در

بونلر هب اقسام ثلثة منفصله نك موجبه لرلی اولوب متضمن اولدقلری  
نسبت انفصالیه رفع و سلب اولندقدن سالبه اولورلر

نته کیم (یا کونش طوغار و یا خود روزکار اسر دکدر) دنیلدکده  
مقدم وتالی بیننده هم صدقا وهم کذباً انفصال و منافات لاوقوعیه  
حکم ایدلمش اولدیغندن منفصله حقیقه سالبه اولور

وهر قنغی ماده ده مانعة الجمعک موجبه سی صادق اولور ایسه انک  
سالبه سی کاذب و مانعة الخلوک سالبه سی صادق اولور

وهر قنغی ماده ده مانعة الخلوک موجبه سی صادق اولور ایسه انک  
سالبه سی کاذب و مانعة الجمعک سالبه سی صادق اولور

منفصله نك بو اقسام ثلثه سی حایه مردده المحمول ایله تقسیملرده  
دخی جاری اولور

وبعضاً منفصله نك اجزائی ایکیدن زیاده اولور  
نته کیم علم آرتمایقاده عدد یا زائد یا خود ناقص اولور و یا خود مساوی  
اولور دنیلور

چونکه بر عددک مجموع کسور تسعه سی کندوسندن زیاده اولور  
ایسه مساوی دنیلور

نته کیم اون ایکی عدد زائددر زیرا نصفی الی و ثلثی درت وربعی اوج  
وسدسی ایکی اولوب بونلرک مجموعی ایسه اون بشه بالغ اولمغله  
اون ایکیدن زائد اولور و درت ناقصدر زیرا نصفی ایکی وربعی  
بردر بونلرک مجموعی ایسه اوچدرکه دردن ناقصدر والی عدد  
مساویدر زیرا نصفی اوج و ثلثی ایکی وسدسی بردر بونلرک مجموعی  
ایسه التیدر

بوندن صکره معلوم اوله که قضایای شرطیه نك دخی محصوراتی  
وارددر فقط حلیه لرک محصوراتی موضوعک افرادی اعتباریه اولوب  
شرطیه لرک محصوراتی ایسه زمان اعتباریه در

شویله که شرطیه لرده کی حکم اگر جمیع ازمان اوزرینه اولور ایسه  
شرطیه کلیه اولور

نته کیم هر قنغی وقت کونش طوغار ایسه کوندوز اولور دنیلدکده  
متصله کلیه موجبه اولور و هیچ بر وقت کونش طوغار ایسه کیمه  
اولور دکدر دنیلدکده متصله کلیه سالبه اولور

منفصله کلیه ده دخی البته و دائماً و بهمه حال تعبیرلری قوللانیلوب  
مثلاً البته یا کونش طوغار یا خود کیمه موجود اولور دنیلدکده  
منفصله کلیه اولور

و حکم اگر بعض ازمان اوزرینه اولور ایسه شرطیه جزئیه اولور

نته کیم بعضاً روزکار اسر ایسه یا غمور یا غار دنیلور  
واکر بویله کلیت و جزئیته تعرض اولتموبده یالکز شویله اولور



ایسه یاخود شویله اولدوقده بویله اولور ویاخود یاقلان شی شویله  
ویاقلان شی بویله در دنیلدکده شرطیه مهمله اولور  
وحکم اگر مشخص و معین بر وقت اوزرینه اولور ایسه شرطیه  
شخصیه اولور

نته کیم بوسنه کونش برج جلاک برنجی درجه سنه حلول ایتدکده  
نوروز سلطانی اولوب یکی تفویم اول اندن اعتباراً بدأ ایدردنیلدکده  
متصله شرطیه شخصیه اولور

و ( یاسنه هجریه شمسیه حسابی شمسیک هجرت نبویه سنه سنه برج  
جلاک برنجی درجه سنه حلول ایتدیکی زماندن یورتلی یاخود شمسیک  
اوسنه میران برجنک برنجی درجه سنه حلول ایلدیکی زمانی اشبو  
سنه هجریه شمسیه نك مبدئی اعتبار ایتلی در ) دیدیکمزده منفصله  
شخصیه اولور

## فصل رابع

( احکام قضایا بیاننده اولوب ایکی مجتبی مشتملدر )

### مبحث اول

( تناقض بیاننده در )

تناقض ایکی قضیه نك ایجاب و سلب ایله اویله براختلا -  
فیدر که بو اختلاف بالذات اول ایکی قضیه دن برینک  
صادق و دیگرینک کاذب اولسنی اقتضا ایدر  
نته کیم بکر افندی کاتبدر بکر افندی کاتب دکدر دنیلدکده

بوایکی قضیه دن برینک صادق دیگرینک کاذب اولسی  
لازم کاور

بووجهله اختلاف ایسه انجق ایکی قضیه نك محکوم علیه  
ایله محکوم بهده و بونلرک هر درلو قید و شرطلرنده اتحاد  
لرندن صکره تحقق ایلر و بونلردن برنده مختلف اولسه لر  
تناقض بولماز

مثلا بکر افندی کاتبدر قضیه سیله ولی اغا کاتب دکدر  
قضیه سی بیاننده تناقض بولمادیغی کبی بکر افندی کاتبدر  
قضیه سیله بکر افندی مهندس دکدر قضیه سی بیاننده دخی  
تناقض یوقدر

کذلک بکر افندی صائمدر بکر افندی صائم دکدر  
( یعنی رمضانده صائمدر ایام سائردهده صائم دکدر )  
و بکر افندی قائمدر بکر افندی قائم دکدر ( یعنی جامعده  
قائمدر زقاعده قائم دکدر ) و بکر افندی بابادر بکر افندی  
بابا دکدر ( یعنی عبدالله افندینک باباسیدر ولی اغانک باباسی  
دکدر ) قضیه لری متناقض اولماز

و کذا کوبده کی شراب مسکردر کوبده کی شراب مسکردر ( یعنی  
بالقوه مسکردر بالفعل مسکردر ) و قیلان بیاضدر قیلان بیاض  
دکدر ( یعنی بعض محلی بیاضدر بعض محلی بیاض دکدر ) و روزگار  
انسانی اوشودر روزگار انسانی اوشوتمز ( یعنی صوغوق اولور ایسه  
اوشودر صوغوق اولماز ایسه اوشوتمز ) دنیلور ایسه تناقض بولماز



زیرا بوقضیه‌لر موضوع و محمولده متحد ایسه لرده زمانده مکنده  
واضافتده وقوه و فعلده و جزء و کلمه و شرطده متحد دکلردر .  
کذلک ولی اغا تفنک آثار قضیه‌سی ولی اغا طوب آتماز قضیه‌سنه  
وبکرافندی عربجه بیلور قضیه‌سی بکرافندی فارسجه بیلز قضیه‌سنه  
منافض دکلدر .

الحاصل تناقضك تحقیقی ایکی قضیه‌نک محکوم علیه ایله  
محکوم بهده و بونلرک کافه قیود ملحوظه‌سنده اتحادلریله  
مشروطدر

و محصورانده ایکی قضیه‌نک کمیجه اختلافلری دخی  
شرطدر یعنی بری کلیه اولور ایسه دیکری جزئیله اولمق  
لازمدر زیرا بعضاً قضیه کلیه لرک ایکیسی دخی کاذب اولور  
(هر انسان کاتبدر هیچ بر انسان کاتب دکلدر) قضیه‌لری  
کبی و بعضاً جزئی لرک ایکیسی دخی صادق اولور (بعض  
انسان کاتبدر بعض انسان کاتب دکلدر) قضیه‌لری کبی  
بوجهتله ایجاب کلینک نقیضی سلب جزئی و سلب کلینک  
نقیضی ایجاب جزئی اولور

بناء علی ذلک موجبہ کلیه‌نک نقیضی انجق سالبه جزئیله  
و سالبه کلیه‌نک نقیضی انجق موجبہ جزئیله در

نته کیم (هر انسان حیواندر) قضیه‌سنک نقیضی (بعض  
انسان حیوان دکلدر) قضیه‌سیدر و (هیچ بر انسان حیوان

دکلدر) قضیه‌سنک نقیضی (بعض انسان حیواندر)

قضیه‌سیدر .

ایکی مفهوم مفردنک بری وجودی و دیکری عدمی اولمق حسبیه  
اختلافلریله دخی تناقض دنیلور

شویله که ایکیسی برشیئه صادق اولمازلر و ایکیسی دخی بر موجوددن  
مرتفع اولمازلر انسان ایله لا انسان کبی که هر قنغی شی اولور ایسه  
اولسون یا انساندر یا خود لا انساندر

فقط معدومدن ایکیسی دخی مرتفع اولورلر زیرا معدوم نه انساندر  
ونده لا انساندر

اما بوجه بالامتناقض اولان قضیه‌لر بر موضوعده مجتمع اولدقلری  
کبی بر موضوعدن مرتفع دخی اولمازلر بو موضوع ککرک موجود  
اولسون و ککرک معدوم اولسون .

زیرا برشیئنک برشیئه ثبوتی مثبت لهک وجودینه توقف ایدر سلب  
ایسه وجود موضوع اقتضا ایتمز نته کیم قضیه حلیله فصلنده مرور  
ایلدی .

تناقض بوجه بالا حلیله لرده اولدیغی کبی شرطیه لرده دخی اولور .  
نته کیم (هر نه زمان کونش طوغار ایسه کوندوز اولور) قضیه‌سنک  
نقیضی (بعضاً کونش طوغار ایسه کوندوز اولور دکلدر)  
قضیه‌سیدر و (هیچ بروقت کونش طوغار ایسه کجه اولور دکلدر)  
قضیه‌سنک نقیضی (بعضاً کونش طوغار ایسه کجه اولور)  
قضیه‌سیدر .

### مبحث ثانی

(عکوس قضایا بیاننده در)

عکس ایکی قسمدر که عکس مستوی و عکس نقیضدر



عکس مستوی بر قضیه نك ایجاب و سلبی و صدق و کذب حالی  
اوزره قاله رق موضوعی محمول و محمولی موضوع قیلتمقدر  
یعنی هر قنعی ماده ده اولور سه اولسون اصل قضیه موجبہ ایسه  
ینه موجبہ و سالبہ ایسه ینه سالبہ اولق و صادق ایسه ینه صادق  
و کاذب ایسه ینه کاذب قالمق اوزره موضوعی محمول و محمولی موضوع  
قیلتمقدر .

ایشته اصل قضیه نك بویله تبدیل و تغییر ینه عکس تعبیر اولندیغی  
کی بعضا بو تغییر ایله حاصل اولان قضیه به دخی عکس دنیلور .  
موجبہ کلیه عکس مستوی ایله موجبہ کلیه ینه منعکس اولماز  
زیرا هر انسان حیواندر قضیه سی صادق اولور حالبوکه  
هر حیوان انساندر قضیه سی صادق اولماز

بناء علی ذلک موجبہ کلیه نك عکس مستوی سی موجبہ  
جزئیہ اولور

نته کیم هر انسان حیواندر قضیه سنک عکس مستوی سی  
بعض حیوان انساندر قضیه سیدر

کذلک موجبہ جزئیہ نك عکس مستوی سی دخی موجبہ  
جزئیہ در

نته کیم بعض بیاض انساندر قضیه سی بعض انسان بیاضدر  
قضیه سنه منعکس اولور

و بعض حیوان انساندر قضیه سی بعض انسان حیواندر  
قضیه سنه منعکس اولور

سالبہ کلیه عکس مستوی ایله سالبہ کلیه ینه منعکس اولور  
نته کیم هیچ بر انسان حجر دکدر قضیه سی صادق اولیجق  
عکس مستوی سی اولان هیچ بر حجر انسان دکدر قضیه سی  
دخی صادق اولور

و سالبہ جزئیہ نك لزوما عکس مستوی سی یوقدر

زیرا بعض مواده عکسی صادق اولور ایسه ده بعض مواده صادق  
اولماز

نته کیم بعض انسان حجر دکدر قضیه سی صادق اولدیغی کی بعض  
حجر انسان دکدر قضیه سی دخی صادق اولور ایسه ده بعض حیوان  
انسان دکدر قضیه سی صادق اولدیغی حالده بعض انسان حیوان  
دکدر قضیه سی صادق اولماز .

اهل منطقک نظری ایسه کلیاته منحصر اولدیغندن او یله خصوص  
ماده به اعتبار اتمیوب سالبہ جزئیہ نك عکس مستوی سی یوقدر دیر لر .  
عکس نقیض بر قضیه نك ایجاب و سلبی و صدق و کذب  
کاکان باقی اوله رق موضوعنک نقیضی محمول و محمولنک  
نقیضی موضوع قیلتمقدر

عکس مستویده سالبه لرك حکمی نه ایسه عکس نقیضده  
موجبه لرك حکمی اودر و انده موجبه لرك حکمی نه ایسه  
بونده دخی سالبه لرك حکمی اودر

بناء علی ذلک موجبہ کلیه نك عکس نقیضی موجبہ  
کلیه در . نته کیم هر انسان حیواندر قضیه سنک عکس



نقیضنده هر لا حیوان لا انساندر و بعبارة اخرى هر نه که  
حیوان اولیه انسان دکلدر دنیلور  
و موجبہ جزئیہ نک لزوما عکس نقیضی یوقدر  
و سالبہ کلیہ ایله سالبہ جزئیہ نک عکس نقیضی سالبہ  
جزئیہ اولور .

کرنک عکس مستوی و کرنک عکس نقیض بروجه بالا جلیه لرده جاری  
اولدیغی کی متصلہ لزومیه ده دخی جاری اولور  
نه کیم هر نه زمان کونش طوغش اولور ایسه کوندوز اولور قضیه سنک  
عکس مستویسی بعضاً کوندوز اولور ایسه کونش طوغش اولور  
قضیه سی اولور عکس نقیضنده دخی هر نه زمان کوندوز اولمازسه  
کونش طوغش اولماز دیتلور  
دیگر قضایای شرطیه به کلجه متصلہ اتفاقیه نک مقدم و تالیسی  
بیننده رابطه لزوم و استلزام اولدیغی جهتله بونلرک عکسنده فائده  
یوقدر .  
قضایای منفصله ده ایسه جزلرک یکدیگرینه نسبتله امتیازی اولد-  
یغندن بونلرک عکسند اصلا اعتبار یوقدر .

## باب نائی

(صور اقصیه بیاننده اولوب بش فصلی مشتملدر)

## فصل اول

(قیاسک تعریف و تقسیمی بیاننده در)

انسان بر قضیه بی علی وجه الاذعان بیلک ایستدکده فکر  
ایله بو مقصدینی اکتساب ایلر  
شویله که اول قضیه به مناسب و کندو سنجه معلوم  
و مصدق اولان قضیه لری بولوب یکدیگریله ترکیب و ترتیب  
ایدرك بر دلیل ییار و انکله اول قضیه به علم تصدیقی حاصل  
ایدرك

مثلا سن اهو دیدکاری حیوانی هیچ کورمدیکک حالده  
قیرده آنی کورسه ک طاش یا اغاج یا خود حیوان اولق  
احتمالری خاطریکه کله بیلور فقط آهوسنی کوروبده قاچغه  
باشلادیغی کبی کورر سین که کندو اراده سیله حرکت  
ایدور یعنی کندو کندویه قوشوب کیدیور و بیلور سین که  
کندو کندویه قوشوب کیدن شی حیواندر ایشته بوا یکی  
قضیه بی بریره کتوره رک بر دلیل یاپوب انک بر حیوان  
اولدیغنه حکم ایدر سین .

کذلک فرض ایدم که فرق سکر قیه برنجک قاج غروشه اولدیغی  
بیلورز اما اون ایکی قیه برنجک یتش ایکی غروشه الندیغی بیلورز  
ایشته بو معلوما تمزدن مجهولز اولان عددی استخراج ایده بیلورز  
شویله که اون ایکی نک یتش ایکی نسبتی فرق سکرک مجهول اولان  
عدد نسبتی کی اولدیغی تفکر ایدرك علم حسابده بیان اولنان  
اربعة متناسبه قاعده سیله اون ایکی قیه برنج یتش سکر غروشه  
اولیحق فرق سکر قیه برنجک ایکوز سکسان سکر غروشه اولدیغی  
استخراج ایلرز .



و كذلك یلورز که بر خط مستقیم اوزرینه واقع اولان دیگر بر خط مستقیم ایکی طرفنده کی زاویه لر باقائمه اوله رق یکدیگره مساوی اولور لر و یا خود بری منفرجه اوله رق قائمه دن بیوک و دیگری حاده اوله رق قائمه دن یکون اولور و ایشته بو معلوماتی علم هندسه ده بیان اولندیغی اوزره ترتیب ایدرک بر دلیل یا یوب اندن دیگر بر قضیه استنباط ایلر ز

شویله که ( بر خط مستقیم اوزرینه واقع اولان دیگر بر خط مستقیم اگر عمود ایسه ایکی طرفنده کی زاویه لر قائمه اولور لر و اگر عمود دکل ایسه ایکی طرفنده کی زاویه لرک بری منفرجه اوله رق قائمه دن بیوک و دیگری حاده اوله رق قائمه دن یکون اولور و منفرجه طرفندن بر عمود چیقار دیغمزده انک ایکی طرفنده حادث اولان زاویه قائمه لرک مجموعی اول زاویه منفرجه ایله حاده نک مجموعنه منطبق اولدیغندن بو منفرجه ایله حاده نک مجموعی ایکی قائمه ده مساوی اولور ) دیو ترتیب ایتدیگمز دلیل ایله ثابت اولور که بر خط مستقیم اوزرینه واقع اولان دیگر خط مستقیم ایکی طرفنده کی زاویه لر باقائمه اولور لر و یا خود ایکی قائمه ده مساوی اولور لر .

ایشته انسان دائماً بویله معلومی اولان قضیه لر دن دلیل لر ترتیب ایله هنوز معلوم و مصدق اولیان نتیجه لری اکتساب ایدر علوم و معارف و صنایع دخی بو طریق ایله ترقی ایدوب کیدر بناء علیه علومک زایدی تلاحق افکار ایله در دیر لر بو تفصیلاتدن اکلشله دیغی اوزره بر دلیل ایکی یا خود دها زیاده قضیه لر دن مرکب بر فقره در که انک تصدیقی دیگر بر قضیه نک تصدیقی مستلزم اولور

دلیلک بو وجهله مستلزم اولدیغی قضیه دعوی و مطلوب و نتیجه تسمیه اولور و دلیلک جزری اولان قضیه لرک هر برینه مقدمه دنیلور

دلیلک نتیجه سی مقدمه لرینک احسنه تابعدر مثلاً کلیه ده نسبتله جزئیه و موجبیه نسبتله سالبه اخس اولدیغندن بر دلیلک بر مقدمه سی کلیه و دیگری جزئیه ایسه نتیجه سی جزئیه چیقار و بر مقدمه سی موجبیه و دیگری سالبه ایسه نتیجه سی سالبه چیقار کذلک مقدمه لرک بری یقینی و دیگری ظنی ایسه نتیجه سی ظنی چیقار

دلیل اوج قسمه منقسم اولور شویله که دلیل یا کلی و مطرد اوله رق بالذات نتیجه یی مستلزم اولور یا خود بالذات مستلزم اولیوب بلکه بر یساجی مقدمه واسطه سیله مستلزم اولور و یا خود کلی و قطعی اوله رق مستلزم اولیوب بلکه جزئیت اوزره مستلزم اولور قسم اول قیاسدر که بو بابده مقصد اصلی انک مباحثی اولوب زیاده تفصیلا بیان اولنه جقدر .

قسم ثانی قیاس مساوات دیدک لری دلیل کی و قسم ثالث اماره دلیل لری کی در

قیاس مساوات ایکی قضیه دن مرکب بر دلیلدر که اولکی قضیه نک محمولنک متعلق ایکنجی قضیه ده موضوع اولور و بر مقدمه اجنبیه واسطه سیله نتیجه یی مستلزم اولور

نته کیم (ایکی ایله در دک مجموعی النیه مساویدر النی دخی اوج ایله اوجک مجموعنه مساویدر) دیو ترتیب ایتدیگمز دلیل بر قیاس



مساوات اولوب (ایکی ایله دردک مجموعی اوج ایله اوجک مجموعنه مساویدر) نتیجه سنی مستلزم اولور لکن استلزامی بالذات اولیوب انجق بر یباجی مقدمه نك واسطه سیله در واول مقدمه دخی (هر نه که بر شیئک مساویسنه مساوی اوله اول شیئه مساویدر) قضیه سیدر و مقدمه اجنبیه صادق اولماز ایسه مطلوب حاصل اولماز

نته کیم (انسان جاده مبیاندر جاد دخی حیوانه مبیاندر) دیدیکمزه (انسان حیوانه مبیاندر) نتیجه سی چیقماز زیرا بونک مقدمه اجنبیه سی اولان (بر شیئه مبیانک مبیانی اول شیئه مبیاندر) قضیه سی صادق دکدر

کذلک (ایکی دردک نصفیدر درت دخی سکرک نصفیدر) دیدیکمزه ایکی سکرک نصفی اولق لازم کلز زیرا بر شیئک نصفنک نصفی اول شیئک نصفی دکدر

وکذلک (ایجو حقنک ایچنده در حقه دخی صندوق ایچنده در) کلامن بر قیاس مساوات اولوب (ایجو صندوق ایچنده در) نتیجه سنی مستلزم اولور زیرا بونک مقدمه اجنبیه سی اولان (بر ظرفک ایچنده کی مظروفک ایچنده بولنان شی اول ظرفک ایچنده اولور) قضیه سی صادق فقط بو دخی ظروف خارجیه یه مخصوصدر یوخسه ظرفلرک بری ذهنی اولورسه مقدمه اجنبیه صادق اولماز بو جهته استلزام دخی بولماز نته کیم (اجتماع نقیضین ذهنده موجود در ذهن دخی خارجه موجود در) قضیه لری صادق ایکن نتیجه کاذب اولور دلیلک قسم ثالثندن اولان اماره دلیللرنده استلزام جزئی بولمق حسبیه ظنی مفید اولور لکن علم یقینی حاصل ایتمز

نته کیم قاره بلوطلر یا غمورک یا غمسنه دلیل ایسه ده چوق دفعه تخلف ایتمیکندن مجرد بر ظنی موجب اولور

استقراء ناقص ایله تمثیل دخی دلیلک اشبو قسم ثالثندن معدوددر

استقراء ناقص بر کلینک اکثر جزئیاتی تتبع ایله بر حکم کلی اوزرینه استدلالدر

نته کیم حیوانک انواعی تتبع ایتمیکمزه کوره بورز که انسان و آت و اینک و قیون و سائر معلوم اولان حیوانلرک تمساح دنیلان بالقدر ماعداسی اغزیله بر شی چکنر ایکن هپ آلت چکه سنی اوینادیور اوله ایسه تمساحدن ماعدا حیوانلر هپ آلت چکه سنی اوینادر دیو حکم ایلرز لکن انواع حیوانلک کافه سی کوریلوبده تحقیق واستقصا اولنماش ایدوکنندن بو حکمز ظنی در

اما استقراء تام زیرده بیان اولنه جفی وجهله قیاس مقسم قییلندن اوله رق علم یقینی افاده ایدر

تمثیل ایکی شیئک بر سبیده اشتراک لرینه بناء برنده بر حکم بولندیغندن دیکرینه دخی اول حکمی اثبات ایلمکدر

نته کیم ترکیبده عالم اوطه کییدر یعنی اوطه نصل مرکب ایسه عالم دخی اوله مرکبدر اوطه ایسه حادثدر اوله ایسه عالم دخی حادثدر دیدیکمزه بر دلیل تمثیلی اولور

ایشته بوکا اصطلاح فقهاده قیاس دنیاور اما اهل منطق عندنده مجرد ظنی موجب و قیاس منطقینک تعریفندن خارجدر بز شمدی علم منطقده مقصد اصلی اولان قیاسک تعریف و بیانته کله لم :

قیاس (قضیه لردن مرکب بر دلیللدر که هر نه وقت اول قضیه لر تسلیم اولنور ایسه اندن بالذات بر قضیه دیکر لازم کلور) دیو تعریف اولنور

نته کیم (عالم حادثدر زیرا عالم متغیردر و هر متغیر حادثدر اوله ایسه عالم حادثدر) دیدیکمزه اول (عالم حادثدر)



قضیه سی بر دعوادر و (عالم متغیر در و هر متغیر حادث در)  
قضیه لری ایکی مقدمه و ایکی سنک مجموعی بر قیاسدر  
ایشته بو قیاس تصدیق اولندیغی کبی مطلوب اولان  
(عالم حادث در) نتیجه سنی بالذات مستلزم اولور

دعوی و مطلوب و نتیجه دیدیکمز قضیه قیاسک ایچنده  
مندرج اولور و بو جهتله قیاس ایکی قسمه تقسیم اولور.  
شویله که نتیجه قیاسده اگر یالکز ماده مندرج اولوبده  
صورة یعنی هیئت مجموعه سیله مندرج اولماز ایسه قیاس  
اقترائی تسمیه اولور

ته کیم بالاده ایراد اولنان مثالده نتیجه نک هیئتی بوزیلار ق  
موضوعی اولان عالم اولکی مقدمه ده و محمولی اولان حادث  
ایکنجی مقدمه ده مندرج اولغله قیاس اقترائیدر

واکر نتیجه نک عینی یا خود نقیضی هم ماده و همده صورة  
یعنی هیئتیه قیاسده مندرج اولورسه قیاس استثنائی تسمیه  
قلنور

و نتیجه نک عینی مندرج ایسه استثنائی مستقیم و نقیضی  
مندرج ایسه استثنائی غیر مستقیم دینلور

ته کیم (کوندوز موجود در) دعواسنی اثبات ایچون  
(زیرا هر نه زمان کونش طوغمش اولورسه کوندوز

موجود در لکن کونش طوغمش در) دیدیکمزده بر قیاس  
استثنائی مستقیم اولوب اندن مطلوبمز اولان (کوندوز  
موجود در) نتیجه سی چیقار که هیئتیه قیاسک اولکی  
مقدمه سنده مندرجدر.

و (کونش طوغمش دکدر) دعواسنی اثبات ایچون  
(اگر کونش طوغمش اولیدی کوندوز موجود اولوردی  
حالبو که کوندوز موجود دکدر) دیدیکمزده بر قیاس  
استثنائی غیر مستقیم اولوب اندن مطلوبمز اولان (کونش  
طوغمش دکدر نتیجه سی چیقار که نقیضی کذلک هیئتیه  
قیاسک اولکی مقدمه سنده مندرجدر

قیاس استثنائینک مباحثی آذرر ابتدا آنی بیان ایده ملده بعده  
قیاس اقترائینک تفصیلاتنه کیریشه لم

## فصل یانی

(قیاس استثنائی بیانده در)

قیاس استثنائی ایکی مقدمه دن مرکب اولوب اولکیسی  
دائما قضیه شرطیه اولدیغندن اکا مقدمه شرطیه دینور.  
و ایکنجیسی که اکثر یا لکن یا انجق یا خود حالبو که دیو  
باشلار بر قضیه استثناییه دیمک اولمسیله اکا دخی مقدمه  
استثناییه دینور



مقدمه شرطیه نك موجبه كلیه اولسی و متصله ایسه لزومیه و منفصله ایسه عنادیه اولسی شرطدر زیره موجبه كلیه اولماز ایسه کلی و مطرد اوله رق نتیجه یی مستلزم اولماز قضایای اتفایقه ده ایسه اصلا استلزام یوقدر .

مقدمه استثنایه قیاس استثنائی مستقیمه مقدمه شرطیه نك بر جزئی وضع و اثبات دیمك اولسیله واضعه تسمیه اولنور و قیاس استثنائی غیر مستقیمه مقدمه شرطیه نك بر جزئی رفع و سلب دیمك اولسیله رافعه تسمیه قیلنور و مقدمه شرطیه متصله ایسه مقدمك عیننی استثنا تالینك عیننی و تالینك نقیضنی استثنا مقدمك نقیضنی انتاج ایلر .

نته کیم (هر نه زمان کونش طوغمش اولور سه صفه ضیادار اولق لازم کلور) کلامز که بر مقدمه شرطیه در اكا (لکن کونش طوغمشدر) واضعه سنی ضم ایتدیگمزه اشبو ایکی مقدمه نك مجموعی بر قیاس استثنائی مستقیم اولوب (اوله ایسه صفه ضیاداردر) دیو انتاج ایلر

و اول مقدمه شرطیه (لکن صفه ضیادار دکلدر) رافعه سنی ضم ایتدیگمزه بر قیاس استثنائی غیر مستقیم اولوب (اوله ایسه کونش طوغمش دکلدر) دیو انتاج ایلر

اما مقدمك نقیضنی استثنا تالینك نقیضنی انتاج ایتدیکی

کی تالینك عیننی استثنا دخی مقدمك عیننی انتاج ایلر .  
نته کیم مثال مذکورده (لکن کونش طوغمش دکلدر)  
دنیلسه (صفه ضیادار دکلدر) دیو انتاج ایتدیکی کی  
(صفه ضیاداردر) دنیلدیکی تقدیرده دخی (کونش طوغمشدر) دیو انتاج ایلر .

زیرا متصله لزومیه نك مقدمی ملزوم و تالیسی لازمدر لازم ایسه ملزومه نسبتله اعددر حالبوکه اخصك بولنسی اعمك بولنسی و اعمك بولنسی اخصك بولنماسنی اقتضا ایدر سهده اعمك بولنسی اخصك بولنسی و اخصك بولنماسنی اعمك بولنماسنی اقتضا ایلر  
نته کیم مثال مذکورده کونشك طوغمش صفه نك ضیادار اولسنی و صفه نك ضیادار اولماسنی کونشك طوغمش اولسنی مستلزم اولور اما کونشك طوغمش اولسی صفه نك ضیادار اولماسنی و صفه نك ضیادار اولسی کونشك طوغمش اولسنی مستلزم اولماز زیرا صفه نك قنیدیل ایله دخی ضیادار اولسی محتملدر  
واکر دنیلور سه که تالی مقدمه مساوی اولدقد هر برینك عیننی استثنا دیکرینك عیننی و هر برینك نقیضنی استثنا دیکرینك نقیضنی منج اولور .

نته کیم (هر نه زمان کونش طوغمش اولور سه کوندوز موجود اولق لازم کلور) مقدمه شرطیه سنه (لکن کونش طوغمشدر) واضعه سنی ضم ایتدیگمزه (کوندوز موجوددر) دیو منج اولدیغی کی (لکن کوندوز موجوددر) واضعه سنی ضم ایتدیگمزه دخی (کونش طوغمشدر) نتیجه سنی مستلزم اولور و اول شرطیه (لکن کوندوز موجود دکلدر) رافعه سنی ضم ایتدیگمزه (کونش طوغمش دکلدر) دیو منج اولدیغی کی (لکن کونش طوغمش دکلدر)



رافعه سنی ضم ایتدیکمزه دخی (کوندوز موجود دکدر) نتیجه سنی مستلزم اولور

بوسؤاله جواباً دیرزکه تالینک مقدمه مساوی اولدیغی تقدیرده تالینک عینی استثنا مقدمک عینی مستلزم و مقدمک نقیضی استثنا تالینک نقیضی مستلزم اولسی صورت قیاسدن ناشی و منبعث اولیوب بو استلزام انجق خصوص مادهیه مبتنیدرکه تالینک مقدمدن اعم اولدیغی برلرده بو استلزام بولتماز منطقجه معتبر اولان استلزام ایسه انجق کلی و مطرد اولان استلزام اولوب خصوص مادهیه مبتنی اولان شیلره اعتبار اولتماز

نته کیم محمولک موضوعه مساوی اولدیغی صورتده موجهه کلیه عکس مستوی ایله موجهه کلیهیه منعکس اولور

مثلا (هر انسان ناطقدر) قضیه سنک عکس مستویسی اوله رق (هر ناطق انساندر) قضیه سی صادق اولور

لکن اهل منطق عندنده بویله خصوص مادهیه اعتبار اولدیغندن عکس مستوی بحثنده موجهه کلیه موجهه کلیهیه منعکس اولماز موجهه کلیه نك عکسی موجهه جزئیده درلر برشمعدی قضایای منفصله دن مرکب اولان قیاس استثنائی بحثنه کلهلم

قیاس استثنائینک مقدمه شرطیه سی منفصله اولدیغی صورتده اگر منفصله حقیقیه ایسه ایکی جزئدن برینک عینی استثنا دیکرینک نقیضی انتاج ایتدیکی کی برینک نقیضی استثنا دخی دیکرینک عینی انتاج ایدر بوجهته اندن درت درلو نتیجه انه ییلور .

مثلا (باشو عدد چفت اولور یاخود تک اولور) مقدمه شرطیه سنی تمهید ایتدکدن صکره (لکن چفتدر) دیدیکمزه (اوله ایسه تک دکدر) و (لکن تکدر) دیدیکمزه اوله ایسه (چفت دکدر) و لکن چفت

دکدر) دیدیکمزه (اوله ایسه تکدر) و (لکن تک دکدر دیدیکمزه (اوله ایسه چفتدر) دیو انتاج ایلر .

واکر مانعة الجمع ایسه یالکز ایکی جزدن برینک عینی استثنا دیکرینک نقیضی منتج اولور و اندن انجق ایکی نتیجه انه ییلور مثلا (یاوشی حجردر یاخود بوشی شجردر) مقدمه شرطیه سنی تمهید ایتدکدن صکره (لکن حجردر) دیدیکمزه (اوله ایسه شجر دکدر) و (لکن شجردر) دیدیکمزه (اوله ایسه حجر دکدر) دیو منتج اولور واکر مانعة الخلو ایسه یالکز ایکی جزدن برینک نقیضی استثنا دیکرینک عینی منتج اولور و بوندن دخی انجق ایکی نتیجه انه ییلور مثلا (بوشی لا حجردر یاخود بوشی لا شجردر) دیدکدن صکره (لکن حجردر) دیدیکمزه (اوله ایسه لا شجردر) و (لکن شجردر) دیدیکمزه (اوله ایسه لا حجردر) دیو منتج اولور .

## فصل ثالث

(قیاس اقترائینک اشکال اربعه سی بیاننده در)

مطلوبک موضوعی (حد اصغر) و محمولی (حد اکبر) و قیاسک ایکی مقدمه لرنده تکرر ایدن جزء مشترک (حد اوسط) و حد اصغرک بولندیغی مقدمه (صغری) و حد اکبرک بولندیغی مقدمه (کبری) و بو ایکی مقدمه نك ترکیبندن حاصل اولان هیئت مجموعه (شکل) تسمیه اولور

نته کیم (عالم حادثدر) دعواسنی اثبات ایچون (زیرا عالم متغیردر و هر متغیر حادثدر) دیدیکمزه (عالم) حد



اصغر و (حادث) حد اکبر و (متغیر) حد اوسط و  
عالم (متغیر در) مقدمه سی صغری و (هر متغیر حادث در)  
مقدمه سی کبری و بو ایکی مقدمه نك هیئت ترکیبیه سی  
بر شکل در

اشکال در تدر زیر احد اوسط اگر صغرا ده محمول و کبراده  
موضوع اولور سه شکل اولدر

و اگر ایکی سنده دخی محمول اولور سه شکل ثانیدر

و اگر ایکی سنده دخی موضوع اولور سه شکل ثالثدر

و اگر صغرا ده موضوع و کبراده محمول اولور سه شکل  
رابعدر

نته کیم بالاده مذکور اولان مثالده حد اوسط اولان  
(متغیر) صغرا ده محمول و کبراده موضوع اولمغله شکل  
اولدن بر قیاس اولوب (عالم حادث در) دیو نتیجه ویرر  
(هر انسان حیواندر و هیچ بر طاش حیوان دکدر)  
دیدیکمزده شکل ثانیدن بر قیاس اولوب (هیچ بر انسان  
طاش دکدر) دیو نتیجه ویرر

و (هر انسان حیواندر و هر انسان ناطقدر) دیدیکمزده  
شکل ثالثدن بر قیاس اولوب (بعض حیوان ناطقدر)  
دیو نتیجه ویرر

شکل اولده صغرا نك موجه و کبرانك کلیه اولمی شرطدر

بو شرطه رعایت اولنماز ایسه عقیم اولوب مطرد اوله رق  
نتیجه ویرر

بناء علی ذلک شکل اولک منتج اولان ضربلری یعنی  
نوعلری در تدر

ضرب اول ایکی مقدمه سی دخی موجه کلیه اولوب  
موجه کلیه بی منتج اولور

نته که (هر جسم مرکبدر و هر مرکب حادثدر) دیدیکمزده  
(هر جسم حادثدر) دیو نتیجه ویرر

ضرب ثانی صغراسی موجه کلیه و کبراسی سالبه کلیه  
اولوب سالبه کلیه بی منتج اولور

نته کیم (هر جسم مرکبدر و هیچ بر مرکب قدیم دکدر)  
دیدیکمزده (هیچ بر جسم قدیم دکدر) دیو نتیجه ویرر

ضرب ثالث صغراسی موجه جزئی و کبراسی موجه  
کلیه اولوب موجه جزئی بی منتج اولور

نته که (اجسامك بعضیسی مرکبدر و هر مرکب حادثدر)  
دیدیکمزده (اجسامك بعضیسی حادثدر) دیو نتیجه ویرر

ضرب رابع صغراسی موجه جزئی و کبراسی سالبه کلیه  
اولوب سالبه جزئی بی منتج اولور

نته که (اجسامك بعضیسی مرکبدر و هیچ بر مرکب



قدیم دکلد (دیدیکمزده) اجسامک بعضیسی قدیم  
دکلد دیو نتیجه ویرر

قضیه شخصیه قضیه کلیه حکمده اولوب شکل اولده  
کبری اوله یلور

نته که (شو کلان موسی افندیدر موسی افندی کاتب  
ماهردر) دیدیکمزده (شو کلان کاتب ماهردر) دیو نتیجه  
ویرر

شکل ثانیده دخی ایکی مقدمه سندن برینک موجب و دیگرینک سالبه  
وکبراسنک بهمه حال کلیه اولمی شرطدر  
بناء علی ذلک شکل ثانیث دخی ضروب منجه سی درتدر  
و ضرب اول و ثانسی سالبه کلیه بی و ضرب ثالث و رابعی سالبه جزئییه بی  
انتاج ایدر

مثالری بوجه آتی ترتیب اوزره ذکر اولنور شویله که (هر جسم مرکبدر  
و هیچ بر نفس ناطقه مرکب دکلد) دیدیکمزده (هیچ بر جسم نفس  
ناطقه دکلد) دیو نتیجه ویرر

و (اجسام مولده دن هیچ بری بسیط دکلد و هر قدیم بسیطدر)  
دیدیکمزده (اجسام مولده دن هیچ بری قدیم دکلد) دیو نتیجه ویرر  
و (اجسامک بعضیسی مرکبدر و هیچ بر قدیم مرکب دکلد) دیدیکمزده  
(اجسامک بعضیسی قدیم دکلد) دیو نتیجه ویرر

و (اجسامک بعضیسی بسیط دکلد و هر قدیم بسیطدر) دیدیکمزده  
(اجسامک بعضیسی قدیم دکلد) دیو نتیجه ویرر

شکل ثالثده دخی صغراسنک موجب و ایکی مقدمه سندن برینک  
بهر حال کلیه اولمی شرطدر و ضروب منجه سی التیدر بعضیلری موجب

جزئییه بی و بعضیلری سالبه جزئییه بی منج اولور ارتق بونلری تعداد  
و تفصیل ایله اطناب کلامه حاجت کورلمز

شکل رابعده دخی یا صغراسنک کلیه اولمیله برابر ایکی مقدمه سنک دخی  
موجب اولمی و یا خود ایکی مقدمه سندن بر یسنک کلیه اولمیله برابر  
بر یسنک موجب و دیگرینک سالبه اولمی صورتلرندن بری بولنق  
شرطدر و موجب کلیه بی اصلا منج اولمیوب اکثریا شکل ثالث کی  
یا موجب جزئییه بی و یا خود سالبه جزئییه بی منج اولور فقط بر ضربنده  
یعنی صغراسی سالبه اوله رق ایکی مقدمه سی دخی کلیه اولدیغی صورتده  
سالبه کلیه بی انتاج ایدر

نته کیم (هر بر انسان حجر دکلد و هر ناطق انساندر) دیدیکمزده  
(هیچ بر حجر ناطق دکلد) دیو نتیجه ویرر

الحاصل شکل اولدن محصورات اربعه نک هر بری استنتاج اولنور  
و شکل ثانیدن یالکز سالبه لر و شکل ثالثدن یالکز جزئییه لر و شکل  
رابعدن کذلک جزئییه لر ایله برده سالبه کلیه استنتاج اولنوب اشرف  
محصورات اولان موجب کلیه بی شکل اولدن بشقه هیچ بریسی  
انتاج ایلز

واشبو اشکال اربعه دن کثیر الاستعمال و اصل معیار العلوم شکل  
اولدر زیرا انک ترتیبی نظم طبیعی اوزره در

شویله که محمول بعضا موضوعه مساوی اولور سده اکثریا اندن  
اعدر بوجهتله بر مفهومک بر موضوعه محمول اولمی موضوعه  
شمولی و موضوعک آنده اندراجی دیمک اولور ذهن ایسه مشمولدن  
شامله قولایقله انتقال ایدر و بو طریقله حد اصغری اوسطه وحد  
اوسطی حد اکبره درج ایتدکدن صکره حد اوسطی اره دن طی  
ایتدیکی کی نتیجه واصل اولیور

شکل رابع ایسه شکل اولک طبان طبانه صندی اولدیغی جهته طبعندن  
بک بعیددر



و شکل ثانیته ثالث و رابعه نسبتله استعمالی دهها زیاده در  
و شکل اولك انتاجی بیندر اما دیگر شكلرك انتاجی خفی اولوب شکل  
اوله رد ایله یا خود دیگر دلیلله اثبات اولنور بورالری کتب  
مطوله ده مفصلا مذکوردر بو رساله مزك اوقدر تفصیله تحلی  
یوقدر فقط ایضاح مرام ایچون بعضیلرینی بوراده بیان ایدلم  
شویله که شکل ثانیته ضرب اولنده کبرای مستویا عکس ایتدیگمزه  
شکل اوله رد اولنمش اولور و ضرب ثانیسنده کبرای صغری و صغرانك  
عکس مستویسنی کبری قیلوب بعده نتیجه سنی دخی مستویا عکس  
ایتدیگمزه شکل اولك ضرب ثانیسنه رد ایدلمش اولور  
و شکل ثالثدن بروجه بالا (هر انسان حیواندر و هر ناطق انساندر)  
دیو ایراد ایتدیگمزه مثالده صغرای مستویا عکس ایتدیگمزه شکل  
اولك ضرب ثالثنه رد ایدلمش اولور

و كذلك (هر جسم مرکبدر و بعض جسم حادثدر) دیدیگمزه شکل  
ثالثدن بر قیاس اولوب (بعض مرکب حادثدر) دیو نتیجه ویرر  
بونك صغراسنی کبری و کبراسنك عکس مستویسنی صغری قیلوب  
(بعض حادث جسمدر و هر جسم مرکبدر) دیدیگمزه شکل اولدن بر  
قیاس اوله رق (بعض حادث مرکبدر) دیو نتیجه ویرر و بو نتیجه بی  
مستویا عکس ایتدیگمزه مطلوبمزل اولان (بعض مرکب حادثدر)  
نتیجه سی میدانه چیقار

و شکل رابعدن بروجه بالا (هر انسان حیواندر و هر ناطق انساندر  
اوله ایسه بعض حیوان ناطقدر) دیو ایراد ایتدیگمزه مثالده صغرای  
کبری و کبرای صغری قیلوب (هر ناطق انساندر و هر انسان حیواندر)  
دیدیگمزه شکل اولدن (هر ناطق حیواندر) نتیجه سنی ویرر بو نتیجه نك  
عکس مستویسی ایسه (بعض حیوان ناطقدر) قضیه سی اولور  
ینه شکل رابعدن بروجه بالا (هیچ بر انسان حجر دکلددر) و هر

ناطق انساندر) دیو ایراد ایتدیگمزه مثال که (هیچ بر حجر ناطق دکلددر)  
دیو نتیجه ویرر بونده دخی صغرای کبری و کبرای صغری قیلوب (هر  
ناطق انساندر و هیچ بر انسان حجر دکلددر) دیدیگمزه شکل اوله  
رد اولنهرق (هیچ بر ناطق حجر دکلددر) نتیجه سی حاصل اولوب  
سالبه کلبه ایسه مستویا سالبه کلبه یه منعکس اولدیغندن بو نتیجه بی  
عکس ایتدیگمزه اصل مطلوب اولان (هیچ بر حجر ناطق دکلددر)  
نتیجه سی چیقار

و (هر انسان حیواندر و هیچ بر فرس انسان دکلددر) دیدیگمزه  
شکل رابعدن بر قیاس اولوب (بعض حیوان فرس دکلددر) دیو  
نتیجه ویرر زیرا ایکی مقدمه سنی دخی مستویا عکس ایتدیگمزه  
شکل اولدن (بعض حیوان انساندر و هیچ بر انسان فرس دکلددر)  
قیاسی حصوله کلهرك مذکور نتیجه بی ویرر

بروجه بالا حد اوسط اگر صغرا ده موضوع یا محمول اولورسه قیاس  
متعارف تسمیه اولنور بالاده ایراد اولنان مثالر هب بوقبیلنددر  
واکر موضوع یا محمول اولمیوبده ایکیسندن برینك متعلقاتندن اولورسه  
قیاس غیر متعارف تسمیه اولنور و قیاس متعارف کی بالذات نتیجه بی  
مستلزم اولور و بوندن دخی اشکال اربعه منعقد اولور و هر شکلنده  
بروجه بالا معین اولان شرطلره رعایت اولنمق لازم کلور

که (اینجو محصول صدقدر و هر صدق حیوان بحریدر) دیدیگمزه  
حد اوسط اولان صدق صغرا ده محمول اولیوب انجق محمولك مضاف  
الیهی اوله رق کبراده دخی موضوع اولغله شکل اولدن بر قیاس غیر  
متعارف اولوب (اینجو محصول حیوان بحریدر) دیو نتیجه ویرر  
كذلك (ولی اغا موسی افندیك اوغلیدر موسی افندی بر کاتب  
ماهردر) دیدیگمزه حد اوسط اولان موسی افندی صغرا ده محمولك



مضاف البهی و کبراده موضوع اولغله شکل اولدن برقیاس غیر متعارف اولوب (ولی اغا برکاتب ماهرک اوغلیدر) دیو نتیجه ویرر و (اینجو محصول صدقدر و هیچ بر حیوان بری صدق دکلدر) دیدیکمزده حد اوسط اولان صدق صغراده محمولک مضاف البهی و کبراده نفس محمول اولغله شکل ثانیدن برقیاس غیر متعارف اولوب (اینجو محصول حیوان بری دکلدر) دیو نتیجه ویرر سائر شکلر دخی بونلره قیاس اولنه

معلوم اوله که قیاس غیر متعارفده صغری ایله کبرانک محموللری متحد اولدیغی صورتده قیاس مساوات هیئتته کبروب اندن ایکی درلو نتیجه النور .

شویله که محموللرک ایکسی دخی نتیجهده اثبات اولنور السه قیاس غیر متعارف اولوب بالذات نتیجهی مستلزم اولور واکر محموللرک بریسی اسقاط اولنهرق نتیجه النور ایسه قیاس مساوات اولهرق بالذات نتیجهی مستلزم اولیوب بلکه بالاده بیان اولندیغی اوزره نتیجه سنک صادق اولسی مقدمه اجنبیه نک صادق اولسنه منوطدر .

مثلا (ایکی ایله دردک مجموعی اوج ایله اوجک مجموعنه مساویدر و اوج ایله اوجک مجموعی التیه مساویدر) دیدیکمزده (ایکی ایله دردک مجموعی التینک مساویسنه مساویدر) نتیجهی بالذات لازم کلوب بواعتباره کوره قیاس غیر متعارف اولور واکر (ایکی ایله دردک مجموعی التیه مساویدر) نتیجهی النور ایسه قیاس مساوات اولوب بو نتیجهی انجق مقدمه اجنبیه واسطه سیله مستلزم اولور و مقدمه اجنبیه سی (برشیئه مساوینک مساویسی اول شیئه مساویدر) قضیه سی اولوب بوایه صادق اولدیغندن مذکور نتیجه دخی صادقدر .

کذلک (ایکی دردک یاریسیدر و درت سکرک یاریسیدر) دیدیکمزده بالذات (ایکی سکرک یاریسنک یاریسیدر) دیو نتیجه ویرر قیاس

متعارف اولور واکر (ایکی سکرک یاریسیدر) دیو نتیجه النور ایسه قیاس مساوات اولور و یارمک یاریسی ربع اولق حسبیه بوقیاس مساواتک مقدمه اجنبیه سی اولان (یارمک یاریسی یارمدر) قضیه سی صادق اولدیغندن اول نتیجه دخی صادق اولماز تمثیل دخی بوجهله درکه ادات تشبیه ایله برابر نتیجه النورسه قیاس غیر متعارف اولور واکر ادات تشبیه طی اولنهرق نتیجه النورسه دلیل تمثیلی اولور

نته کیم (عالم اوطه کبیدر و اوطه ایسه حادثدر اوله ایسه عالم حادث کبیدر) دنیلورسه قیاس غیر متعارف اولور واکر اوله ایسه عالم حادثدر) دیو نتیجه النورسه ظنی مقید اولان دلیل تمثیلی قبیلندن اولور .

قیاس اقترانی بروجیه بالا یالکز حلیه لردن ترکیب ایدرسه اقترانی حلی تسمیه اولنور

واکر یالکز شرطیه لردن یاخود حلیه ایله شرطیه لردن ترکیب ایدرسه اقترانی شرطی تسمیه قلمور اقترانی حلی بالاده بر تفصیل بیان اولندی اقترانی شرطی دخی فصل آتیده بیان ایدیه جکدر

## فصل ابع

(اقترانی شرطی بیاننده در)

اقترانی شرطی یا ایکی متصله دن و یا ایکی منفصله دن یاخود متصله ایله حلیه دن و یاخود منفصله ایله حلیه دن و یاخود



متصله ایله منفصله دن ترکیب ایدر بوجهته اقترانی شرطی  
بش قسمه منقسم اولور

قسم اول که ایکی متصله دن ترکیب ایدر بونده اقترانی حلی  
کی اشکال اربعه منعقد اولور

شویله که حد اوسط اکر صغرا ده تالی و کبراده مقدم اولور سه  
شکل اول و اکر ایکی سنده دخی تالی اولور سه شکل ثانی  
و اکر ایکی سنده دخی مقدم اولور سه شکل ثالث و اکر  
صغرا ده مقدم و کبراده تالی اولور سه شکل رابعدر نه که  
(هر نه زمان کونش طوغار سه کوندوز اولور و هر نه زمان  
کوندوز اولور سه ایدینلق اولور) دیدیکمزده شکل  
اولدن بر قیاس شرطی اولوب (اوله ایسه هر نه زمان  
کونش طوغار سه ایدینلق اولور) دیو نتیجه ویرر

و (هر نه زمان صغه ایدینلق اولور سه کوندوز اولور  
دکدر و هر نه زمان کونش طوغش اولور سه کوندوز  
اولور اوله ایسه هر نه زمان صغه ایدینلق اولور سه کونش  
طوغش اولور دکدر) دیدیکمزده شکل ثانیدن بر قیاس  
اقترانی شرطی اولور

و (هر نه زمان کونش طوغار سه صغه ضیادار اولور  
و هر نه زمان کونش طوغار سه کوندوز اولور اوله ایسه

بعضاً صغه ضیادار اولور سه کوندوز اولور) دیدیکمزده  
شکل ثالثدن اولور

و (هر نه زمان کونش طوغار سه صغه ضیادار اولور  
و کوندوز اولور سه کونش طوغش اولور اوله ایسه  
بعضاً صغه ضیادار اولور سه کونش طوغش اولور)  
دیدیکمزده شکل رابعدن اولور

قسم ثانی که ایکی منفصله دن ترکیب ایدر ایکی مقدمه سندن  
برینک کلیه و هر برینک موجب اولسی و ایکی سندن دخی  
یا منفصله حقیقیه یا خود مانعة الخلو اولملری شرطدر.

نه که (یا عدد تک اولور یا خود عدد چفت اولور یا چفت  
دخی تک قسمله منقسم اولور یا خود چفت قسمله منقسم  
اولور) دیدیکمزده (یا عدد تک اولور یا خود تک قسمله  
منقسم اولور و یا خود چفت قسمله منقسم اولور) دیو  
نتیجه ویرر.

اشبو قسم ثانیده مقدم و تالینک جزلری تکرر ایدوب بوجهله  
اشکال اربعه منعقد اولور و حلیله لر بیننده معتبر اولان شرطلر  
بوجز مشترک لر بیننده ارا نور.

قسم ثالث که متصله ایله حلیله دن ترکیب ایدر بونده متصله  
صغری و حلیله کبری اولوب تکرر و مشارکت دخی



صغرانك تالیسیله کبری بیننده بولنده رق اشکال اربعه منعقد  
اولور و برقضیه شرطیه بی انتاج ایدر

نته که (هر نه زمان برشی مرکب اولور سه متغیر اولور  
و هر متغیر حادثدر) دیدیکمزده شکل اولدن برقیاس شرطی  
اولوب (هر نه زمان برشی مرکب اولور سه حادث اولور)  
دیو نتیجه ویرر .

و (هر نه زمان برشی جسم اولور سه متغیردر و هیچ بر متغیر قدیم  
دکدر) دیدیکمزده شکل ثانیدن برقیاس شرطی اولوب هر نه زمان  
برشی جسم اولور سه قدیم دکدر) دیو نتیجه ویرر . دیگر شکلر  
دخی بولنه قیاس اولنه .

قسم رابع که منفصله ایله جلیه دن ترکیب ایدر بونده اکر  
جلیه نك عددی اجزاء منفصله نك عددینه کوره اولدیغی  
حالده اشبو جلیه لرك محموللری دخی متحد اولور سه  
برقضیه جلیه بی منتج اولور ایشته بوکا قیاس مقسم دنیلور  
بونده منفصله نك موجب کلیه اولسیله برابر یا حقیقیه و یا خود  
مانعه الخلو اولسی دخی شرطدر

نته که (موالید یا معدن اولور و یا نبات اولور و یا خود  
حیوان اولور معدن ایسه مرکبدر نبات دخی مرکبدر  
حیوان دخی مرکبدر) دیدیکمزده منفصله ایله جلیه دن

مرکب بر قیاس شرطی اولوب (موالید مرکبدر) دیو  
نتیجه ویرر .

مرویدر که بر تاریخده دشمن قارشوسنده بولنان براردوی انسرین  
دشمن باصغله نوبتی بولنان قره غوللرک محاکه سنده کندولرینه  
(اگر نوبت بکلیور ایدیه کز نیچون اردویه خبر ویرمدیکز واکر  
بکله میور ایدیه کز نیچون قانونه مخالف حرکت ابلدیکز ایکی  
صورنده دخی قورشونه دیزلمکه مستحقدر) دیو اول قره غوللرک  
قورشونه دیزلمرینه حکم اولمشدر

ایشته بو محاکه بر قیاس مقسمدر تصویرری بو وجهله در که (یا بوقره -  
غوللر دشمنک حرکتی اردویه خبر ویرماملردر یا خود نوبت  
بکله میوبده قانونه مخالف حرکت ایشلردر دشمنک حرکتی اردویه  
خبر ویرمیان قره غول ایسه قورشونه دیزلمکه مستحقدر نوبت  
بکله میوبده قانونه مخالف حرکت ایدن هر قره غول دخی قورشونه  
دیزلمکه مستحقدر ایله ایسه بوقره غوللر قورشونه دیزلمکه  
مستحقدر) .

واکر جلیه لرك محموللری مختلف اولور ایسه نتیجه سی  
شرطیه منفصله اولور

نته که (موالید یا معدن اولور و یا نبات اولور و یا خود  
حیوان اولور معدن ایسه جهاددر نبات دخی نامیدر  
حیوان دخی حساسدر) دیدیکمزده (موالید یا جهاد اولور  
یا خود نامی اولور و یا خود حساس اولور) دیو نتیجه  
ویرر .



واکر حلیه نك عددی اجزاء منفصله نك عددن اقل اولور  
ایسه كذلك منفصله بی انتاج ایدر

نته که (موالید یا معدن اولور و یانبات اولور و یا خود  
حیوان اولور حیوان ایسه حساسدر) دیدیکم زده (موالید  
یا معدن اولور و یانبات اولور و یا خود حساس اولور)  
دیو نتیجه ویرر .

كذلك (موالید یا معدن اولور و یانبات اولور و یا خود حیوان اولور  
معدن ایسه جاددر نبات دخی نامیدر) دیدیکم زده (موالید یا جاد  
اولور و یا نامی اولور و یا خود حیوان اولور) دیو نتیجه ویرر .  
قسم خامس که متصله ایله منفصله دن ترکیب ایدر صغراسی  
متصله و کبراسی منفصله موجب اولدیغی حالده جزء  
مشترك مکرر اکر برنده مقدم و دیگرنده تالی اولور ایسه  
نتیجه سی منفصله اولور و اکر جزء مشترك مقدم و یا تالینك  
جزئی اولور سه نتیجه سی متصله اولور .

نته که (هر نه وقت اولور سه اولسون عالم حادث ایسه موجدی  
فاعل مختار اولمق لازم کلور و عالمك موجدی یا فاعل مختار اولور یا خود  
فاعل موجب اولور) دیدیکم زده (یا عالم حادث اولور یا خود موجدی  
فاعل مختار اولور) دیو نتیجه ویرر

و (هر نه وقت عالم متغیر ایسه حادثدر حالبوکه دائماً یا هر حادث  
ممکن اولور یا خود واجب اولمیان واجب اولور) دیدیکم زده (هر نه  
وقت عالم متغیر ایسه دائماً یا عالم ممکن اولور یا خود واجب اولمیان  
واجب اولور) دیو نتیجه ویرر .

## فصل خامس

(قیاس مرکب بیاننده در)

قیاس اکر یالکز ایکی مقدمه دن مرکب اولور سه قیاس  
بسیط تسمیه اولنور .

نته که بالاده امثله کثیره سی مرور ایلدی .  
واکر ایکی دن زیاده مقدمه لر دن مرکب اولور ایسه قیاس  
مرکب تسمیه اولنور و موصول النتائج و مفصول النتائج  
دیو ایکی قسمه تقسیم اولنور

شویله که اکر هر قیاس بسیطك نتیجه سی تصریح اولنهرق  
کند و سنه وصل ایله دیگر بر قیاس بسیط حاصل  
اولمق ایچون دیگر مقدمه یه ضم اولنور سه موصول  
النتایج دنیلور و اکر بسائطك بعضیلر دن نتیجه سی  
فصل اولنور ایسه مفصول النتائج دنیلور

مثلاً (شو قرالتی جسمدر) دعواسنی اثبات ایچون (زیرا  
شو قرالتی انساندر و هر انسان حیواندر او یله ایسه  
شو قرالتی حیواندر) دنیلد کدنصکره (شو قرالتی حیواندر  
و هر حیوان جسمدر او یله ایسه شو قرالتی جسمدر  
دنیلد کده موصول النتائج قبیله دن اولور



واکر (شو قرالتی انساندر وهر انسان حیواندر  
وهر حیوان جسمدر اویله ایسه شو قرالتی جسمدر)  
دنیلور ایسه مفصول النتائج قبیلندن اولور .

بالاده بیان اولنان قیاس مقسم مفصول النتائج قبیلندن اولوب استقراء  
تام دخی قیاس مقسمک بر قسمیدر

مثلا (عنصر یا انش ویا هوا یا خود صو ویا خود طویر اقدر آتش  
ایسه جوهردر هوا دخی جوهردر صوده جوهردر طویر اقد  
جوهردر اویله ایسه عنصر جوهردر) کلامن استقراء تام اوله رق بر  
قیاس مقسمدر

قیاس مرکبک بر قسمی دخی قیاس خلفیدر

قیاس خلفی بر قیاس اقترانی ایله بر قیاس استثنائی غیر مستقیمدن ترکیب  
ایدر ومطلوبک نقیضنی ابطال ایله مطلوبی اثبات ایله

مثلا (بر شی کنندینی یوقدن وار ایده مز) مسئله سنی اثبات ایچون (اگر  
بو قضیه صادق اولسه نقیضی صادق اولور یعنی بر شی کنندینی  
یوقدن وار ایده یلور و بر شی کنندینی یوقدن وار ایسه اولجه  
موجود یعنی یوق ایکن وار اولسی لازم کلور) چونکه یوق ایکن بر  
شیئک اجر اسنه مقتدر اوله میه جغی بدیدر (اویله ایسه مطلوبیمز  
اولان مسئله مذکوره صادق اولسه بر شی یوق ایکن وار اولسی  
لازم کلور) دیو نتیجه ویرر بو نتیجه بی شرطیه قیلوب تالیسنک  
نقیضنی استثنا ایتدیکمزده شویله که (مطلوبیمز اولان مسئله صادق  
اولسه بر شی یوق ایکن وار اولسی لازم کلور بو ایسه خلفدر  
یعنی باطلدر) دیدیکمزده (اویله ایسه مطلوبیمز اولان مسئله  
صادقدر) دیو نتیجه ویرر

## باب ثالث

(موجهاته دائر اولوب ایکی فصلی مشتملدر)

### فصل اول

(جهات قضایا حقنده اولوب ایکی مقصدی حاویدر)

#### مقصد اول

(قضایای موجهه بیاننده در)

بر قضیه نك موضوع و محمولی بعض قیود ایله تقيید  
اولندقدده اول قضیه نك صدق قیدلرینك دخی صحنه  
توقف ایدر .

مثلا (موسی افندیك اوغلی دون تیمور یولی ایله ادر نه دن  
کلدی) دنیلدکده اگر کلان موسی افندیك اوغلی  
اولمیوبده بکر افندیك اوغلی ایسه ویا خود موسی افندیك  
اوغلی اولوبده بر کون اول کلش ویا خود تیمور یولی ایله  
کلیوبده بحرأ واپور ایله کلش ویا خود تیمور یولی ایله  
چورلیدن کلش اولسه قضیه صادق اولماز  
وبعضا قضیه نك متضمن اولدیغی نسبت خبریه دخی



بر قید ایلہ تقیید اولنور و قضیه نك صدق اول قیدك دخی  
صحیح اولسنه متوقف اولور ایشته اول قیده جهت قضیه  
دنیلور.

متقدمینه کوره جهت قضیه نسبت ایجابیه نك بر حال و کیفیتی اوله رق  
اوجه منحصر در یعنی وجوب و امتناع و امکاندر  
مثلا باری تعالی حضرتلری نك وجودی واجبدر یعنی ذاتی وجودینی  
اقتضا ایدر و شریك الباری نك وجودی ممتنعدر یعنی محالدر که کندو  
کندوسنك خارجده موجود اولماسنی اقتضا ایدر و مخلوقاتك وجودی  
ممکندر که ممتنع اولسه لر وجوده کله مزلدی و ذاتلری وجودلری  
اقتضا ایتموب عدملرندن بر امر محال لازم کلدیکی جهتله وجودلری  
واجب دخی دکلدر كذلك عنقائك وجودی ممکندر که واجب اولسه  
هر وقت موجود اولسی لازم کلوردی و موجود اولسه اندن بر  
محال لازم کلبه جکندن ممتنع دخی دکلدر  
و كذلك اشك صیحا اولسی واجب و صوغوق اولسی ممتنعدر اما  
سونمی ممکندر

وجوب ضرورت دیمکدر یعنی بر شیئك ضروری اولسیدر  
ضرورت اگر ذات موضوعدن نشئت ایدرسه وجوب ذاتی دنیلور  
نته که (الله تعالی حضرتلری بالضروره دیریدر و هر شیئی عالمدر)  
دنیلدکده بو حکمك ضرورتی وجوب ذاتیدر یعنی الله تعالی نك ذاتندن  
ناشیدر زیرا الله تعالی حضرتلری واجب الوجود اولوب عدمی محالدر  
یعنی امکانسزدر و ذاتی بو صفتلری موجبدر و ضرورت اگر ذات  
موضوعدن نشأت ایلش اولمازایسه وجوب بالغیر دنیلور کرك ضرورت  
ذاتیه اولسون و کرك ضرورت وصفیه و یاخود ضرورت وقتییه  
اولسون

مثلا انسان موجود اولدقجه ناطق اولسی ضرورت ذاتیه و یازو  
یازار ایکن پارمقلمینك متحرک اولسی ضرورت وصفیه و قرك وقت  
حیلولنده منخسف اولسی ضرورت وقتییه در

ایشته ضرورتك بو اوج قسمی دخی وجوب بالغیردر وجوب ذاتی  
دکلدر زیرا انسان و قرك وجودلری واجب دکلدر که حتی انلره بر  
وصفك ثبوتی واجب بالذات اوله بلسون

امکان بر شی کندو وجود و عدمی مقتضی اولماق دیمك اوله رق ایکی  
قسمه منقسمدر قسم اول امکان خاص و قسم ثانی امکان عامدر  
امکان خاص ایکی طرفدن یعنی هم وجود و همده عدم طرفندن  
ضرورتی سلب ایتمکدر

(انسان کانبدر) دیدیکمز کی که انسانك کرك کانب اولسی و کرك  
کانب اولماسی کندو سجه بر امر ضروری دکلدر

امکان عام یالکز بر طرفدن ضرورتی سلیدر  
نته کیم (هراتش صیحا قدر) دیدیکمز ده هر آتشك صیحا اولماسنده  
ضرورت اولمدیغی اکلاشیلور والا هیچ بر آتش صیحا اولماق لازم  
کلور اما صیحا اولمسنده ضرورت اولوب اولمدیغی مسکوت عنه  
قالور و فی نفس الامر صیحا قلق آتسه نسبتله ضروریدر

الحاصل متقدمینه کوره جهت قضیه وجوب و امتناع و امکاندن  
عبارتدر و اوجی دخی نسبت ایجابیه نك قیدیدر

اما متأخرینه کوره جهت قضیه کرك نسبت ایجابیه نك و کرك نسبت  
سلبیه نك حال و کیفیتی اوله رق حصر و تعداد اولنه ماز فقط موجهات  
دیو بینلرنده مشهور و موضوع بحث اولان بر طاقم قضایای موجهه  
اولغله بوراده انلرك بیاننه مبادرت اولنور

موجهات مشهوره ایکی قسمدر قسم اول موجهات بسیطه و قسم ثانی  
موجهات مرکبه در



موجهات بسیطه سگزدر یعنی ضروریه مطلقه و مشروطه عامه و وقتیّه مطلقه و منتشره مطلقه و دائمه مطلقه و عرفیه عامه و مطلقه عامه و ممکنه عامه در

موجهات مرکبه بدیدر یعنی مشروطه خاصه و عرفیه خاصه و وقتیّه و منتشره و وجودیه لادائمه و وجودیه لاضروریه و ممکنه خاصه در چونکه اصل جهت قضیه ضرورت و دوام و فعل و امکان از ارباب ایسته بونلردن مذکور اون بش موجهه تولد ایدر

شویله که ذات موضوع موجود اولدقجه نسبت تامه خبریه نك ضروریه رتیه حکم اولنور ایسه ضروریه مطلقه تسمیه اولنور نته که (هر انسان موجود اولدقجه بالضروره حیواندر) یاخود (هیچ بر انسان موجود اولدقجه بالضروره فرس دکلدر) دنیلور واکر وصف موضوع دائم اولدقجه نسبت تامه خبریه نك ضروریه حکم اولنور سه مشروطه عامه تسمیه اولنور

ننه که (هر کاتب مادام که کاتبدر یعنی کتابت ایدر کن بالضروره پارمقلری متحرکدر) یاخود (بر کاتب مادام که کاتبدر بالضروره پارمقلری ساکن دکلدر) دنیلور

واکر وقت معینده نسبت تامه خبریه نك ضروریه حکم اولنور سه وقتیّه مطلقه دنیلور

ننه که (وقت حیلولنده بالضروره فرس منخسفدر یاخود بالضروره منور دکلدر) دنیلدیکی کی

واکر معین اولیان بر وقتده نسبت تامه خبریه نك ضروریه حکم اولنور سه منتشره مطلقه دنیلور

ننه که (کونلردن بر کون بالضروره فرس منخسف اولور یاخود بالضروره منور اولماز) دنیلدیکی کی

واکر ذات موضوع موجود اولدقجه نسبت تامه خبریه نك دوامیه حکم اولنور سه دائمه مطلقه تسمیه اولنور نته که (هر انسان موجود اولدقجه دائما حیواندر یاخود دائما فرس دکلدر) دنیلور

واکر وصف موضوع دائم اولدقجه نسبت تامه خبریه نك دوامیه حکم اولنور سه عرفیه عامه تسمیه اولنور نته که (هر کاتب مادام کاتبدر دائما پارمقلری متحرکدر یاخود دائما پارمقلری ساکن دکلدر) دنیلور

واکر نسبت تامه خبریه نك فعلیتی ایله یعنی ولوکه بر دفعه اولسون فعله جیقمسویه حکم اولنور سه مطلقه عامه تسمیه اولنور نته که (هر کوکرجین بالفعل طائردر و هیچ بر عنقا بالفعل طائر دکلدر) دنیلور

کذلک فلان کیمسه فریضه حجی ادا ابتدی یاخود ایتدی دنیلدیکه مطلقه عامه اولور

اگر نسبت تامه خبریه نك امکانیه یعنی اول نسبتیه مخالف اولان طرفدن ضرورت ذاتیه نك سلبیه حکم اولنور ایسه ممکنه عامه تسمیه اولنور

ننه کیم (امکان عام ایله هر انش صیقاقدر یاخود هیچ بر آتش صوغوق دکلدر) دنیلدیکی کی

شوراسی معلومک اولسونکه (امکان عام ایله) عباره سی اگر نسبتن قیدی اولور سه اول حالده قضیه ممکنه اولور اما اگر محمولک قیدی اولور سه قضیه مطلقه اولور و ضروریه مطلقه ضمننده تحقیق ایده یلور

مثلا امکان عام ایله نسبتی تقیید ایدرک (امکان عام ایله هر انسان کاتبدر) دیدیکم زده ممکنه عامه اولور اما امکان عام ایله کتابتی تقیید



ایدرك (هر انسان امکان عام ایله کاتبدر) دیدیکم زده قضیه مطلقه اولور و ضروریه مطلقه ضمننده تحقق ایلر زیرا انسانه کوره بالفعل کتابت ضروری دکل ایسه ده انسان موجود اولدقجه کاتب اوله بیلمسی امر ضروریدر

ایشته اهل منطق عندنده مشهور اولان بسائط ثمانیه اشبو سکرز قضیه موجهه دن عبارتدر کله شمدی مرکباته

بعضا لادوام ذاتی ایله مشروطه عامه تقیید اولنه رق مشروطه خاصه تسمیه اولنور و بعضا عرفیه عامه تقیید اولنه رق عرفیه خاصه تسمیه قلنور

مثلا (هر کاتب مادامکه کاتبدر بالضروره پارمقلری متحرکدر لکن بحسب الذات دائما دکل) دیلدکده مشروطه خاصه اولور وبالضروره یرینه دائما دیلور ایسه عرفیه خاصه اولور

ولادوام ذاتی ایله بعضا وقتییه مطلقه تقیید اولنه رق وقتییه تسمیه اولنور و بعضا منتشره مطلقه تقیید اولنه رق منتشره تسمیه قلنور و بعضا مطلقه عامه تقیید اولنه رق وجودیه لادائمه دیلور

مثلا (وقت حیلولتده بالضروره قر مخسفر لکن دائما وبالذات دکل) دیلدکده وقتییه اولور و (برکون بالضروره قر مخسفر اولور لکن دوام ذاتی ایله دکل) دیلدکده وجودیه لادائمه اولور

و بعضا لاضرورت ذاتیه ایله مطلقه عامه تقیید اولنه رق وجودیه لاضروریه تسمیه اولنور و بعضا ممکنه عامه تقیید اولنه رق ممکنه خاصه تسمیه قلنور

مثلا (بالفعل هر حیوان متنفسدر لکن ضرورت ذاتیه ایله دکل) دیلدکده وجودیه لاضروریه اولور و (امکان عام ایله هر حیوان متنفسدر لکن ضرورت ذاتیه ایله دکل) دیلدکده ممکنه خاصه اولور

و بعضا ممکنه خاصه ده امکان خاص تعبیریه اکتفا قیلنور زیرا امکان خاص ایکی طرفدن دخی ضرورت ذاتیه بی سلب دیمکدر نه کیم (امکان خاص ایله هر انسان کاتبدر) دیلدکده ممکنه خاصه اولور که انسانک کاتب اولماسنده ضرورت ذاتیه یوق دیمک اولور

ایشته بوموجهات سبعه ده مرکبات دیلور که لفظا برر قضیه ایسه لرده معنی ایکیشر حکمی متضمن اولور لر و بوحکم لکری بری ایجاب و دیکری سلبدر زیرا لادوام مطلقه عامه ده ولاضرورت ممکنه عامه ده اشارتدر

بناء علیه مشروطه خاصه موجهه بر مشروطه عامه موجهه ایله برده مطلقه عامه سالبه دن و ممکنه خاصه ایکی ممکنه عامه دن مرکب اولور

ایشته متطقیلر بیننده مشهور اولان موجهات بالاده بیان اولنان اون بش قضیه موجهه در که سکرزی بسیط ویدیسی مرکبدر و بعضا موضوعک بعض اوقاتنده نسبتک فعلیتی ایله حکم اولنوب حینیه مطلقه تسمیه اولنور و بوکا لادوام ذاتی الحاق اولنور ایسه حینیه لادائمه دیلور ودها بونلرکی برطاقم موجهات واردر لکن شهرت لری اولمدیغندن بورساله مختصره ده انلرک تفصیلاتیه اطناب مقاله حاجت کورلمز

### سؤال

قضایای موجهه قضیه مطلقه نک اقسامیدر قضیه نک معنای ایسه نسبتک وقوعی یاخود لاوقوعی ایله حکم ایتمکدن عبارتدر یعنی دوزجه فلان شی نفس الامرده شویله در یاخود شویله دکلدر و یاخود بویله اولور یا اولماز دیو حکم ایتمکدر حالبوکه فعلیتک معنای



دخی بودر بوندن بشقه برشی دکدر شو حاله کورء موجهاتک  
اقسامندن معدود اولان مطلقه عامه حقیقت حاله مقسمن اولان  
قضیه مطلقه نك عینی اولق لازم کلور

### جواب

اوت مطلقه عامه معنی بر قضیه مطلقه در فقط لفظا بالفعل دیو  
تقیید و مضمونی صراحة تأیید اولنق ملابسده سیله موجهاتدن معدود  
اولور

### سؤال

اویله ایسه مطلقه عامه نك قسیمی اولان ممکنه نك قضیه اولماسی لازم  
کلور زیرا انده فعلیت اولدیغندن حکم دخی بولنماز

### جواب

اوت ممکنه ده حکم یوقدر فقط جهتی اولان امکان بر حکمی متضمن  
اولور زیرا موضوع ایله محمول بیتنده کی نسبتک ضروری اولدیغنی  
افاده ایدر و بوجهتله قضایادن معدود اولور

### مقصد ثانی

(موجهاتک احکامی بیانده در)

ایکی قضیه مطلقه بیتنده تناقضک تحقیق ایچون لازم کلان  
شرطلر مقالہ ثانیه دن باب اولک فصل رابعنده بیان  
اولمشیدی

موجهاتده اول شرطلردن بشقه ایکی قضیه نك جهتده  
مختلف اوللری دخی شرطدر

زیرا هر شیئک نقیض حقیقیسی اول شیئک رفعیدر یعنی  
(فلان شی بویله در) قضیه سنك نقیضی (بویله دکدر)  
قضیه سیدر \*

امکان عام ایسه حکمه مخالف اولان طرفدن ضرورت ذاتیه بی سلب  
دیمکدر

بناء علیه ضروریه مطلقه نك نقیض ممکنه عامه در ودائمه مطلقه نك  
نقیضی مطلقه عامه در سائرلری دخی انلره قیاس اولنه  
موجهاتک عکسلینه کلجه موجه لرنده ضروریه مطلقه ودائمه  
مطلقه و مشروطه عامه و عرفیه عامه مستویا حینییه مطلقه به  
منعکس اولور

مثلا (هر انسان موجود اولدجه بالضروره یاخود دائما حیواندر)  
دیدیکم زده عکس مستویسی (حیوانک بعضیسی حیوان اولدیغنی  
حینده انساندر) قضیه سی اولور که حینییه مطلقه در دیگرلرینک  
مثاللری دخی بوکا قیاس ایله استخراج اولنور

ینه موجه لرده مشروطه خاصه ایله عرفیه خاصه متساویا حینییه  
لادائمه به و مطلقه عامه ایله وقتیه لر و وجودیه لر مستویا مطلقه عامه به  
منعکس اولور

مقصد اولده مذکور اولان اون بش قضیه موجهه نك سالبه  
کلیه لرنده بر طاقی مستویا منعکس اولور و بر طاقی منعکس اولماز  
وسالبه جزیه لرک عکس مستویسی اولمیوب انجق مشروطه  
خاصه سی ایله عرفیه خاصه سی عرفیه خاصه به منعکس اولور



عکس نقیض ایه عکس مستوینک ضدینه در یعنی عکس مستویده  
موجبہ لرك حالی نہ ایه عکس نقیضده سالبہ لرك حالی اولوجہلہ در  
وعکس مستویده سالبہ لرك حالی نہ ایه عکس نقیضده دخی  
موجبہ لرك حالی اولوجہلہ در بوجہلرك تفصیلاتی مطولانده در.

## فصل ثانی

(مخلطات بیانده در)

موجہاتک یکدیگریلہ ترکیبندن حاصل اولان قیاسلرہ  
مخلطات دنیلور .

شکل اولک بحسب الجهة شرطی صغراضنک فعلیتیدر یعنی ممکنہ  
اولیوبیده یا مطلقہ عامہ ویاخوداندن اخص اولان دیگر اون ایکی  
موجہلردن بری اولقدردر

وقیاسک کبراسی وصفیات اربعہدن یعنی ایکی مشروطہ ایلہ ایکی  
عرفیہدن بشقہ بر موجہ اولور ایه نتیجہ سی جہتہ عینیلہ کبری  
کیبدر

مثلا (بالضرورہ ہر انسان موجود اولدجہ حیواندر ودائما ہر حیوان  
موجود اولدجہ متنفسدر) دیدیکمزده شکل اولدن صغراسی  
ضروریہ مطلقہ وکبراسی دائمہ مطلقہ اولہرق بر قیاس مخلطہ  
اولور کہ دائمہ مطلقہ اولہرق (دائما ہر انسان موجود اولدجہ  
متنفس اولور) دیو نتیجہ ویرر

اگر قیاسک کبراسی وصفیات اربعہدن بریسی اولور سہ نتیجہ سی  
جہتہ صغری کیبدر

شوقدر کہ اگر صغرا وجودیہ لاضروریہ ایه نتیجہده لاضرورت

قیدی حذف اولنہرق مطلقہ عامہ اولور وپردہ صغراہ ضرورت  
یاخود لادوام اولوبده کبرادہ بوقیدلر بولتماز ایه انلر دخی نتیجہده  
حذف اولنور  
دیگر اشکال ثلثہنک دخی بحسب الجهة شرائط مخصوصہ سی واردر  
لکن انلرك بیاننہ بورسالہ مختصرہ متحمل دکلدر .

## باب رابع

(مواد اقیسہ بیانده اولوب درت فصلی مشتملدر)

## فصل اول

(تصدیقاتک انواعی بیانده در)

نسبت خبریہنک ایکی جہتی کہ وقوع ولاوقوعدر ایکیسی  
عند العقل متساوی اولور یعنی برشی بویلہ میدر دکلیدر  
دیو عقل بر جہتی ترجیح ایلز ایه بوایکی جہتہ تعلق  
ایدن علمہ شک دنیلور

واگر عقل بر جہتی ترجیح ایلر ایه اول جہتہ تعلق ایدن  
علمہ تصدیق واعتقاد دنیلور

ایشته بواعتقاد اگر جازم یعنی جہت آخری احتمالی بالکلیہ  
منقطع اولور وجہلہ ثابت ونفس الامرہ مطابق ایه یقین  
تسمیہ اولنور



واکر جازم و ثابت اولوبده نفس الامر مطابقی دکل  
ایسه جهل مرکب تسمیه اولنور واکر جازم اولوبده  
ثابت اولماز ایسه تقلید تسمیه اولنور

وبو اوج صورتده دخی مجزومک نقیضنه تعلق ایدن علمه  
تخیل دنیلور

واعتقاد اکر جازم یعنی قطعی اولیوبده عقل بر جهتی  
تر جمیع اتمکله برابر دیگر جهتی دخی مرجوح اوله رق  
تجویز ایلرایسه ظن تسمیه اولنور و مظنونک نقیضنه تعلق  
ایدن علمه وهم دنیلور

مثلا عالمک حادث اولدیغنی دلیل صحیح ایله جزما تصدیق  
واثبات ایدنلرک بو اعتقادی جازم و ثابت و واقعه مطابق  
اولغله علم یقینیدر

و حکمانک دلیل فاسد ایله عالمک قدمنی جزما اعتقاد ایتلری  
واقعه مطابق اولدیغنی جهته جهل مرکبدر

وبر دلیل ایله استدلال اتمکسزین مجرد علمادن استماع ایله  
عالمک حدوثنی جزما تصدیق ایدن بر جاهلک بو اعتقادی  
تقلیددر

کرک بروجه بالا عن دلیل و کرک بویه تقلید ایله عالمک  
حادث اولدیغنی جزما اعتقاد ایدنلره کوره عالمک قدمنی

و حکمایه کوره عالمک حدوثنی تصور ایلک تخیلدر .  
و کیجه نامحل طولاشان کیمسه نک سارق اولدیغنه حکم  
اولنمسی ظندر و سارق اولیوبده طولاشمسی دیگر بر سببه  
مبنی اولمق احتمال مرجوحی و همدر

بو تفصیلاتدن اکلاشلمدی که شک و تخیل و وهم هپ  
تصورات قبیلندندر و یقین و جهل مرکب و تقلید و ظن هپ  
تصدیقاتدر

بناء علی ذلک قضیه یاقینییه یا تقلیدییه و یا ظنییه و یا خود  
جهلییه مرکبه در

یقینییه دخی یابد بهیه و یا خود نظریه در

بدیهیه عقلک فکر ایله یعنی ترتیب مقدمات ایله استدلاله  
محتاج اولمقسزین جزما حکم و تصدیق ایلدیکی قضیه در .  
برایکینک یاریسیدر و کل جز شدن بیو کدر برشی کندینک  
غیری دکلدر قضیه لری کبی ته کیم اشاعیده تفصیل  
اولنده جقدر

نظریه عقلک بر دلیل واسطه سیله حکم و تصدیق ایلدیکی  
قضیه در که مقدماتی یقینیاتدن اولدیغنی حالده اول قضیه  
دخی یقینییه اولور

مثلا (عالم حادثدر) قضیه سی یقینییه در فقط بدیهیه اولیوب



نظریه در که ( زیرا عالم متغیر در و هر متغیر حادث در ) دیو بر  
قیاس ترتیب اول نور و ( اولیه ایسه عالم حادث در ) نتیجه سی  
النور و بو نتیجه اول دلیل واسطه سیله یقینا تصدیق اول نور  
تقلیدیه مقلدك ز عمنجه بدیهیدر نظری دکادر فقط عندنده  
دلیل ایله ثابت اولمدیغندن برکسنه انی تغلیط ایله شبهه یه  
دو شوره رك اعتقادینی بوزه ییلور .

ظنیه بعض قرآن و اماراتدن مأخوذ اولان قضیه در که عقل  
آنی حکم ایتمکله برابر نقیضنی دخی تجویز ایلر بو جهته  
ظنیاتك جمله سی نظریدر

جهلیه مرکبه اول قضیه در که قوه و اهمیه اتباعا عقل آنی  
بدیهی یا خود دلیلنك مقدمه لرینی یقینی زعمیه قطعیا حکم  
و تصدیق ایلر

بو جهته جهلیات مرکبه نك بعضیسی ز عبادیهی و بعضیسی  
نظریدر

و یقینیاتك جمله سی صادق یعنی نفس الامر مطابق و جهلیات  
مرکبه نك جمله سی کاذبدر .

بو بحثی کمرکی کی ایضاح ایچون بوراده بعض مسائل حکیمه نك  
استطرادا بیانی مناسب کورلمشدر

### استطراد

عند الحکما انسانده حواس نجسه ظاهره یعنی سمع و بصر و شم و ذوق  
و لمس اولدیغی کی دماغنده مرکوز حواس نجسه باطنه یعنی حس  
مشترك و خیال و قوه و اهمه و قوه حافظه و قوه متصرفه اولوب  
بونلر هب قوای جسمانیه در

حس مشترك دماغك آینه سی کبیدر حواس ظاهره ایله هر نه ادراك  
اولنورسه صورتی اکا منعکس اولور و بو مقوله صور محسوسه خیالده  
محفوظ قالور

وقوه و اهمه نك بو صورتلرده ادراك ایلدیکی معانی جزئییه قوه حافظه ده  
محفوظ اولور

مثلا انسان بر یرنجی حیوان کورسه صورتی حس مشترکه منعکس  
و خیالده محفوظ اولور و قوه و اهمه نك انده مضرت تصور ایدرک

اورکوب قورقسی کی معانی جزئییه قوه حافظه ده قالور  
قوه و اهمه قوای باطنه نك حکمداری مقامنده در دائما قوه متصرفه  
واسطه سیله صور جزئییه ده ضم و تفریق ایله تصرف ایدر

مثلا قیونك باشنی کسر قوردك اکلنه یا بشدیرر وایکی باشلی و سیوری  
طریقاقلی قورقنج صورتلر تخیل ایدر اشته انسانك او یورکن کوردیکی  
احلام یعنی قاریشق دوشلر بوندن نشات ایلر بو جهته قوه متصرفه یه  
قوه مخیله دخی دنیلور

الحاصل قوه و اهمه محسوساتدن منتزع اولان معانی جزئییه یی ادراك  
ایدر بو جهته حسه تابع اولور و محسوساتده طوغری حکم ایدر  
نته کیم انسان برکوزل شخص ایله بر چرکین شخص کوردکده و اهمه سی



انك حسن جالنه و بونك چیرکینلکنه حکم ایدر واکا محبت و بوندن  
نقرت ایلر

اما کلیاتی ادراک ایدمه من و محسوس اولمیان شیلر حقنده محسوساته  
قیاساً و یردییکی حکملر کاذب اولور

مثلا هر موجود بر مکان وجهته بولنور واکا اشارت حسیه ایله  
اشارت اولنور دیو حکم ایدر و مجرداتی انکار ایلر

کلیاتی ادراک ایدن انجق عقلدرکه قوه متصرفه بی صورت ذهنیه ده  
اعمال ایله انلردن معانی کلیه انتزاع ایدر مثلا اشخاصدن نوعلر  
وانلردن جنسلر انتزاع و بونلری یکدیگره ضم ایله قیاسلر ترتیب  
ایدرك علوم یقینیه اکتساب ایلر

ایشته فکر دیدیکمن بودر و بو جهته متصرفه قوه مفکره  
دنیلور و انسان انجق عقل و فکر ایله حیوانات سائرده دن ممتاز  
اولور

و کلیاتده عقل حکمی طوغریدر لکن اکثریا اکا واهمه معارض  
اولور و بعضا آنی شاشیرر و مزلقه ضلالته دوشیرر

نته کیم فرق ضالهدن بعضیلری باری تعالی موجوددر و هر موجود  
بر مکانده در دهرک جناب حقه مکان اثبات ایدرلر بو ایسه انجق  
وهمک عقله غلبه سندن نشأت الیش بر اعتقاد باطلدر

ایشته واهمه نك بویه محسوس اولمیان شیلرده حکم ایلدیکی قضایای  
کاذبه و همیات دنیلور که جهلیات مرکبه دیمک اولور

انسان بالکز عقلیه قالسه طوغریدن شاشماز لکن حس و وهم ایلرو  
کجوب نفسی کندولرینه منجذب و مسخر ایتیلردر بو سببدن ناشی  
وهمیاتک احکامی اکثریا نفسک عندنده بدیهیاتدن متمیز اوله مازو عقل  
و شرع اکر وهمک احکامی دفع و تکذیب ایتسه لر و همیاتک بدیهیاته  
التباس و اشتباهی باقی قالور و هیچ بر طرف ایدیه من اولور ایدی

واهمه نك کذبیه دلالت ایدن خصوصلردن بری بودر که کندی  
حکمنک نقیضی منتج اولان مقدمه لرده عقله موافقت ایدر

مثلا ( میت جاددر و هر جاد قورقولماز برشیدر ) مقدمه لرینی عقل  
ایله برابر تصدیق و تسلیم ایلر و نتیجه کلیجک یان چیزر و مبتدن  
قورقولور دیو حکم ایدر

ایشته بونك ایچوندرکه انسان اکثریا کندوسنده ایکی متناقض حکم  
بولور مثلا طاش و طوبر اقدن عبارت اولان مزارلقدن کجکرکن خوف  
ایده جک برشی اولمدیغنی عقلاً جزم ایدرکن واهمه سی اورکر واکا  
تبعاً کندوسنه خوف و وحشت کلور و عقل حکمی کیرو قالور

و بونك ایچوندرکه انسان اوله جکنه هم اینانور وهمده اینانماز کبی  
کورینور شوبله که افراد انسانیه بر طرفدن طوغار و دیگر طرفدن  
فوت اولوب کیدر و ایچلرنده پک نادر کسنه لر یوزیاشنی برانجاوز  
ایده بیلور شو حاله کوره شمعی موجود اولان ادملردن یوز بوقدر  
سنه صکره هیچ بری قالمیوب یرلرینه بشقه لری قائم اولور دیو عقل  
قطعیا جزم ایلر واهمه دخی بوراسنی تسلیم ایدر و بورایه قدر عقل  
ایله برابر کیدر لکن اوصرمده کندوسی دخی معدوم اولمق نتیجه -  
سنه کلیجک انی تسلیم ایدمه میوب کیرو دوزر وهمان یاراماز چوجقلر -  
کبی صور ذهنیه ده تصرفات جزئیه و خیالات شخصییه ایله مشغول  
اولوب قالور بزینه صده کله لم

## فصل ثانی

( بدیهیاتک اقسامی بیانده در )

اهل منطق بیانیه کوره بدیهیات یعنی قضایای بدیهیه  
التیدر



یعنی اولیات • فطریات • مشاهدات • مجربات •  
حدسیات متواترات • در

اولیات اول قضیه لر در که هر عقل سلیم انلرک حکم  
و تصدیقنده هیچ بر واسطه یه محتاج اولیوب مجرد طرفینی  
یعنی موضوع و محمولانی تصور ایدیلرک بیلرلنده کی نسبتی  
جزما تصدیق ایلر •

کل کنندی جزئیدن بیوکدر • دایره مربع دکدر • اجتماع  
نقیضین محالدر • کیجه کوندوز دکدر • بر اوچ دکدر •  
اوچ بر اوله ماز قضیه لر کی

فطریات اول قضیه لر در که عقل انلرک طرفینی تصور ایدرکن  
ذهنده حاضر اولان بر حد اوسط واسطه سیله همان  
نسبت حکمیه بی جزما تصدیق ایلر •

درت چفتدر قضیه سی کی که درت و چفت مفهوم لرینی  
تصور ایدن کیمسه متساوینه منقسم اولق مفهومی دخی  
بر ابرجه تصور ایدر و ذهننده همان ( درت متساوینه  
منقسمدر و متساوینه منقسم اولان هر شی چفتدر ) دیو  
بر قیاس خفی ترتب و تشکل ایدرک عقل انک واسطه سیله  
درت چفتدر دیو جزما حکم ایدر •

بناء علیه فطریات ( قضایا قیاساتها معها ) دیو تسمیه  
اولنور •

بو جهته قضایای فطریه نظریاته بکرر ایسه ده حقیقت حالده  
نظریه دکدرلر زیر نظریه بروجه بالا فکر ایله اکتساب اولنان  
قضیه در فکر دخی ذهنک مطلوبدن مبادی یه حرکتی و بعده مبادی بی  
ترتیب ایدرک مقصده عودتی دیمکدر فطریاتده ایسه بویه حرکتلر  
اولیوب انجق ذهنده دفعی اوله رق بالطبع مترتب اولان قیاس خفی  
واسطه سیله حکم اولنور و بو قیاس خفی موضوع و محمولک تصور -  
لری صره سننده دفعه تحصل اتمکله بو تصورلرک تمامندن معدود  
اولور

بناء علیه قضایای فطریه بدیهیات اولیه قوتنده در و بلکه ایکسینی  
بر برندن آیرمق کوجدر هله درت چفتدر قضیه سی بیاغی بدیهیه  
اولیه در زیر جفت متساوینه منقسم دیمکدر بناء علیه عقلک  
درت چفتدر دیو حکم اتمی مجرد موضوع و محمولک تصورلری  
ایله در دنیله بیلور

مشاهدات اول قضیه لر در که مجرد حس ایله جزما حکم  
و تصدیق اولنور

و بو حس اگر حواس ظاهره دن ایسه حسیات دنیلور  
کونش ضیا و یر یجیدر آتش یا قیجیدر قار صوغو قدر •  
تیمور یموشاق دکدر وبال طاتلیدر قضیه لر کی •

واگر حواس باطنه دن ایسه وجدانیات دنیلور  
کندیمزده خوف و غضب اولدیغنی و قرنمزک اچیقدیغنی درک و اذعان  
ایلدیمکز کی



حدسیات اول قضیه لر در که حدس ایله دفعه یعنی  
سنو حات قبیلندن اوله رق ذهنده حاصل اولان قیاس خفی  
واسطه سیله عقل انلری جزما حکم و تصدیق ایلر نه که  
قرک نوری کونشدن مستفاد در دیو حدس ایله جزما حکم  
اولنور .

شویله که قرک کونشه نسبتله اوضاعی تبدل ایتدیجه تشکلات  
نوریه سنک مختلف اولدیغی مشاهده اولنیجی اکر قرک نوری کونشدن  
منعکس و مستفاد اولسه قریا و بعدا اوضاعی تبدل ایتدیجه تشکلات  
نوریه سی مختلف اولماز ایدی دیو دفعه قلبه سنوح ایدن قیاس خفی  
واسطه سیله عقل (قرک نوری کونشدن مستفاد در) دیو حکم ایلر .  
حدس ذهنک سرعت انتقالی دیمکدر که فکره مقابل بر کیفیتدر  
چونکه فکر بروجه بالا ذهنک مطالبیدن مبادییه و مبادیدن مطالبه  
حرکتیدر بناء علیه فکرده ایکی حرکت بولنور و حرکت تدریجی  
بر کیفیتدر حدس ایسه ذهنک دفعه مبادیدن مطالبه انتقالی یعنی  
دلیلک در حال ذهنه سنوح ایدیورمسی در بودخی تدریجی اولیوب  
آنی بر کیفیتدر . بو کیفیت بعض ذواتده بر امر فطریدر که هر ماده ده  
مبادی دفعه ذهنلرینه سنوح ایدر و بعض ذواتده دخی ترتیب ادله ده  
کثرت ممارسه ایله برملکه حدسیه حاصل اولور

و کرک فطری و کرک کسی اوله رق متحدس اولنلره کوره بدیهی  
اولان قضیه لر سائر ناسه کوره نظری اولور و انلره کوره حدس  
ایله حاصل اولان قیاس خفی بولنلره کوره قیاس جلی اولوب انکله  
مطلوبه استدلال ایدر لر .

مجربیات اول قضیه لر در که تکرر مشاهده ایله عقل انلری  
جزما حکم و تصدیق ایلر .

یعنی حکم تجربه اوزرینه ترتیبی مکررا مشاهده ایدیجک ( اکر  
بو قضیه تصادف قبیلندن اولسه حکم تجربه اوزرینه ترتیبی دوام  
ایتمزدی لکن دوام ایتدی ) دیو ذهنده حاصل اولان بر قیاس خفی  
واسطه سیله آنی جزم ایدر .

مغزیا مسهلدر قضیه سی کبی که بر کره مغزیا ایچلد کدنصکره  
اسهال و قوعوبولمغله ( مغزیا مسهلدر ) دیو بر قاعده اتخاذ  
اولنه ماز لکن لدی التجربة هر نه زمان مغزیا ایچلور ایسه  
اسهال ایلدیکی کوریلنجه مغزیا مسهلدر دیو جزما حکم  
اولنور

متواترات اول قضیه لر در که انلری کذب اوزرینه  
اتفاقلری عقلا محال اولان جم غفیر خبر ویرمکه جزما  
حکم و تصدیق اولنور .

شویله که جم غفیرک بالمشاهده خبرلری توارد ایدرک انلرک کذب  
اوزرینه اتفاقلری عقلا تجویز اولنه میه جق مرتبه قولقلر طولدقده  
دفعه عقل ( بو قضیه صحیح اولسه بوقدر ادم آنی اخبار اوزرینه  
اتفاق ایتمزلردی حالبوکه اتفاق ایتدیلر ) دیو ذهنده حاصل اولان  
بر قیاس خفی واسطه سیله جزما حکم ایلر .

نه کیم مکه یی کور میان آدمک مکه واردر دیو جزما حکم  
انلسی و محمد صلی الله تعالی علیه وسلم نبوت دعواسی



ایتدی و معجزه لر کو ستردی دیو بلا تردد تصدیق اولمسی  
کبی .

تواترک حسه مستند اولمسی شرطدر بناء علیه بر حس ایله محسوس  
اولیان عقلیاتده تواتر دلیل اوله مز

الحاصل بدیهیاتده حاکم یا بالکز عقلدر یا خود یا لکز حسدر و یا خود  
حس ایله برابر عقلدر

حاکم یا لکز عقل اولدیغی صورته اکر مجرد طرفینی تصور ایله  
حکم ایدرسه اولیاتدر و اکر ذهنده حاضر اولان برحد اوسط  
واسطه سیله حکم ایدرسه فطریاتدر و حاکم یا لکز حس اولدیغی  
صورته مشاهداتدر و حس ایله عقل برابر اولدیغی صورته اکر  
تکرر مشاهده ایله یعنی تکرر مشاهده اوزرینه حاصل اولان  
برقیاس خفی واسطه سیله حکم ایدرسه مجرباتدر و اکر تکرر  
مشاهده به محتاج اولمق سزین دفعه ذهنه سنوح ایدن قیاس خفی  
واسطه سیله حکم ایدرسه حدسیاتدر و اکر حس سمعه واصل اولان  
اخبارک مخبرلری کذب اوزرینه اتفاقلری تجویز اولنه میان جم غفیر  
اولدقلری جهتله ذهنده حاصل اولان برقیاس خفی واسطه سیله  
حکم ایدرسه متواتردر

خفی اولیه که کتب منطقده (شواتش حاردر) و (هرانش حاردر)  
قضیه لری مشاهداته مثال اوله رق ایراد اولمشدر حالبوکه بر کیسه آتسه  
طوقونوبده حار اولدیغی مشاهده ایدیجک (شواتش حاردر) دیدکده  
مشاهداتدن بر قضیه شخصیه اولور اما هر آتشک حرارتی مشاهد  
اولدیغندن هر آتش حاردر دنیلدکده حکمک بعض افرادده مشاهده سی  
واسطه سیله هر فردی اوزرینه حکم ایدلمش اولور .  
بو ایسه استقراء ناقص قیلندن اولمغله یقینی مفید اولمیوب

(تمساحدن بشقه هر حیوان آلت چکهنی اوینادر) قضیه سی کبی  
ظنیاتدن اولور دیو بر سوال قوی ایراد اولمشدر

بوسوالک جوابنده بعض محققین (حکمتده تقرر ایشدر که نفس  
بر نوعک بعض افرادنده حکمی مشاهده ایدیجک اکا جانب مبدأ  
فیاضدن اول نوعک هر فردنده بو حکمک وجودینه علم قطعی فیضان  
ایدر اما برجنسک بعض افراد نوعیه سننده حکمی مشاهده ایتکله  
هر فردنده اول حکمک وجودینه علم قطعی کلز زیرا بعض افرادینه  
اول حکمک خلافتی مقتضی بر فصلک منظم اولمسی جائز و محتملدر  
ایشته بونک ایچون تمساحدن بشقه هر نوع حیوان آلت چکهنی  
اوینادر دیو علم قطعی حاصل اولمیور) دیمشدر

بوجوابک خلاصه سی (انسان بر نوعک بعض افرادنده بر حکمی مشاهده  
ایتکله اول حکمک بو نوعک هر فردنده موجوددر دیو اکا علم قطعی  
کلور اما بو جنسک بعض افرادنده بر حکمی مشاهده ایتکله هر فردنده  
اول حکمک وجودینه علم قطعی کلز زیرا جائز که مشاهده ایتدیکی  
فردک نوعنه مبان اولان دیگر بر نوعنک فصلی اول حکمک خلافتی  
مقتضی اوله دیمک اولور .

انجق انسان بر نوعک بعض افرادنده بر حکمی مشاهده ایتدکده  
جائز که اول نوعک دیگر افرادینه اول حکمک خلافتی مقتضی بعض  
تشخصات منظم اوله دیو بوجوابه دخی اعتراض اولمشدر

مؤلف فقیردیگر که بر نوعک بعض افرادنده بر کیفیتک مشاهده اولمسی  
اوزرینه اول نوعک هر فردنده بو کیفیت وارددر دیو دفعه ذهنه بر علم  
قطعی سنوح ایدرسه بو قضیه کلیده حدسیاتدن و اکر تجربه ایله  
بویله بر علم قطعی حاصل اولور ایسه مجرباتدن اولور  
واکرچه حدس و تجربه انجق محدس و مجربلرینک کندولرینه علم  
قطعی کتوروب بشقه لرینه دلیل اولماز انجق بر نوعک بعض افرادنده



بر اثر مشاهده اولنویده سائر افرادنده اول اثرک وجودینه دخی  
یا حدس ایله ویاخود تجربه ایله قطعیا حکم اولنسی هرکسک نفسنده  
یک چوق دفعه وقوع بولش اولدیغنه نظراً انکار اولنه بیلور  
مواددن دکلدر فقط بو حالده (هر آتش حاردر) قضیه سی یا حد-  
سیانندن ویاخود مجربانندن اولوب مشاهدهانه مثال اوله مز قالدیکه  
مشاهداتده حاکم انجق حواسدن بریدر حواسک ادراکی ایسه  
جزئیاته منحصردر کلیاتی مدرک اولان انجق عقلد بوکا نظراً مشاهدات  
هپ قضایای شخصیه دن عبارت اوله رق کلیه لری یا حدسیانندن  
ویاخود مجربانندن اولمق لازم کلور

ایشته کتب منطقده بدیهیاتک تعریف و تقسیمه دائر مسطور اولان  
تفصیلاتک خلاصه سی بوندن عبارتدر

رأی واعتقاد فقیره کوره بدیهیات اول امرده ایکی قسمه منقسمدر .  
قسم اول عقلیات صرفه دن اولان بدیهیاتدر که عقل انلرک حکم  
و تصدیقنده خارجه طائشماز و حواسک اعانه سنه یعنی مشاهده و تجربه  
کی برواسطه حسیه یه محتاج اولمز بلکه موضوع و محموللرینی تصور  
ایدیجک بینلرنده کی نسبت حکمیه یی جزما تصدیق ایدیوربر  
ایشته بونلره بدیهیات عقلیه دنیلک مناسب اولور که قدما نلک اولیات  
و فطریات دیدکلری بدیهیاتدر

قسم ثانی واسطه حس ایله حکم اولنان بدیهیات اولوب بونلره دخی  
بدیهیات خارجه دیه لم و بونلری ایکی صنفه تقسیم ایدلم بری  
بروجه بالا قضایای شخصیه دن عبارت اولان مشاهدات و دیگر  
حدس یا تجربه ویاخود تواتر واسطه سیله محسوسانندن منترع  
وماخوذ اولان بدیهیاتدر

شعری شو تقسیمه کوره بدیهیاتده دائر سابع خاطر اولان تحقیقات  
و تفصیلاته مبادرت ایدلم

بدیهیات عقلیه نلک موجب لرنده محمولک مفهومی موضوعک مفهومیله  
متحد کی اوله رق عقلا اندن انفکاکی محال اولدیغی کی سالبه لرنده  
دخی بو مفهوملرک اتحاد واجتماعی عقلا محالدر

مثلاً بر کیمسه کل مفهومی بر طاقم جزلرک اجتماعندن حاصل اولان  
شی دیو تصور ایتدکدن صکره بو جزلرک هر برندن بیوکل اولمق  
مفهومی تصور ایتدکده بو مفهوملرک ایکسی بر شیدن عبارت  
اولدیغی جزم ایله بلا واسطه و بلا تردد (کل جزئشدن بیوکلدر)  
دیو قطعیا حکم ایلر

کذلک دائره یی تکرلک و مربعی درت گوشه لی دیو تصور ایتدکده  
مربعک دائر ایله اتحاد واجتماعی قابل اوله میه جغنی بالذات جزم  
ایدرک همان (دائره مربع دکلدر) دیو قطعیا حکم ایدر

اما بدیهیات خارجه نلک حکملری مشاهده یه موقوفدر و بعضاً بر دفعه  
مشاهده ایله کسیدریله میوب تکرر مشاهده یه محتاج اولور مثلاً عقل  
یا لکن قارایله صوغوق و یمور ایله یموشاق مفهوملرینی تصور ایتکله  
(قار صوغوقدر) و (یمور یموشاقدکلدر) دیو حکم ایلز بلکه  
قارک صیاق و یمورک سرت اولمسنی تجویز ایلر لکن حس لمس  
ایله (قار صوغوقدر) و (یمور یموشاقدکلدر) دیو قطعیا  
حکم ایلر

کذلک مغتر یا ایله مسهل مفهوملرینی تصور ایتکله (مغتر یا مسهلدر)  
دیو حکم ایلز بلکه مغتر یا نلک مسهل اولامسنی تجویز ایلر لکن هر نه  
وقت ایچلسه اسهال ایلدیکنی مکرراً مشاهده ایدیجک مغتر یا مسهلدر  
دیو قطعیا حکم ایلر

بناء علی ذلک بدیهیات خارجه ده محمولک مفهومی خارجدن کلوبده  
موضوعه ربط اولنمش کی اوله رق عقلا اندن منفک اوله بیلور



بدیهیات عقلیه ده ایسه بروجہ بالا بمجولک مفهومی موضوعک مفهومیله  
یکوجود اوله رق عقلا اندن فک اولنه ماز

بعض کتب ریاضیه تک مقدمه لرنده علوم متعارفه دیو . کل جزئندن  
بیوکدر . کل مجموع اجزاسنه مساویدر . بر مقدار مساوی اولان  
مقدار لر متساویدر . بر مقدار دیگر مقدار دن هم بیوک و هم بکوک  
اوله ماز . کی بسط و تمهید اولنان قضیه لر هب بدیهیات عقلیه دندر  
وحساب و هندسه دلیل لر ی هب بونلره مستنددر

و بوعلم متعارفه قضایای حقیقیه اولغله حکملری مفروض اوزرینه در  
موجود خارجی اوزرینه دکدر

مثلا ( کل جزئندن بیوکدر ) قضیه سنک معناسی خارجه کل واریسه  
جزئندن بیوک اولسی ضرور بدر یعنی کل نامنده برشی عالمده موجود  
اولسون اولسون هله موجود اولدیغی تقدیرده جزئندن بیوکدر دیمک  
اولور

کذلک ( دائرة مربع دکدر ) قضیه سنک معناسی دائرة نامنده برشی  
موجود اولسون اولسون موجود اولدیغی تقدیرده مربع دکدر  
یعنی عقلا بر مربع دائرة بولنه ماز دیمک اولور

دقت اولنسه انسان بومثللو بدیهیات عقلیه ده معاملات جزئییه سننده  
دخی اعتبار و استناد ایلر

نته که اوجیوز غروش بورجی اولان کسنه اوج تقسبطده یوز غروش  
ادا ایتدکده کاملا بورچندن قورتلمش اولدیغی جزم ایدر زیرا بیلور که  
اوج دفعه یوز اوجیوزک مجموع اجزاسیدر کلک مجموع اجزاسنه  
مساواتی ایسه بروجہ بالا علم حساب و هندسه ده مستعمل اولان علوم  
متعارفه دندر

کذلک بریور غانجی بر اوله تک اکنی اولجوبده مثلا بش ارشون کلسه  
وبعدہ جار شویه کیدوبده بش ارشون اکنده برقاش بولسه بوقاشک

اکی اول اوله تک اکنه مطابقدر دیو جزم ایدر نقاشی کتوروبده  
اوله تک اکنه تطبیق اتمکده محتاج اولماز زیرا بیلور که بر مقدار  
مساوی اولان مقدار لر متساویدر

وکذلک برکیسه درت ایله سکر و برده الی ایله التینک اون ایکی یه  
مساوی اولدیغی بیلدکده درت ایله سکرک الی ایله الی یه مساوی  
اولدیغی دخی بنه بومتعارفه مبنی قطعیا جزم ایلر

الحاصل بدیهیات عقلیه تک عقلا صدق و صحتی ضروریدر  
بدیهیات عقلیه ده مصادم اولان حکملری عقل بروجله قبول اتمز .  
بدیهیات عقلیه تک نقیضلری نه خارجه بولنه بیلور ونده ذهنده تصور  
اولنه بیلور

بررسم درت الی الی ایاقلی اوج کوزلی بر انسان رسمی بابه بیلور  
اما بر مربع دائرة رسم ایدم

والاجتماع نقیضین لازم کلور ایکی نقیضی جمع ایسه محالدر زیرا  
برشی یا واقعدر یا غیر واقعدر بوخسه هم واقع و هم غیر واقع اوله ماز  
( برشی یا واقعدر یا غیر واقعدر ) یاوار اولدیغی تقدیرده وارددر یاخود  
یوق اولدیغی تقدیرده یوقدر یعنی وار ایسه وارددر یوق ایسه یوقدر  
دیمک اولور و هم صادق هم کاذب بر قضیه تک وجودی ممکن اولدیغی  
افاده ایدر

بودخی ( برشی هم واقع هم غیر واقع اوله ماز ) یعنی هم وار هم  
یوق اوله ماز دیمک وارر

اشبو ( برشی هم واقع هم غیر واقع اوله ماز ) قضیه سی براساسدر که  
دکل بالکز ( برشی یا واقعدر یا غیر واقعدر ) قضیه بدیهیه سنک بلکه  
بالجمله علوم متعارفه تک مرجعی و صدق و کذب لرینک میرانیدر .  
شویله که بوقضیه اساسیه دن درت بدیهیه عامه دهاتولد ایدر که  
( واقع واقعدر ) و ( غیر واقع غیر واقعدر ) و ( واقع غیر واقع



دکدر) و (غیر واقع واقع دکدر) قضیه بدیهه لریدر  
(واقع واقعدر) یعنی واریسه وارد و (غیر واقع غیر واقعدر)  
یعنی یوق ایسه یوقدر قضیه لری موجب لرک میرانیدر  
و (واقع غیر واقع دکدر) یعنی واریسه یوق اوله ماز و (غیر واقع  
واقع دکدر) یعنی یوق ایسه واریسه ماز قضیه لری دخی سالبه لرک  
میرانیدر

بدیهات عقلیه نك كافه سی اشبو بدیهات عامه دن برینه طیانور .  
مثلا (کل جزئندن بیوکدر) متعارفه سی (واقع واقعدر) بدیهه سنك  
مشتلاتندرز برا برکل جزئندن بیوك اولسه کل دیدیکمز کل اولماق  
یعنی واقع اولان واقع اولماق لازم کلور حالبوکه واقع واقعدر .  
(هرکل مجموع اجزاسنه مساویدر) متعارفه سی دخی بو وجهله  
(واقع واقعدر) بدیهه سی اوزرینه مبتنی اولور  
(کیجه کوندوز دکدر) و (اوج براوله ماز) قضیه بدیهه لری  
برشی کندینک غیر دکدر) بدیهه سنه و بودخی (واقع غیر واقع  
دکدر) بدیهه عامه سنه راجع و منتمی اولور شویله که کیجه کوندوز  
واوج براولسه برشی کندینک غیر اولماق لازم کلور و برشی کندینک  
غیری اولسه واقع غیر واقع اولماق لازم کلور حالبوکه واقع غیر واقع  
دکدر

و (بر مقدار دیگر مقداره یا مساویدر یا خود غیر مساویدر) متعارفه سی  
(برشی یا واقعدر یا خود غیر واقعدر) بدیهه عامه سنه مستند  
اولور

و (بر مقدار دیگر مقدارن هم بیوك هم بچوك اوله ماز) متعارفه سی  
هم اعظم هم غیر اعظم اوله ماز دیمك اولمسیله (برشی هم واقع هم غیر  
واقع اوله ماز) بدیهه اساسیه سنه ارجاع اولنور  
علوم متعارفه نك كافه سی بدیهات عقلیه دن اولدقلری حائده یکدیگره

نسبتله خفی و جلی واجلی اولدقلرندن برمنوال مشروح یکدیگره  
ارجاع ایله تأیید و ایضاح اولنور لر بو وجهله بداهت لرینک سبی عیان  
اولور و دلیل صورتنده ایراد اولنان جمله لره تنبیهات دنیلور که  
حقیقت حالی اخطار ایله ایضاح و تأیید ایدر لر یوخسه بونلر حقیقه  
دلیل دکلردر والا ایضاح و تأیید اولنان متعارفه لر نظریه اولماق  
لازم کلور حالبوکه علوم متعارفه نك كافه سی بوجه بالا بدیهاتنددر .  
ایشته بو وجهله علوم متعارفه نك كافه سی ذکر اولنان بدیهات عامه یه  
ارجاع اولنور انلر دخی (برشی هم واقع هم غیر واقع اوله ماز) بدیهه  
اساسیه سنه طیانور و بونکله ثابت اولور که اشبو بدیهه اساسیه  
جمله بدیهات عقلیه نك میران و دستور عمومی حکمنده در

بو تفصیلاتدن ظاهر و عیان اولور که بدیهات عقلیه بر شینک جمیع  
صورتمکنه سنی جامع اولمغله ذهنه عارض اولان شک و شبهه بی کاملا  
رفع و ازاله ایدرک عقلی نور یقین ایله روشنا ایلر

بدیهات خارجیه یه کلجه بوجه بالا قضایای شخصیه دن عبارت اولان  
مشاهدات هب بدیهات جلیه دن معدود ایکن بونلرده بعضا غلط  
و خطا لر وقوع بولور

مثلا بر آدم ایننه یه باقسه انده کندی کی بر آدم کورر و برازیری صو  
ایچنده اولان دکنک قیریق کی کورینور ویشیل کوزلک ایله باقلدقدده  
کوریلان شیلر یشیل ظن اولنور که آینه ایچنده کورینان مثالك  
خارجده وجودی اولدیغی مجزومدر و دکنک صودن طیشار و چیقار -  
لدقدده طوغری اولدیغی تبین ایدر ویشیل کوزلک چیقاریلوبده  
باقلدقدده یشیل رنگ در حال محو اولور ایشته بونلر غلط بصر  
یعنی کوز الدانمه تعبیر اولنان شیلردر  
انسانک اوبورکن کوردیکی قاریشق رؤیالر دخی بوقبیلدندر که هب



قوة مخيلة نك قورندیلرندن عبارت اولوب اولدیغی کی بریسنك  
اصلی اولدیغی اكلاشیلور

حس و وهمك بوجهله ادراك ایلدیکی مثال و خیالار محسوساتدن مأخوذ  
اولان صور ذهنیه درکه چوق دفعه واقعه مطابق کلز

بناء علی ذلك مشاهداتده نظره اولایه الدائموبده نفس الامر اصابت  
ایده بیلک ایچون حقیقت حالی تحری و تحقیق ایلک لازم کلور

حالبوکه مشاهداتده بویله غلط حس محتمل اولیجق تجربه یا حدس  
ویا خود تواتر واسطه سیله محسوساتدن منترع و مأخوذ اولان قضایای

کلیه بی شبهه و احتمالدن قور تاروبده قضیه بدیهیه حقیقه درجه سنه  
وارد رمق نه مرتبه مشکل اولدیغی ادنی مطالعه ایله معلوم اولور

بناء علی ذلك قضایای خارجیه ده غلط و خطا ایتیه رک علم یقین حاصل  
ایلک انسانه کوره ممکن اولسه بیله بر درجه یه قدر اوله ییلور

صدق و سداد افکارک معیار صحیحی اولان عقل کندی دائرة ادراکی  
داخلنده بولنان معقولانده طوغری حکم ایدر اما دائره سی خارجنده کی

قضایای خارجیه ده نه یابسون بونلری واسطه حواس ایله خارجه  
تطبیق ایلکه محتاج اولور حواس ایسه خطادن خالی اولماز و اهمه

دخی ادراک ایده مدیکی کلیاتده ادراک ایلدیکی جزئیاته قیاسا حکم  
ایتک ایستر و بوبولده عقله معارضه و حسب البشریه چوق کره

غلبه ایلر .

علم حساب و هندسه مسائل هب بدیهیات عقلیه یه طیانور بوجهته  
غایت واضح و جلی و هر درلو تردد و شبهدن بری اوله رق اثبات  
اولنور .

حکمت طبیعییه دلیللری ایسه بدیهیات خارجیه ایله مخلوطدر  
و چوغی استقرار ناقصدر بوجهته علوم طبیعییه مسائلنی هر درلو

احتمالات ذهنیه دن وارسته ایده جک وجهله اثبات پک کوچدر

تحقیقات سابقه دن مستبان اولدی که بدیهیات عقلیه هیچ بر استثنا  
قبول ایتز هر نه وقت و هر نروده و هر نه حالده اولور سه اولسون

بالضروره صحیح و صادقدرلر

بناء علی ذلك بدیهیات عقلیه یه مصادم اولان نصوص متواتره  
تأویل اولنور .

نته کیم ( ان الله علی کل شیء قدیر ) آیت کریمه سی که الله تعالی  
حضرتلری هر شیئه قادر در دیمک اولور بونده کی شیدن شریک باری

استثناء عقلی ایله مستنادر دیو تأویل اولمشدر

چونکه واجب تعالی حضرتلرینک قدرتی کندی شریک و نظیرینک  
خلق و تکویننه دخی تعلق ایتسه محالک ممکن اولمی و واجبک واجب  
اولماسی لازم کلور بویسه ( برشی هم واقع و هم غیر واقع اوله ماز )

بدیهیه اساسیه سنه مناقضدر  
بونک ایچون عقلا محال یعنی بدیهیات عقلیه یه مناقض اولان شیئه  
قدرت الهیه تعلق ایتز دیرلر

و بناء علی ذلك بدیهیات عقلیه یه منافی بر حادثه نقل و روایت ایدلسه  
بالبداهه رد اولنور

مثلا معجزه و کرامت کی خارق العاده بر سبب ایله اجتماع نقیضین  
وقوع بولدی دنیسه قبول و تصدیق اولنه ماز .

اما بدیهیات خارجیه ده محمولک موضوعه ثبوتی عقلا ضروری  
دکلدر بوجهته بدیهیات خارجیه استثنا قبول ایده ییلور و بونلرک

کلیتی چوق سوز کوتورر

مثلا مغزنیانک مسهل اولدیغی مجزوم ایکن بعض موانع جزئییه  
حیلولتیه حکمی تخلف ایتک عقلا ممکندر و بر حکیم طبیعی ( هر

مغزنی بالضروره و مطلقا مسهلدر بر وجهله استثنا قبول ایتز و اصلا  
تخلف ایده من ) دیو دعوی ایتسه اکا لانسلم دیرز و بودعواسنی



اثبات ایچون ایراد ایدہ جکی دلیلرز قضایای خارجیہ ایلہ مختلط اولہ جفندن انلرہ دخی بووجہلہ اعتراض ایدرز ارتق انک بو مثللو اعتراضاتی دفع وهردرلو احتمالات ذہنیہ پی ازالہ ایدوبده دعوای مشروحہ سنی قضیہ کلیہ اولق اوزرہ اثبات ایلمسی متعذردر کذلک باباسر چوجق اولق محال عادیدر یعنی عادت طبیعتہ منافیدر لکن محال عقلی دکلدر و احوال طبیعہ دہ شاذ و مستثنا شیلر کورلدیکی واردر ایستہ بوقبیلدن اولہ رق خارق العادہ بر سبیلہ باباسر بر چوجق اولق بدیہیات عقلیہ مناقض دکلدر و طبیعیونندن بری چیقبوبده باباسر چوجق اولہ ماز دیرایسہ بومدعاسنی بدیہیات اولیہ یہ مستند و منتمی دلیلرز ایلہ اثبات ایدہ مز

بناء علی ذلک بدیہیات خارجیہ یہ منافی کوریلان نصوص متواترہ نک تأویلنہ حاجت کورلمیوب ظاہری اوزرینہ ایقا اولنورلر و حکمای الہیون امکان عقلی دائرہ سنده معجزہ کبی خوارق عادہ پی قبول ایدرلر . بز ایضاح مرام ایچون صدیدن چیققدق و مباحث حکمیہ و کلامیہ یہ طالدق سوزی اوزاتدق ارتق صددہ عودت ایدہ لم

## فصل ثالث

( قضایانک اجزای ادلہ اولدقلری جہتلہ تقسیمی حقندہ در )

قضایا ادلہ نک اجزاسی اولدقلری جہتلہ یدی قسمدر قسم اول یقینیاتدر بدیہی اولسون نظری اولسون نتہ کہ بالادہ تفصیلاتی مرور ایلدی

قسم ثانی مشهوراتدر کہ یا جمیع ناس بیندہ مشهور اولوب

هرکس انلری تصدیق و اعتراف ایلر عدل کوزلدر . ظلم قبیحدر . قضیہ لری کبی و یاخود یالکز بر طائفہ عندندہ مشهور اولور ذبح حیوان چیرکیندر قضیہ سی کبی کہ یالکز ہندلیلر عندندہ مشہور و معترفدر

بو قضیہ لرنک سبب شہرتی یا مصلحت عامہ پی مشتمل اولمیردر آغا مذکور اولان عدل کوزلدر . ظلم چیرکیندر . قضیہ لری کبی . ویاناسک طبیعیلمرنده کی رفتدر نتہ کیم ضعیفہ باقق عمدوحدر دنیلدیکی کبی .

یاخود ناسک جیتلریدر کشف عورت مذمومدر قضیہ سی کبی . و یاخود شرابع و آداب و عادتلری اقتضاسیدر امور شرعیہ و سایر اصول و رسوم مرعیہ کبی

و شہرت بعضا بر مرتبہ یہ واررکہ اولیاتہ ملتبس و مشتبہ اولور وینلری شو و جہلہ فرق و تمیز اولنورکہ انسان کندینی عقلنہ مغایر اولان جمیع امور دن خالی فرض ایتسہ مجرد عقلیہ اولیاتی قطعیا حکم و تصدیق ایلر اما مشہوراتی بووجہلہ حکم ایلر . و مشہورات بعضا صادق و بعضا کاذب اولور اولیات ایتسہ بھمہ حال صادقدر .

وهر قومک آداب و عادتلری و ہرفن و صناعت اصحابنک صناعتلری اقتضاسنجہ کندولرینہ مخصوص مشہوراتی واردر .

قسم ثالث مسلماتدر یعنی خصمک عندندہ مسلم اولان قضیہ . لردر کہ متکلم حین مباحثہ دہ انلرہ استناد ایلر . نتہ کیم بر مسلمان ایلہ مباحثہ ایدن خرسیتیان معراج نبوی پی استبعاد ایتسہ مسلمان دخی عروج عیسی قضیہ سنے استناد ایدہ یلور



و بر حنی ایلہ بر شافعی مباحثہ ایدر کن ہر بریسی اصول  
فقہہ استناد ایدہ بیلور زیر مسائل اصول فقہ بالجملة فقہہا  
عندندہ مسلماتند

سائر علوم و فنونہ دخی بویلہ مسلم اتخاذ اولنان بر طاقم  
قضیہ لروارد در کہ مسائلی اثبات ایچون انلرہ استناد اولنور  
قسم رابع مقبولاتدر کبار علماء و مشایخ مثلاً مظنہ کرامدن  
مسموع و مأخوذ اولان نصیحتر کی

قسم خامس ظنیاتدر یعنی ظنی مفید اولان امارہ قضیہ  
لریدرتہ کیم کیچہ قرا کلقده طولاشان خرسزدر دنیلدیکی کی  
قسم سادس مخیلاتدر کہ کاذب اولدقلى مجزوم ایکن  
مجرد سامعه انبساط یاخود نفرت ویرمک ایچون تخیل  
اولنان قضیہ لردر .

نتہ کیم باده یا قوت سیالدر . بال بر نوع اکرنج قوصمو قدر  
دنیلدیکی کی

قسم سابع و همیاتدر کہ محسوس اولمیان شیرده و همک  
محسوساتہ قیاس ایلہ قطعیا حکم ایلدیکی قضیہ لردر .  
نتہ کیم بعض ناس مشاهده ایلدکری اجسامہ قیاس ایلہ  
هر موجودک مکان و جہتی واردر دیو حکم ایدرلر بو  
مثلاً قضایای و همیہ ایسہ بالادہ بیان اولندیغی اوزرہ  
ہپ جہلیات مرکبہ در .

## فصل ابع

( صناعات خمس بیانندہ در )

دلایلر بحسب المادہ بش قسمدر کہ بونلرہ صناعات خمس  
دنیلور .

برنجیسی برہاندر کہ مقدمات یقینیہ دن مرکب اولان بر  
قیاسدر بو مقدمہ لر کرک بدیہی اولسون و کرک نظری  
اولوبدہ بدیہی یہ طیانسون

نتہ کیم ( عالم متغیر در و هر متغیر حادثدر اویلہ ایسہ عالم  
حادثدر ) دیدیکمز کی

علم حساب و علم ہندسہ دلایلری ہب برہان جلیدر .  
برہاندن غرض اکل معارف اولان علم یقین حاصل ایتمکدر .  
ایکنجیسی جدلدر کہ مشہور اتدن یاخود مسلماتدن مرکب  
اولان قیاسدر

نتہ کیم ( بوایش ظلمدر هر ظلم ایسہ چیرکیندر اویلہ ایسہ  
بوایش چیرکیندر ) دنیلور

بروجہ بالا بر مسلمانک معراجی استبعاد ایدن بر خرسیانی  
عروج عیسی مسئلہ سیلہ اسکات ایلمسی دخی جدلدر  
حضرت عیسی علیہ السلامک باباسز تولد ایلدیکی انکار  
ایدن بر یہودی بی حضرت آدم علیہ السلامک ہم باباسز



وهمده اناسر مخلوق اولدیغی دلیلله اسکات اینک دخی بو  
قیلدندر

جدادن غرض خصمی الزام و برهانی ادرا کدن عاجز  
اولنری اقناعدر

وبویله اقناع ایچون ترتیب اولنان قیاس جدلی یه دلیل  
اقناعی دنیلور

او چنجیسی خطابه درکه مقبولات و ظنیاتدن ترکیب ایدن  
قیاسدر

ته کیم ادله نقلیه و اماره دلیللری هیپ بو قیلدندر . بوندن  
غرض ناسی کندولرینه فائده لو اولان شیرله ترغیب  
ومضر اولان شیردن تنفیردر ایشته خطیبرک و واعظبرک  
ایشلری بودر

وجناب حقک امرلرینه تعظیم و اطاعت و مخلوقاتنه رحم  
وشفقت خصوصلرنده طوغریسی خطابه نک فوائد جلیله سی  
واردر

ودردنجیسی شعردرکه مخیلاتدن ترکیب ایدن قیاسدر  
بوندن غرض ترغیب و یا تنفیر ایله نفسک تأثیردر

ته کیم شو قدحک ایچنده کی براعلی باده در باده ایسه یا قوته  
سیاله در دنیلسه نفس منبسط اولور و باده یه بالطبع  
رغبت ایدر

وشعرا کر موزون و کوزل سس ایله تغنی یه مقرون  
اولورسه تأثیری ده ازیاده اولور

بشنجیسی سفسطه درکه و همیاتدن ترکیب ایدن قیاسدر .  
ته کیم فرق ضاله دن بعضیلری باری تعالی حضرتلری  
موجود در و هر موجودک مکان و جهتی وارد در دیدکاری کی  
بومقوله سفسطه جیلرک غرضی ز عملرنجه تحصیل علمدر  
وحقیقت حالده بومثللو ادله فاسده نک ان بیوک فائده سی  
یلوبده اندن توقی واحترازدر

و برکیمسه نک بویله فاسد اولدیغی بیلرک ترتیب ایلدیکی قیاسه  
مغالطه دنیلورکه بوندن غرض دخی خصمی تغلیط و اسکاتدر  
بونک امثال مختلفه سی واردر از جمله دیوارده منقوش  
اولان صورت فرسه اشارت اولنه رق ( بوفر سدر و هر  
فرس صاهلدر ) دنیلدکده صورت فرسک صاهل  
اولسنی انتاج ایدر بو ایسه فاسددر زیرا صغر اده کی  
فرسدن مراد فرس صوری و کبر اده کی فرسدن مراد فرس  
حقیقی اولدیغندن حد اوسط تکرر ایتمز .

کذلک ( انسان حیواندر و حیوان جنسدر ) دنیلدکده  
انسان جنسدر دیو نتیجه ویرر

بونک سبب فساد دخی شکل اولده کبرانک کلیتی شرط  
ایکن کلیه مقامنده طبیعیه قول لانیلسیدر



## تذنیب

دلیل یالمی ویاخود انی اولور  
زیرا مؤثر ایله اثره استدلال اولنور ایسه لمی و اثر ایله مؤثره  
استدلال اولنور ایسه انی تسمیه اولنور  
مثلا کیجه وقتی اوزاقدن بر محله آتش کوریلوبده انکله اوراده  
دخان بولندیغنه استدلال اولنورسه دلیل لمیدر وکوندوزین دخان  
کوریلوبده انکله آتش بولندیغنه استدلال اولنورسه دلیل انیدر  
بونی دخی بلله ملیسین که دلیل اگر اخرک کلامنی نقل و حکایه به متوقف  
اولورسه دلیل نقلی والادلیل عقلی تسمیه اولنور

## لاحقه

قیاسلرک مقدمه لرندن بعضیلری چوق دفعه ظهورینه بناء طی  
اولنور انشای مباحثه و محاوره ده بوکا دقت ایله اکا کوره ترتیب  
قیاس اوانق لازم کلور

مثلا برکیمسه برایشی تقبیح ایده جک اولدقده (بوایش ظلمدر) دیر  
بو ایسه بر مقدمه سی مطوی اولان قیاسدر شویله که (بوایش ظلمدر  
وهر ظلم قبیحدر اوله ایسه بوایش قبیحدر) دیمک اوله رق شکل  
اولدن بر قیاس اولور فقط کبرای جله ناس عندنده مشهور اولمغله  
ذکرینه حاجت کورلمیوب صغراسنک ذکر یله اکتفا اولمشدر  
وکذا بر معامله تحقیریه ایله کیمسه نک کسر خاطرینه جسارت ایدن  
کسنه به نصیحت اوله رق (قلب قیرمق فناشیدر) دینلدکده شکل  
اولدن بر قیاس مطوی الصغری اوله رق (سنک بومعامله کقلب قیرمقدر  
قلب قیرمق ایسه فناشیدر اوله ایسه سنک بومعامله کفناشیدر)  
دیو ترتیب اولنور

کذلک برکیمسه رفیقنه قایق ایله بوغاز ایچنه کیده لم دیوبده اودخی  
(هوا سرتدر) دیسه مرادی (قایق ایله کیدلمز) دعواسنی اثبات  
ایچون (هوا سرت اولیجق قایق ایله کیدلمز لکن هوا سرتدر اوله

ایسه قایق ایله کیدلمز) دیو بر قیاس استثنائی مستقیم ترتیب ایتمکدر که  
واضعه سی مذکور و شرطیه سی مطویدر  
کذلک سنه باشی امتحانده کیرو قالان شا کرده (اگر بوسنه درسه  
لایقیله چالشمش اولیدیکنز امتحانده برنجی اولوردیکز) دینلدکده مراد  
(لکن برنجی اولیدیکنز اوله ایسه بوسنه لایقیله درسه چالشماش سکن)  
دیمک اولمسیله شرطیه سی مذکور و رافعه سی مطوی بر قیاس استثنائی  
غیر مستقیم اولور

منطق وکلام ومعانی و بیان کبی اسامی علوم و فنوندن بعضانفس  
مسائل و بعضا تصدیق مسائل و بعضا تکرر تصدیقات ایله حاصل  
اولان ملکه مراد اولور

واشبو اوجنجی معنایه کوره هر بر علم اول علمک حاوی اولدیغی مسائلی  
کرارا و مرارا ادراک و تصدیق ایده ایده حاصل اولان منکهدن عبارتدر  
ته که مقاله اولانک باب اولنده واقع فصل ثانینک اخرنده مرور ایلدی  
وایکنجی معنایه کوره هر بر علم اول علمک مسائلی دلیللری ایله تصدیق  
واثباتدن عبارتدر

و برنجی معنایه کوره هر بر علم بر طاق مسائلدن عبارتدر که مقدمه ده  
بیان اولندیغی اورزه بر جهت وحدت ذاتیه یاخود عرضیه ایله مضبوط  
وعلوم سائرده ن متمیز اوله رق بر علم مستقل اعتبار اولنور و عند المحققین  
بر علمک اجزاسی اول علمک مسائلندن عبارت اولور

و بعضا بر علمک مبادی سی دخی مسامحه اول علمک اجزاسندن عدو اعتبار اولنور.  
مبادی علوم ایکی قسمدر قسم اول مبادی تصوریه و قسم ثانی  
مبادی تصدیقیه در

مبادی تصوریه مسائلک موضوع و محموللرینک تعریفاتیدر.  
مبادی تصدیقیه بر علمک مسائلی اثبات ایچون ایراد اولنان ادله ایله  
اول ادله نک اجزاسی اولان قضیه لر در که اول علمک مسائلندن اولملری  
لازم کلز بلکه بشقه بر علمک مسائلندن اوله بیلور لر یاخود هیچ بر  
مدون علمک مسائلندن اولمازلر



ایشته بو قضیه لر بالذات بین یعنی بدیهی اولوب علوم متعارفه  
تسمیه اولنورلر نته که بالاده تفصیل اولندی  
یاخود نظری اولوب انجیق متعلمک عندنده مسلمدر و بودخی ایکی  
صنفدر که بری اصول موضوعه و دیگر مصادراتدر  
مصادرات اول قضیه لر در که متعلمک عندنده موقتا مسلم اتخاذ اولنور  
شوبله که فلان مجنده بیان اولنور دنیلوب متعلم دخی بوکا انتظار ایله  
موقتا انلری تسلیم ایلر

اصول موضوعه اول قضیه لر در که متعلم انلری مجرد معلنه حسن  
ظن ایله تصدیق و تسلیم ایلر

ننه که هندسه کتابلرینک مقدمه لرنده اصول موضوعه دیو بر طاقم  
قضیه لر بسط و تمهید قیلنور و بعده بونلردن برهین هندسیه ترتیب اولنور.  
سؤال

متعلمک اصول موضوعه بی حسن ظن ایله اذعان الیمسی بونلرک  
قضایای ظنیه دن اولسنی ایجاب ایدر برهان ایسه مقدمات یقینیه دن  
ترکب ایلر بو حالده اصول موضوعه برهین هندسیه نک مقدماتی اوله ماز.

جواب

بوراده ظندن مراد انجیق متعلمک معلنه حسن ظنندن نشأت ایدن  
اعتقاد جازمدر

سؤال

اوله ایسه اصول موضوعه هب قضایای تقلیدیه اولیق لازم کلور  
حالبوکه تقلیدیه دخی برهینک اجزاسندن اوله ماز

جواب

اصول موضوعه متعلمک عندنده یقینیاتدندر و متعلمه کوره تقلیدیه  
اوللری انلرک ذاتاً یقینییه اوللرینسه مانع اولماز بو جهته اصول  
موضوعه دن ترکب ایدن قیاسلر دخی برهانددر

علم منطقده مقصد اقصى برهانددر کلمه برهان ایله ختم کلام ایدلم

## آداب سداد

من

علم الآداب

اثر خامه احمد جودت

صاحب و ناشر لری

قره بت و قصبار

معارف نظارت جلیله سنک رخصتیله طبع اولمشدر

استانبول

(قره بت و قصبار) مطبعه سی — باب عالی جاده سنده نومرو ۲۵

۱۳۰۳



بسم الله الرحمن الرحيم

بحث و مباحثه بر کیمسه اثبات مدعایه قیام ایدوبده دیگر  
کسینه نك اکا اعتراض یعنی خصمانه مقابله ایتسیدر اما  
خصمانه اولیوبده مجرد بر شیئی او کر نك ایچون صور مق  
سؤال استفساریدر . بونك جوابی دخی سؤال اولنان  
شیئی اعلام و افهامدن عبارت اولسایله بو یولده وقوع  
بولان سؤال و جوابلر مباحثه قیلندن دکلدر .

مقام مباحثه ده جواب اکر نفس الامر بنا اولنور ایسه  
جواب تحقیقی دنیلور . و اکر نفس الامر ارا نمیوبده  
مجرد خصمك تسلیمه بنا اولنورسه جواب جدلی دنیلور  
و مقدمات برهانیه بی و بلکه خطا بیاتی بیله ادرا کدن  
عاجز و قاصر اولنلری اقناع ایچون جواب جدلی اختیار  
اولنوب بو یولده ایراد اولنان دلیل دلیل اقناعی و دلیل  
الزامی دنیلور .

بناء علی ذلك مباحثه یا اظهار صواب ایچون یعنی

حقیقت حالی میداننه چیقار مق ایچون اولور یا خود مجرد  
اسکات خصم ایچون اولور .

اظهار صواب ایچون جریان ایدن مباحثه یه مناظره و بو  
وجهله بحث ایدنلره مناظر دنیلور

مجرد اسکات خصم ایچون جریان ایدن مباحثه یه جدل  
و بو غرض ایله بحث ایدنلره مجادل دنیلور

مجادلك غرضی هر نصل اولورسه اولسون خصمنی  
اسکات ایتکدن عبارتدر .

اما مناظرک مقصدی مجرد حق و صوابی اظهار ایتکدر  
حق و صواب کرک کندو یدنده ظاهر اولسون و کرک  
خصمی یدنده ظاهر اولسون . بهمه حال صوابك کندو  
یدنده ظهورینی التزام ایتز . هله سلف صالحین هضم  
لنفس و دفعاً لحظ النفس صوابك ید خصمه ظهورینی  
ایسترلردی

مناظرلر اظهار صوابه موفق اوله بیلک ایچون موجه  
اولیان بحثلردن اجتناب ایتلیدر . زیرا بو بحثلر مقام  
مناظره ده قائده ویرمز . و بیهوده مناقشه لر ایله مطلوب  
اله کیرمز . آداب و اصول مناظره دن خارج سوزلرک  
ارقه سی انه ماز . بیهوده و قتلر کجا اظهار صواب اولنه ماز .




بناء على ذلك صناعت توجيه ناميله بر فن مستقل وضع  
اولنشدركه ابجاث كليهنك موجه اولوب اولديغني جهته  
احوالندن بحث ايدر . بوكا علم ادا ب بحث و علم مناظره  
دخي دنيلور .

مباحثاتك آداب سداد و صحتي بو علم ايله بيلنور .  
ومدافعاتك صحيحى فاسدندن و مقبولى مردودندن بو علم  
ايله فرق و تميز اولنور . بونك قواعدينه رعايت ايدنلر  
مناظرانده خطادن مصون اولورلر . وبوندن بي بهره  
اولنلر علم حكمت و علم كلام و علم اصول فقهي كركي كي  
تفهمن محروم قالورلر .

ايشته بو علمك مسائل مهمه سني جامع اولمق و معيار سداد  
دن صكره اوقونمق اوزره اشبو رساله نك تاليفنه ابتدار  
اولندي و آداب سداد ديو تسميه قلندي .

من الله التوفيق وهو الهادي الى الصواب



## مَقْدِمَةٌ

( اصحاب فن مناظره بيننده متداول و مشهور اولان )  
( اصطلاحاته دائر در )

بر مسئله بي درميان ايدن كيمسه يا ناقل و يا مدعي اولور  
ناقل بر كتابدن يا خود بر ذاتدن بر مسئله نقل و روايت  
ايدن كيمسه ديمك اولمغله اكا تصحيح نقل ايت دنيلور او  
دخي قنغي كتابده مذكور اولديغني بيان ايله نقلني تصحيح  
ايتدكده ارتق مؤاخذه اولنه ماز . فقط نقل بعضا نقض  
اولنور

مثلا بر كيمسه فلاسفه نك برندن حشر اجسادى نقل  
ايتدى دنيلسه ( بو نقل باطلدر زيرا بو نقل فلاسفه نك  
مذهبنه منافيدر و هر نقل كه بويله اوله باطلدر ) ديونقل  
مذكور نقض اولنور

وبرده ناقل اكر نقل ايتديكي مسئله نك صحتني التزام  
ايدرسه مدعي حكمنده بولنور  
هر مدعي دعواسني بر دليل ايله اثباته مجبور اولور



دلیلسز دعوی تحکمدر . تحکم ایسه مسموع دکلدر  
بناء علیه هر دعوایه دلیل ایستنیلور . مکرکه بدیهی  
اولورسه اکا دلیل ایستنیله مز . زیرا قضایای بدیهیه دلیل  
ایله اثباتدن مستغنیدر .

شوقدر وارکه بدیهی خفی اولور ایسه دلیل صورتنده بر  
فقره ایله خفاسی ازاله اولنور . و بو فقرهیه تنبیه  
دنیلور .

نته کیم عالمک متغیر اولدیغنی اثبات ایچون یعنی خفاسنی ازاله  
ضمننده تنبیه ایچون ( زیرا بز عالمده حرکات و اثار مختلفه  
مشاهده ایده یورز . اوله ایسه عالم متغیردر )  
دنیلدیکی کبی

بو مقامده دلیلدن مراد دلیل منطقی یعنی فن منطقده مبین  
اولان قیاس اولوب درت قسمه تقسیم اولنور که برهان  
واماره وجدل و مغالطه در

برهان ادله یقینیه دن مرکب و شروطنی جامع اولان  
قیاسدر که نتیجه یه علم یقین افاده ایدر

اماره مقدمه لرندن بریسی یاخود ایکیسی دخی ظنی اولان  
قیاسدر که نتیجه یه علم ظنی افاده ایدر

جدل ایکی مقدمه سندن بریسی یاخود ایکیسی دخی مشهورا-

تدن یاخود خصمک عندنده مسلماتدن اولان قیاسدر .  
بوندن غرض خصمی الزام واقناعدر

مغالطه من حیث الصورة یاخود من حیث المادة فاسد  
اولان قیاسدر که تغلیط خصم ایچون ترتیب اولنور  
قیاسک من حیث الصورة فسادی شرطلرینی مستجمع  
اولماسیله در

مثلا ( انسان حیواندر و حیوان جنسدر اوله ایسه  
انسان جنسدر ) دنیلسه شکل اولدن بر قیاس فاسد  
اولور زیرا کبراسی قضیه طبیعیه در شکل اولده ایسه  
کلیت کبرا شرطدر

قیاسک من حیث المادة فسادی حقه شیهه قضیه کاذبه یی  
محتوی اولسیله در

مثلا ( واجب تعالی حضرتلری موجوددر و هر موجود  
بر جهتده در ) دنیلسه شکل اولدن بر قیاس فاسد اولور  
زیرا کبراسی قضیه کاذبه در

مصادره علی المطلوب که نتیجه دلیلدن جزء قیلتمقدده در  
بو دخی من حیث المادة فساد قیلندندر . چونکه  
تیجیدی بیلک اوله دلیل بیلکه و دلیل دخی جزئی  
بیلکه موقوف اولدیغندن بالاخره نتیجه یی بیلک نتیجه یی



بیلکه توقف ایدر که بر شیئک نفسندن مقدم اولمی لازم  
کلور بو ایسه دور فاسد اولغله باطلدر

مثلا ( انسان بشردر و هر بشر ضاحکدر اویله ایسه  
انسان ضاحکدر ) دینلسه بر قیاس فاسد اولور .

زیرا انسانک ضاحک اولدیغنی بیلک بشرک ضاحک  
اولدیغنی بیلکه موقوف اولور انسان ایسه بشر دیمک  
اولدیغندن بر شیئ بیلنزدن اول بیلنمش اولمق لازم کلور بو  
دخی مصادره علی المطلوب اولغله انی مشتمل اولان قیاس  
دوری بر قیاس فاسد اولور

کذلک ( هر انسان ضاحکدر و هر ضاحک متعجبدر )  
اویله ایسه هر انسان متعجبدر ) دینلده صکره کبرایی  
اثبات ایچون ( هر ضاحک انساندر و هر انسان متعجبدر  
اویله ایسه هر ضاحک متعجبدر ) دینلسه دلیل اولک  
نتیجه سی کبراسنی اثبات ایچون کتوریلان دلیلک جزئی  
اولغله بو دخی دور فاسد قییلندندر

اثبات مدعی ایچون نصب نفس ایدن کیسه یه معلل  
و مستدل واکا اعتراض ایدن کسنه یه سائل دنیلور .  
معلل کندی دعواسنی قواعد علم منطقه توفیقاً بر دلیل  
ایله اثبات ایدر

سائل دخی اول دلیلک مقدمه لرندن قنغیسنی تسلیم ایتمز  
ایسه لانسلم دیو معللدن اکا دلیل ایستر

ایشته سائلک بو وجهله وقوعبولان اعتراضی منع دیو  
تسمیه اولنور . و بوکا مناقضه دخی دنیلور . یاخود  
سائل اول دلیلک مقدمه لرینی تشریح کیریشیموب انجق  
نفس دلیلک بطلاننی بر دلیل ایله اثبات ایلر .

انک بو وجهله اعتراضه دخی نقض دنیلور که علم اصول  
فقه اصطلاحتجه مناقضه تسمیه اولنور .

ویاخود سائل نفس دلیلله دخی تعرض ایتمیوب انجق  
معللک دعواسنی ابطال ایدر یعنی بر دلیل ایله اول دعوا  
نک نقیضنی اثبات ایلر . بوکا دخی معارضه دنیلور  
الحاصل سائلک اوچ منصبی یعنی اوچ وظیفه سی واردر که  
منع نقض معارضه در . بو طرق ثلثه نک هر یرنده معلک  
دخی وظائف معینه سی واردر

فقط کرک سائلک اعتراضی و کرک معللک جوابی موجه  
اولمق لازمدر . موجه اولمز ایسه ارباب فن مناظره  
عندنده مسموع دکلدر

( توجیه ) مناظره سوزینی حصصک سوزینه مقابل وانی  
دافع اولور وجهله ایراد الملکدر



اگر مناظره سوزی حصصك سوزینه مقابل کلمز ایسه  
موجه اولماز

مثلا معل (شو قرالتی انساندر) دعواسنی اثبات ایچون  
(زیرا شو قرالتی نطق ایدیور وهر نطق ایدن انساندر)  
دیوبده سائل دخی بن انک بیاض اولدیغنی تسلیم ایتم  
دیسسه مقدمه غیر ملترمه بی منع ایتمش اوله جغی جهته  
موجه اولماز. زیرا بر شیئک بیاض اولماسندن ناطق  
اولماسی لازم کلمز ناطق زنجی اوله بیلور بناء علیه سائلک  
ومعلک کلامری یکدیگری جرح ایتمز بو جهته ایکیسنک  
کلامری بیننده مقابله بولنماز

کذلک سائلک کلامی مستدلک کلامنه مقابل اولوب انجق  
انی دافع اولسه ینه موجه اولماز

نته کیم بدیهیات اولیده دن یا فطریه دن اولان مقدمه بی منع  
ایتمک کبی که سائلک منعی هر نقدر مستدلک کلامنه مقابل  
اولور ایسه ده انی دافع اوله ماز.

زیرا اولیاتدن یا فطریاتدن اولان قضیه بی منع ایتمک  
مکابره در.

مشاهدات و مجربات و حدسیات و متواترات انجق اصحابنه  
علم یقین افاده ایدوب بشقه سنک علیه نه دلیل اولماز ایسه.

ده مشاهده و تجربه و حدس و تواتر اگر جمیع ناس  
عندنده مشترک اولور ایسه بونلری منع دخی مکابره  
اولور. کونشک طلوعنی و بغدادک وجودینی انکار  
ایتمک کبی

سائلک عندنده مطلبه موافق اولان علم ایله معلوم بولنان  
مثلا مقام برهانیده علم یقینی ایله و مقام ظنده علم ظنی  
ایله و مقام تقلیدده علم تقلیدی ایله و الحاصل سائلک  
بر وجهه معلوم و مسلمی اولان مقدمه بی منع ایتمی دخی  
مکابره در

مثلا اهل دیانت اولان کیمسه یا برهان ایله و یا تقلید  
ایله عالمک حادث اولدیغنه جزما معتقد اولمسایله عالمک  
حدوثنی منع ایتمی و فلاسفه دن برینک بالعکس قدم عالمی  
منع ایلمی مکابره در

(مکابره) بیلور کن مخالف و عناد ایتمک معناسنه در انجق  
اهل فن مناظره عندنده اظهار صوابه نفی اولمیان کلام  
ایله منازعه دیمکدر

بناء علیه سائلک کندی عندنده بوجه بالا معلوم و مسلم  
اولان مقدمه بی یا خود مثبت اولان بر دعوایی منع ایتمی  
مکابره اولدیغنی کبی بلا دلیل بر دلیلی یا خود بر دعوایی  
ابطال ایلمی دخی مکابره ده داخل اولور هر نه درلو



اولور ايسه اولسون مكابره خصمك سوزيني دافع اولديغي  
جهتله مسموع اولماز

ايسته سؤال بر منوال مشروح موجه اولمق لازم كلديكي  
كي جوابي دخی كذلك موجه یعنی سؤاله مقابل وانی  
دافع اولمق لازمدر

شویله كه سائل اكر بر مقدمه بی منع ایدرسه معلل انی اثبات  
ایتمك لازم كلور یو خسه منع ایله مدافعه ایده مز . زیرا  
لانسلم دیو واقع اولان اعتراضه لانسلم ایله جواب ویریه مز  
ودلیل ایستیانندن دلیل ایسته نیله مز . بلکه بر دلیل ایله  
اول مقدمه ممنوعه نك اثباتی لازم كلور وسائل بو ایکنجی  
دلیلک مقدماتندن برینی منع ایدرسه معلل انی دخی بر دلیل  
ایله اثبات ایدر . وهکذا سائل منع ایتدجكه معلل دخی  
استدلاله دوام ایلر . وسائل اكر معمله نقض یا معارضه  
ایله مقابله ایدر ايسه اول حالده سائل بولنان کیمسه معلل  
اولور و معلل بولنان کیمسه سائل اوله رق منع یا استدلال  
وظیفه لری انك الینه کچوب اودخی طریق منعی التزام  
ایدرسه خصمی استدلال ایله مشغول قالور . واکر نقض  
یا معارضه یولنه کیدرسه خصمی ینه سائل اولور وهکذا  
برینك وظیفه سی دیگرینه انتقال ایده بیلور نهایت یا معللک

دلیلی بدیهیاته مستند اوله رق سائلک بر دیه جکی قالمیوب  
معلل انی اسکات ایلش اولور .

ویا خود معلل اثباتدن عاجز قالوب سائل انی اسکات ایلش اولور  
معلل سائلی اسکات ایلسنه الزام و سائلک معللی اسکات  
ایلسنه افحام دنیلور

وهر حالده عاجز قالانه مغلوب و مبهوت و حصمی عاجز  
قیلانه غالب دنیلور

غلبه جه الزامک قوتی افحامدن زیاده در . زیرا بر مقدمه نك  
منعی قولایدز . اما اثباتی کوجدر . لانسلم دیمك سور  
ایچندن مدافعه یه بکزر . استدلال ايسه آچقدن خصمك  
اوزرینه یوریمك کبیدر . بناء علیه هر کیم مستدل اولور  
ايسه بارکران مباحثه انك اوزرنده بولنور

بالاده بیان اولندیغی اوزره مناظرک مقصدی مجرد اظهار  
صوابدن عبارت اولمسيله مناظر اولان سائل ابتدا دلیل  
معللک مقدمه لرینی تفتیش ایلر و قنغیسنی اثباته محتاج کورر  
ايسه آنی منع ایدر . واکر وهله اولاده منع ایده جك  
بر مقدمه کوره مز ايسه اول حالده استدلال یعنی نقض  
یا معارضه یولنه کیدر والحاصل وظایف ثلثه دن قنغیسی  
مقصده اوفق ايسه انی اختیار ایلر مفهم یا ملزم اولمقدن  
احتراز ایتمز



سائل مجادل ایسه کندی دلیلنه کرکی کبی کو کند بجه اسلم  
طرق اولان منعی براغوبده همان طریق استدلاله کیمز .  
فقط الزام خصم ایله اظهار فضل ایچون بحث ایدن اصحاب  
جدلدن بعضیلری بو دقیقه لردن غفلت ایله همان طریق  
استدلاله سکر در . و بعضاً افراط حرص و تهالك ایله بلا  
موجب خصمک وظیفه سی اولان استدلالی غصب ایدر .  
حالبوکه حصن منیع معدن چیقوب کندوسی خصمک  
منوعنه هدف ایتش اولور . و اکثریامنع ایله خصمکی افحام  
ایده بیله جک ایکن وادی استدلالده کندوسی مفحم قالور

( غصب ) سائلک بر مقدمه بی منع ایده جک یرده دلیل ایله  
ابطال ایتسیدر که مقام مناظرده مردوددر چونکه غاصبک  
دلیلی اول مقدمه بی دافع اولدیغی جهته موجه اولسه  
بیله کندوسی سائل بولندیغی جهته معلدن دلیل ایسته مک  
وظیفه سی ایکن بونی براغوبده اول مقدمه نک بطلانی ادعا  
و اثبات بولنه کیدرک خصمک منصبی اولان استدلالی الندن  
المش اولدیغنه مبنی نظر ارباب مناظرده مقبول دکدر

بو مقامده مقدمه دن مراد دلیلک یا لکز جزئی لری دیمک دکدر  
بلکه صحت دلیلک موقوف علیهی اولان شی دیمکدر که  
ادلته نک اجزاسنه شامل اولدیغی کبی شرائطنه و تقریبه

دخی شامل اولور . زیرا بر دلیلک صحتی جزئی لریک صحتنه  
موقوف اولدیغی کبی شرط لریک مجتمع و تقریبک تام اولسنه  
دخی توقف ایدر

ادلته نک اجزاسی صغرا و کبراسی یاخود شرطیه سیله  
واضعه سی یارافعه سیدر . شرائطی ایسه علم منطقده  
مفصلاً مبین و مشروح او امله بوراده تفصیله حاجت یوقدر  
ادلته نک اجزاسی بر ردعوای صریحه اولدیغی کبی شرط لری  
دخی بر ردعوای ضمنیه در .

از جمله شکل اولدن بر قیاس ترتیب ایدن کیمسه بو دلیلک  
صغراسی موجه و کبراسی کلیه در دیو ضمنا دعوی ایتش اولور  
دلیلک تقریبی مطلوبی مستلزم اولور وجه اوزره سوقیدر  
بودخی بر ردعوای ضمنیه در . زیرا هر کیم بر دلیل کتورسه  
ضمنا بو دلیلک تقریبی تمامدر دیو دعوی ایتش اولور  
تقریبک تمامیتی بحثنه کلنجه اکر نتیجه مطلوبک عینی یاخود  
اکا مساوی و یاخود اندن مطلقاً اخص اولورسه دلیلک  
تقریبی تامدر

مثلاً ( بعض حیوان ناطقدر ) دعواسنی اثبات ایچون  
( زیرا بعض حیوان انساندر و هر انسان ناطقدر ) دیدیکمزه  
مطلوبمز اولان ( بعض حیوان ناطقدر ) دعواسنک عینی  
انتاج ایدر



ینه بودعوایی اثبات ایچون (زیرا هر ناطق متحرك بالا راده در و هر متحرك بالا راده حیواندر) دیدیکمزده (هر ناطق حیواندر) دیو نتیجه ویروب بودخی مطلوبمز اولان (بعض حیوان ناطقدر) قضیه سنه مستویا منعکس اولور . عکس مستوی ایسه اصل قضیه یه مساویدر

وینه بودعوایی اثبات ایچون (زیرا بعض حیوان انسان اسوددر و هر انسان اسود زنجیدر) دیدیکمزده (بعض حیوان زنجیدر) دیو نتیجه ویرر که مطلوبمز اولان (بعض حیوان ناطقدر) قضیه سندن مطلقا اخص اولور اخص ایسه اعمی مستلزمدر

ایشته بواوچ صورتده دخی دلیلز مطلوبی مستلزم اولمغله تقریبی تامدر

واکر نتیجه مطوبدن مطلقا یاخرد منوجه اعم اولور ایسه دلیلک تقریبی تمام اولماز . زیرا . اعم اخصی مستلزم دکدر

مثلا (شوقرالتی انساندر) قضیه سنی اثبات ایچون (زیرا شوقرالتی متحرك بالا راده در و هر متحرك بالا راده حیواندر) دیدیکمزده (شوقرالتی حیواندر) دیو نتیجه ویرر بو نتیجه ایسه مطلوبمزدن مطلقا اعمدر . بوجهته اول قرالتینک

حیوان اولسندن انسان اولسی لازم کلیوب بشقه بر نوع حیوان اولسی محتمل و ملحوظدر بناء علیه دلیلز مطلوبی مستلزم اوله جق وجهله سوق اولنماش دیمک اولسیله تقریبی تام دکدر

کذلک قراکلقده کورینان بر جسمک انسان اولدیغنی اثبات ایچون (زیرا بو جسم قراکلقده کورینیور وهرشی که قراکلقده کورینه بیاضدر) دیدیکمزده (بو جسم بیاضدر) دیو نتیجه ویرر . حالبوکه بیاض ایله انسان بیننده عموم وخصوص من وجه بولندیغندن اول جسمک بیاض اولسیله انسان اولسی لازم کلز بوجهته دلیلک تقریبی تمام اولماز .

اما نتیجه نک مطلوبه مباین اولدیغنی صورتده تقریبک تما . میتی متصور دکدر

نته کیم (شوقرالتی طاشدر) دیو دعوی ایتدکن صکره (زیرا شوقرالتی متحرك بالا راده در و هر متحرك بالا راده حیواندر) دیو استدلال ایتک کبی

ایشته مستدل اولان کیمسه دلیلنی بویله مطلوبی مستلزم اوله جق وجهله سوق ایده بیلک ایچون کمال بصیرت اوزره ترتیب مقدماته اهتمام وسائل دخی دلیلک مقدمات صریحه وضمنیه سنه دقت ایدرک اکا کوره سؤاله قیام ایتلیدر



وايكیسی دخی تائی ایله طاورانوب یکدیكر افاده سنی  
کوزلجه تفهم ایتدکدن صکره مدافعه ایتک آداب  
مناظره دندر .

بناء علیه بری دیگرک کلامنی لایقیله اکلامدیغی حالده  
تکرار ایتدیرمک و مرادی نه اولدیغی استفسار و استیضاح  
ایک جائزدر

تعیین طریق دخی دأب مناظریندن دکلدر

یعنی سوزی اوزاندک یاخود دلیلکده حشویات وار  
ویاخود افاده لک واضح دکل شویله دیملیسین بو وجهله  
افاده ایتلیسین دیو معلله یول کوسترمک صد ددن چیقوبده  
اظهار صوابه مدار اولمیان سوزلرایله او غراشقی دیمک  
اولدیغی جهته موجه دکلدر .

فقط معلک دلیلینی شاهدایله ابطال ایتدکدن صکره بو  
دعوانک اثباتده صواب اولان شویله دیمکدر دنیلک  
تعیین طریق قیلندن اولیوب بلکه وظائف ثلثه نک  
ایکنجیسی اولان نقض قیلندندر

الحاصل مقام مناظره ده سائلک موجه و مقبول اولان وظائف  
منع و نقض و معارضه دن عبارتدر بو وظائف ثلثه دن هر  
برینک کیفیت اجرایی و هر برینه قارشو مستدلک صورت

مدافعه سی بوجه آتی برر باب مستقلده بیان و تفصیل  
اولنه جقدر

فقط شوراسی معلوم اولمیدر که بوراده نقض و معارضه دن  
مرادیمز نقض حقیقی و معارضه تحقیقه در نقض شبیهی ایله  
معارضه تقدیریه شامل دکلدر

(نقض شبیهی) معلل هنوز دعواسنی اثبات ایتدن سائل  
انی شویله برفسادی مستلزمدر دیو دلیل ایله ابطال ایتکدر  
(معارضه تقدیریه) کذلک معلل هنوز دعواسنی اثبات  
ایتدن کتوره جکی دلیل مقدرینه معارضه در یعنی سنک  
بودعوانی اثبات ایده جک دلیلک واریسه بنده خلافتی  
اثبات ایدر دلیل وار دیو اول دعوانک نقیضنی اثبات ایله  
هنوز ایراد اولنمیان دلیل معارضه در .

کریک نقض شبیهی و کریک معارضه تقدیریه معلله دعواسنک  
اثباته میدان ویرمیدرک همان استدلاله قیام ایدیورمکدن  
عبارت اولمسیله غصب قیلندندر بو جهته انلرک  
احوالندن بحث اولنمیه جقدر



## باب اول

(سائلك منعی و معلك اكا جوابی حقنیده در)

بالاده بیان اولندیغی اوزره منع مقدمه معینه یه دلیل  
ایستمدن عبارتدر که بو مقدمه ممنوعدر یا اثباته محتاجدر  
و یا مسلم دکلدر یا خود لانسلم و یا خود علیک البیان کبی بر  
سوزایله ادا اولنور

یا لکز بویله طلب دلیل ایله اکتفا اولنور ایسه منع مجرد  
دنیلور و اگر بونی تأیید ایدر برسوز علاوه اولنور ایسه  
منع مع السند دنیلور

مثلا مستدل بر جسمك حیوان اولدیغنی اثبات ایچون (بو  
جسم متحرکدر و هر متحرک حیواندر) دیوبده سائل دخی  
(بودلیك کبراسی ممنوعدر یا خود مسلم دکلدر) دیسه منع  
مجرد اولور . و اگر کبری مسلم دکلدر دیدکدنصکره  
نیچون جائز دکل که متحرک اغاج اولسون دیسه یا خود  
نصل تسلیم ایده یم که بعضا روزکار ایله اغاجلر متحرک  
اولور دیسه و یا خود اول جسم اگر متحرک بالاراده اولسیدی  
واقعا حیوان اولوردی حالبوکه متحرک بالاراده اولدیغی  
ممنوعدر دیسه اشبو اوج صورتده دخی منع مع السند  
اولور

بعضا سندی ایضاح ایچون برسوز دهها علاوه اولنور .  
و اكا تنویر سند دنیلور

ته کیم مثال مذکورده نیچون جائز دکل که متحرک اغاج  
اولسون دنیلدکدن صکره تنویر برسند اوله رق کور میور .  
میسین که بعضا روزکار ایله اغاجلر متحرک اولور دنیلور  
سند بعضا دلیل صورتده ایراد اولنور

ته کیم مثال مذکورده (کبری ممنوعدر زیرا هر متحرک  
حیوان اولسه روزکار ایله متحرک اولان اغاجلر دخی  
حیوان اولق لازم کلور بوا یسه باطلدر) دنیلور

بوندن مقصد انجق سندك قوتلی اولدیغنی اشعاردر یوخسه  
حقیقه دلیل کتورمك دکلدر و الامقدمه ده بیان اولندیغی  
اوزره غصب قیلندن اولور

سند یا منعه مساوی و یا ائندن مطلقا اخص اولمیدر که مانعه  
نافع یعنی منعی مؤید اوله . یوخسه مطلقا یامن وجه اعم  
اولور سه نافع اولماز

مثلا معلل (بوقرالتی ضاحك دکلدر زیرا بوقرالتی انسان  
دکلدر هر ضاحك ایسه انساندر اویله ایسه بوقرالتی  
ضاحك دکلدر) دیوبده سائل دخی صغری مسلم دکلدر  
نیچون جائز دکل که بوقرالتی ناطق اوله دیر ایسه سندی  
منعنه مساوی اولور . و اگر نیچون جائز دکل که زنجی



اوله دیر ایسه سندی مطلقا اخص اولور . و بویکی صورتده مانعک سندی کندویه نافع اولور . و اگر نیچون جائز دکل که حیوان اوله دیر ایسه سندی منعدن مطلقا اعم اولور .

و اگر نیچون جائز دکل که سیاه اوله دیر ایسه من وجه اعم اولور . و بویکی صورتده دخی سندی کندویه نافع اولماز

مقدمه ده بیان اولدیغی اوزره ادله نك شرائطی بر ردعوای ضمیمه اولدیغندن سائل انلری دخی منع ایده بیلور

ازان جله معلل شکل اولدن ترتیب ایلدیکی قیاسه قضیه طبیعییه کی کبری قیاسه سائل ( بودلیک تحقق شرائطی ممنوعدر نصل ممنوع اولمیه که کبراسی قضیه کلیه اولسی شرطدر ) دیو منع ایله اعتراض ایلر کذلک دلیک تقریبی بر ردعوای ضمیمه اولدیغندن سائل انی دخی منع ایده بیلور

مثلا معلل ( شوقرالتی انساندر زیرا اراده سیله حرکت ایده یور و هر نه که اراده سیله حرکت ایلیمه حیواندر ) دیدکده سائل بودلیک تمامیت تقریبی ممنوعدر چونکه بوندن لازمکلان بوقرالتینک حیوان اولمسیدر حالبوکه برشیئک حیوان اولمسندن انسان اولسی لازم کلز انساندن

بشقه برنوع حیوان اوله بیلور دیو اعتراض ایلر . و بعضا مقدمه لک بر احتمال کوره بری و دیگر احتمال کوره دیگر برنوع اولور . شویله که سائل اگر مرادک بو ایسه فلان مقدمه ممنوعدر و اگر مرادک شو ایسه فلان مقدمه ممنوعدر دیو منعی تردید ایلر مثلا معلل ( قاشق قوللانمق بدعتدر و هر بدعت مکروهدر اولیه ایسه قاشق قوللانمق مکروهدر ) دیدکده سائل اکا بدعتدن مرادک امر دینده بدعت دیمک ایسه صغری ممنوعدر و اگر مرادک بدعت لغویه یعنی صکره دن ایجاد اولنش برشی دیمک ایسه کبری مسلم دکلدر ماکل و ملابس کی امور عادیده صکره دن ایجاد اولنش نیجه شیر واردر که امر دینه طو . قونور برلری یوقدر بونلرک ایسه مکروه اولدیغی ممنوعدر دیو اعتراض ایلر

وسائل بعضا مقدمه مطویه ده تردید ایله بر تقدیره کوره مقدمه مطویه بی و دیگر تقدیره کوره تقریبی منع ایلر مثلا معلل ( شوقرالتی انساندر زیرا متحرک بالاراده در ) دیدکده سائل اگر کبرای مطویه ( هر متحرک بالاراده انساندر ) قضیه سی ایسه ممنوعدر و اگر ( هر متحرک بالاراده حیواندر ) قضیه سی ایسه تقریب ممنوعدر دیو تردید ایله اعتراض ایلر



سائل بروجہ بالا بر مقدمہ بی منع ایتدکده معلل انی دلیل  
ایله اثبات ایلر

مثلا معلل (عالم حادث اولیجق بهمه حال انک بر موجودی  
اولمق لازم کاور حالبوکه عالم حادثدر اویله ایسه عالمک  
بر موجودی وارد) دیوبده سائل بودلیک واضعه سنی  
منع ایلسه معلل (زیرا عالم متغیردر وهر متغیر لحادثدر)  
دیو واضعه سنی اثبات ایدر

برده سائلک سندی منعه مساوی اولوبده معلل انی ابطال  
ایلسه مقدمه ممنوعه سنی اثبات ایلش اولور

نته کیم بر جسمک انسان اولدیغنی منع ایدن سائل نیچون  
جائز دکل که ناطق اولسون دیوبده معلل انک ناطق  
اولدیغنی ابطال ایسه انسان اولدیغنی اثبات ایلش اولور  
زیرا احد متساوینک ارتفاعی دیگرینک ارتفاعی مستلزم  
اولور

مطلقا اعم اولان سند بروجہ بالا مانعه نافع دکل ایسه ده  
انک ابطالی معلله نافع اولور

نته کیم مثال سالف الذکر ده سائل نیچون جائز دکل که  
حیوان اولسون دیوبده معلل انک حیوان اولدیغنی ابطال  
ایسه انسان اولدیغنی اثبات ایلش اولور .

زیرا اعمک ارتفاعی اخصک ارتفاعی مستلزم اولور اما  
سند مساوی یا مطلقا اعم اولماز ایسه انک ابطالی معلله قائده  
ویرمز

سائلک بروجہ بالا منع ایله اعتراض ایتسی اوزرینه معلل  
بعضا تحریر مراد ایله جواب ویرر . شویله که مقدمه ممنوعه  
عه دن یا خود انک موضوعندن ویا محمولندن مرادم شودر  
دیو مانعک اعتراضی دفع ایدر

مثلا معلل (شو قارشوده طوران سویلیور وهر سویلین  
انساندر اویله ایسه شو قارشوده طوران انساندر) دیوبده  
سائل دخی بودلیک کبراسی ممنوعدر محتملدر که شو قارشوده  
طوران طوطی کبی سویلر برنوع قوش اوله دیدکده معلل  
بنم مرادم بالطبع سویلر دیمکدر دیو تحریر مراد ایله جواب  
ویرسه سائلک اعتراضی مندفع اولور . زیرا نطق طبیعی  
انسانک فصلیدر فصل ایسه نوعه مساویدر بناء علیه هر  
حیوان که بالطبع سویلیه انساندر بونی منع ایتک مقدمه  
بدیهیه بی منع دیمک اولور بوا یسه باطلدر دیو منعی ابطال  
ایله مقدمه ممنوعه بی اثبات ایلش اولور . بناء علی ذلک  
تحریر مراد دخی بالواسطه مقدمه ممنوعه بی اثبات دیمک اولور  
الحاصل سائل بر مقدمه بی منع ایتدکده معللک وظیفه سی



یا بر دلیل ایله بالذات یا خود بروجہ بالا ابطال سند و یا  
تحریر مراد ایله بالواسطه مقدمه ممنوعه بی اثبات ایتلکدر  
سندی یا خود تنویر سندی منع ایتلک فائده ویرمز زیر ابونلری  
یوق فرض ایتلک منع مجرد قالور . و معلل ینه مقدمه  
ممنوعه بی اثباته مجبور اولور

وسائل بعضا مقدمه لردن برینی منع ایتدکدن صکره انی  
تسلیم ایله دیکرینی منع ایدر . بوکا تنزل و مجارات خصم  
وارخاء عنان بحث دنیلور که خصمه مماشات قبیلندن اوله .  
رق بر مقدمه بی تسلیم دیمک اولوب یوخسه حقیقه تسلیم  
و تصدیق دکلدر . بناء علیه معلل بو مقدمه لک ایتکیسنی  
دخی اثبات ایتدکجه مدعاسنی اثبات ایتش اولماز

مثلا معلل طون کیمک مکروهدر دیو ادعا ایدوبده بونی  
اثبات ایچون (وقت سعادتده طون اولیوب صکره دن  
احداث اولنشددر و هر شی که وقت سعادتده اولیوبده  
صکره دن احداث اولنمش اوله مکروهدر) دیمسی اوزرینه  
سائل دخی صغری مسلم دکلدر انی تسلیم ایتسم کبرایی تسلیم  
ایتم چونکه جامع شریفلرک مناره لری کبی صکره دن ایجاد  
اولنمش نیجه شیلر وار که مکروه دکلدر دیسه صغرای  
تسلیم ایله خصمه ارخاء عنان ایتش اولور یوخسه انی  
حقیقه تسلیم ایتش اولماز

بروجه بالا معلل بالذات یا خود بالواسطه مقدمه ممنوعه بی  
اثبات ایدمه میوبده سائله سنک سوزلرک قواعد نحویه یه مغا  
یردر یا خود سنک اعم اولمق حسیله سندیته صالح دکلدر  
یوللو سوزلر ایله صدددن چیقار ایسه دعواسنی اثباتدن  
عاجز قالمش و مفهم اولدیغنی ستر ایله دفع حجاب ایچون  
بشقه بحثه کچمش و اولکی بحث بتمش دیمک اولور  
ایشته علم آدابده (بر بحثدن بحث اخره انتقال ایتلک افحامدر)  
دیو مندرج اولان مسئله نک معناسی بودر . سائلک اعتر  
اضی اوزرینه معلل کندی دلیلنی اتمامدن عاجز قالوبده  
بشقه دلیلله انتقال ایتسی دخی بوفک اصطلاحیجه برنوع  
افحامدر

چونکه دلیل ثانی بحث دیکر عد اولندیغندن معلل اولکی  
دلیللی باشه چیقاره میوبده انی ترک ایتسیله اولکی بحث  
منقطع و معلل انده مفهم اولمش صاییلور لکن بودخی اهل  
فن بیننده بر امر اعتباری و اصطلاحیدر یوخسه حقیقت  
حالده افحام دکلدر . زیرا مقصد اصلی اثبات مدعادر  
معلل ایسه دلیل ثانی ایله انی اثبات ایدیچک خصمنی الزام  
ایله مقصدینی حصوله کتورمش اولور  
امامعللک دلیل اولی ترک ایتسی عجزندن ناشی اولیوبده  
بلکه مقدمه ممنوعه بی اثبات ایله اول دلیل تصحیح و اتمامه



مقتدر ایکن بووجهله سوزی اوزاتمقدن ایسه سائلک اصلا  
دیه جکی قالمیه جق صورتده واضح و جلی بر دلیل ایله انی  
الزام ایدیورمک اوزره بشقه دلیله انتقال ایتسی بر دلیله  
دلیل اخرک ضم و علاوهمسی دیمک اوله رق الخام و انقطاع  
بحث قیلندن عد و اعتبار اولنماز

## باب ثانی

( سائلک دلیلی نقض ایتسی و بونک اوزرینه )  
( معلک کیفیت مدافعه سی بیاننده در )

معلک دلیلی ابطال ایچون ناقضک کتوردیکی دلیله  
شاهد دینور

شاهد ایکی قسمدر قسم اول بر مادهده معلک دلیلی جاری  
و حکم مدعا ایسه متخلف اولمقدر

قسم ثانی معلک دلیلی اجتماع نقیضین و دور و تسلسل  
کی دیگر فسادی مستلزم اولمقدر

قسم اولک تقریری بووجهله درکه بودلیل فلان مادهده  
جاری و حالبوکه حکم مدعا متخلفدر و هر دلیل که حال  
و شانی بویله اوله فاسددر اویله ایسه بودلیل دخی فاسددر  
دنیلور

بو شاهدک کبراسی منع اولنه ماز . زیرا بر دلیل بر مادهده  
جاری اولوبده حکم مدعانک متخلف اولمسی قابل اوله ماز  
اما صغراسی منع اولنه بیلور . زیرا اشبو صغری ایکی  
مقدمه بی متضمندرکه جریان و تخلف ماده لریدر و بو مقدمه  
ضمنیه لردن هربری منع اولنه بیلور

شویله که ناقضک خصمی طرفندن بنم دلیلک اول مادهده  
جاری اولدیغی مسلم دکدر واقعاسنک اکلادیغک کی  
اولیدی جاری اولوردی حالبوکه بنم مرادم شودر دیو  
دلیلک جریانی منع اولنور . یاخود جریانی تسلیم ایله حکم  
مدعانک تخلفی منع اولنور . و ناقضک اولکی صورتده  
جریانی و ایکنجی صورتده تخلفی اثبات ایتسی لازم کلور  
مثلا فلاسفه دن بری عالمک قدیم اولدیغنی اثبات ایچون  
( زیرا عالم اثر قدیمدر و هر اثر قدیم قدیمدر ) دیو استدلال  
ایدوبده سائل دخی ( سنک بودلیلک انسانده دخی جاریدر  
حکم مدعا یعنی قدم ایسه متخلفدر یعنی انسان دخی اثر  
قدیم اولدیغنی حالده قدیم دکدر و هر دلیل که بویله اوله  
فاسددر اویله ایسه بودلیل دخی فاسددر ) دیو دلیل  
مذکورری نقض ایتدکده اول فلسفی بنم مرادم بالذات  
اثر قدیم دیمکدر انسانک تکویننده ایسه ادوار فلکیه  
و استعدادات هیولانیه نک دخلی واردر بناء علیه دلیلک



انسانده جریانی مسلم دکلدر انی تسلیم اینسم حکم مدعانک  
تخلفنی تسلیم ایتیم چونکه افراد انسانیه حادث ایسه ده جائز که  
نوع انسان قدیم اوله ( دیه بیلور . و ناقض اولان کیمسه  
اولکی صورتده دلیلک انسانده جریانی و ایکنجی صورتده  
حکم مدعانک تخلفنی یعنی نوع انسانک قدیم اولدیغنی اثباته  
محتاج اولور

ایشته منعک طریق اسلم اولدیغنی بونکه دخی متضح  
اولور که سائل نقض یولنه کیتدیکی ایچون استدلال ایله  
اوغراشمغه مجبور اولور حالبوکه دلیلک کبراسنی یعنی  
( هر اثر قدیم قدیمدر ) مقدمه سنی منع ایتیم اولسیدی  
فلسفی انی اثباته محتاج اولور واستدلال ایله او مشغول  
قالور ایدی

قسم ثانینک تقریری بو وجهله در که ( بو دلیل فاسددر  
زیرا بو دلیل فلان خصوصی مستلزم اولوب اول  
خصوص ایسه فاسددر و هر دلیل که بویله اوله فاسددر )  
دنیلور

بونک صغراسی دخی ایکی مقدمه بی متضمندر که بری  
دلیلک اول خصوصی استلزامی و دیگری اول خصوصک  
فسادیدر

ایشته بو ایکی مقدمه ضمیمه نک دخی بعضا اولکیسی

وبعضاً ایکنجیسی منع اولنور مکرکه خصوص فساد  
بدیهیاتدن اولور ایسه اول حالده ایکنجی مقدمه ضمیمه  
منع اولنه ماز والا مکابره اولور

مثلاً بو دلیل اجتماع نقیضینی یاخود اعظمک اصغره  
مساواتنی مستلزم اولوب بو ایسه فاسدد دنیلدکده  
ایکنجی مقدمه ضمیمه منع اولنه ماز زیرا کرک نقیضینک  
اجتماعی و کرک اعظمک اصغره مساواتی بدیهی البطلاندر  
اما بو دلیل دوری یا تسلسلی مستلزم اولوب بو ایسه  
فاسددر دنیلدکده ایکنجی مقدمه ضمیمه دخی منع اولنه  
بیاور . زیرا هر دور و تسلسلک بطلانی مسلم دکلدر .

چونکه دور ایکی شیئیک یکدیگره توقف ایتیمی دیمک  
اوله رق ایکی نوعدر . نوع اول دور تقدیمدر که مصادره  
علی المطلوب کی بر شیئیک نفسنه تقدیمی مستلزم اولمغله  
باطلدر .

نوع ثانی دور معیدر ابوت و بنوت کی که تقدم و تأخر  
اولقسزین برینک تصوری دیگرینک دخی برلکده  
تصورینی مستلزم اولور لکن برینک نفسنه تقدیمی موجب  
اولدیغنی جهتله باطل دکلدر

علل واسبابده تسلسل دخی باطلدر و بونکه واجبک  
وجودی اثبات اولنور . شویله که ممکنات اگر واجبه



منتهی اولسه یکدیگره علت اولوب مثلاً بو کون اسن روزکاره دونکی صغوق واکا اولکی کون یاغان یاغور واکا دخی دها اول ظهور ایدن دومان وهکذا حادثات متصاعدا بربرینه علت اوله رق نهایت یاوست طرفده کی الت طرفده کیلردن برینک معلولی اولور ویاخود الی غیر النهایه کیدر . حالبوکه اولکی صورته دور تقدیمی لازمکوب بو ایسه محالدر وایکنجی صورته تسلسل لازم کلوب بو دخی محالدر دیو سلسله ممکناتک واجبه منتهی اولسنه استدلال اولنور

الحاصل یکدیگره علت اولق اوزره لازم کلان دور فاسد اولدیغی کبی تسلسل دخی فاسددر فقط تسلسلک دیگر بر معناسی دخی وارددر که برحد معینده طور مامق دیمکدر مثلاً بر ایکنینک نصفی و اوچک ثلثی و دردک ربعی و کذا اونک عشری و یوزک یوزده بری اولور وهکذا الی غیر النهایه کیده بیلور یعنی برحد وقوف اولیوب انسان اعتبار ایده بیلدیکی قدر ایدر لکن معتبرک اعتباری منقطع اولیجق تسلسل دخی منقطع اولور بو معناجه تسلسل بر امر اعتباری اولمغله محال دکدر بناء علی ذلک بر دلیلی نقض ایچون ( زیرا بودلیل تسلسلی مستلزم اولوب تسلسل

ایسه فاسددر) دنیلدکده اول دلیلک تسلسلی مستلزم اولدیغنی تسلیم ایدهیم لکن تسلسلک فاسد اولدیغنی تسلیم ایتم جائزکه امور اعتباریه ده تسلسل اوله دیو ایکنجی مقدمه ضمیمه منع اولنه بیلور

والحاصل شاهدک ایکی قسمده دخی صغراسی منع اولنه بیلور وناقض دخی مقدمه ممنوعه سنی اثباته مجبور اولور . اما شاهدک کبراسی قسم اولنده منع اولنه مدیغی کبی قسم ثانیده دخی منع اولنه ماز . زیرا فاسدی مستلزم اولان دلیلک فاسد اولدیغنی جای اعتراض اوله ماز

شو قدر وارکه قسم ثانی دیگر بر وجهله دخی تقریر اولنه بیلور یعنی صغری مقدمه واحده اوله رق النور وایکنجی مقدمه ضمیمه کبراده قالور . شویله که (بودلیل فاسددر زیرا بودلیل دوری مستلزمدر وهر دلیل که بویله اوله فاسددر) دینلور . بو تقدیرده کبری دخی منع اولنه بیلور . مکرکه خصوص فساد بروجه بالا اجتماع نقیضین کبی بدیهیاتدن اوله

سائل بروجه بالا معللک دلیلی شاهد ایله ابطال ایتدکده مقدمه ده بیان اولندیغنی اوزره نصل که کندیسسی معلل اوله رق استدلال یوکی آنک اوزرنده قالور ایسه معلل



دخی سائل اوله رق وظائف ثلثه اکا منتقل اولور .  
 و برمنوال مشروح شاهدک مقدمه لرندن برینی منع ایدر  
 شاهی نقض ویا اکا معارضه دخی ایده بیلور . و بو  
 اوچ وظیفه دن برینی اجرا ایتیموده مدعاسنی اثبات  
 ایچون بشقه بر دلیل کتوردیکی تقدیرده نظر اولور .  
 اگر اولکی دلیلی اتمام ایده مدیکندن ناشی بشقه دلیله  
 انتقال ایتش ایسه باب اولده بیان اولندیغی اوزره بر  
 بحثدن بحث اخره یکمیش و بحث اول منقطع اولمش عد  
 و اعتبار اولور . و بوا یسه فن مناظره اصطلاحجه بر  
 نوع افحام صاییلور . و اگر اولکی دلیلک اتمامندن عاجز  
 دکل ایکن دهها واضح بر دلیل ایله خصمنی الزام ایدیو .  
 یرمک مقصدینه مبنی بشقه دلیله انتقال ایتش ایسه عجز  
 و افحام عد اولنه ماز . بلکه دلیل اوله دهها واضح بر  
 دلیل ضم و علاوه ایله خصمنی بر صورت قویه ده مبهور  
 ایش اولور .

ابراهیم علیه السلام حضرتلرینک نمرود ایله مباحثه  
 مشهوره سی ایشته بوقیلدندر . شویله که الله تعالی  
 حضرتلرینک ربوبیتنی اثبات ایچون ابراهیم علیه السلام  
 جناب حق احیا و اماته ایدر دیدی نمرود بنده احیا

و اماته ایدرم دیو قتله مستحق اولان محبوسیندن برینی  
 اطلاق و دیگر برینی اعدام ایله زعمجه حضرت ابراهیمک  
 دلیلی نقض ایتدی .

بونک اوزینه ابراهیم علیه السلام الله تعالی حضرتلری  
 کونشی مشرقدن کتیره یور سنده مغربدن کتور دیچک  
 نمرود مبهورت اولدی . حضرت ابراهیمک احیادن مرادی  
 جانسز جسمله جان و یرمک دیمک اولوب بوا یسه الله  
 تعالی حضرتلرینه مخصوص بر فعل اولدیغی جای اشتباه  
 و تردد دکلدر بوراسی نمرودک مجلسنده کی حواصک  
 دخی معلوم و مسلمی ایدی . نمرود ایسه انی بشقه معنایه  
 صرف ایله مغالطه یولنده بنده احیا ایدرم و اماته ایدرم  
 اوله ایسه بنده ربوبیتی تسلیم ایتلیسین دیو مجلسده کی  
 حقایق تردده دوشوره بیله جک صورته اعتراض ایتدکه  
 ابراهیم علیه السلام تحریر مراد ایله دلیلی اتمام ایده بیلور  
 ایکن سوزی اوزا تمیوب همان مثال اخره انتقال ایله  
 بروجه مشروح حقایق دخی ترددینه محل قالمیه جق  
 وجهله نمرودی الزام ایدیوردی .



## باب ثالث

معارضه بیانده در

معارضه اوج قسمدر معارضه بالقلب معارضه بالغير معارضه بالمثل در .

چونكه معارضك دليلی دليل معمالك صورة و مادة عینی اولورسه معارضه بالقلب و غیرى اولورسه معارضه بالغير و يالكز صورة عینی اولورسه معارضه بالمثل تسمیه اولنور . صورة غیرى اولوبده ماده عینی اولدیغی تقدیرده دخی معارضه بالغير قبیلندن اولور .

صورة عینی اولمقدن مرادیمز اقترانیاتده شکلمرى براولمق واستثنایاتده ایکیسی دخی مستقیم یا غیر مستقیم اولمق دیمکدر .

ماده عینیت دخی قیاس اقترانیلرده حد اوسطلرك و قیاس استثناییلرده جزء مکررلرك اتحادندن عبارتدر مثلاً فلاسفه (عالم مؤثردن مستغنیدر و هرشی که مؤثردن مستغنی اوله قدیمدر اوله ایسه عالم قدیمدر) دیوبده متکلمین طرفندن بوکا معارضه اولمق اوزره (عالم متغیردر و هیچ برمتغیر قدیم دکدر اوله ایسه عالم قدیم دکدر) دنیلدکه

دلیللرك ایکیسی دخی شکل اولدن اولوب انجق حد اوسطلرى متغیر بولندیغندن يالكز صورة متحد اولدقلىنه مبنی معارضه بالمثل اولور . و فلاسفه نك ینه بودلیلنه معارضه اولمق اوزره متکلمین طرفندن (عالم متغیردر و هیچ بر قدیم متغیر دکدر اوله ایسه عالم قدیم دکدر) دنیلدکه فلاسفه نك دليلی شکل اولدن اولدیغی حالده معارضه دليلی شکل ثانیدن اولمغله معارضه بالغير اولور .

رؤیت بارى بحشی دخی معارضه بالقلب مثال اولور . چونكه اهل سنته کوره روز جزاده مؤمنلر جناب بارى بی مشاهده ایدرلر معتزله طائفه سی ایسه رؤیت بارى ممکن دکدر دیرلر و قرآن کریمده (لاتدرکه الابصار وهو يدرك الابصار) یعنی کوزلر انی ادراك ایتز او ایسه کوزلری ادراك ایلر دیو بیورلمشدرکه کوزلر انی کورمز او ایسه کوزلری کورر دیمک اولدیغنه بناء معتزله بونکله رؤیت بارینك ممکن اولدیغنه استدلال ایتدکلری کبی اهل سنت دخی ینه بوایت کریمه ایله رؤیت بارینك ممکن اولدیغنی اثبات ایدرلر بناء علیه طرفیندن سوق اولسان دلیللرك حد اوسطلرى براولمغله دلیللرماده متحد اولورلر و ایکیسی بر شکلدن اوله رق ترتیب اولندقلری حالده صورة دخی متحد اوله جقلمندن معارضه بالقلب اولور



شویله که معتزله (رؤیت باری ممکن دکلدر زیرا رؤیت باری قرآن کریمده نفی اولنمشدر وهرشی که قرآن کریمده نفی اولنمش اوله ممکن دکلدر) دیو استدلال ایتدکده اهل سنت طرفندن دخی (بو دلیل هر نقدر سزک مدعا کزه دلالت ایدرسه ده بزم عندمزده دخی اتی نفی ایدر برشی واردر که اوده بو دلیلدر شویله که رؤیت باری ممکندر زیرا رؤیت باری قرآن کریمده نفی اولنمشدر وهرشی که قرآن کریمده نفی اولنمش اوله ممکندر) دنیلور ایسه دلیللرک ایکیسی دخی شکل اولدن اولغله معارضه بالقلب اولور و معارضه دلیلنک کبراسی بو وجهله اثبات اولنور که (قرآن کریمده نفی اولنان شی ممکن اولسه نفی فائده سز اولور علی الخصوص مقام تمدحده ممکن اولمیان شیئی نفی ایتدکده بر فائده اولماز حالبو که تالی باطلدر) دنیلدکده (اوله ایسه قرآن کریمده نفی اولنان شی ممکندر) دیو نتیجه ویرر

واکر معارضه دلیللی شکل ثانیدن اوله رق (رؤیت باری قرآن کریمده نفی اولنمشدر و هیچ بر ممکن قرآن کریمده نفی اولنمش دکلدر اوله ایسه رؤیت باری ممکن دکلدر) دیو تقریر اولنور سه دلیللر صورته متغایر اولدقلرندن معارضه بالغیر قیلندن اولور

کذلک معارضه دلیللی قیاس استثنائی غیر مستقیم اوله رق (رؤیت باری ممکن اولسه قرآن کریمده نفی اولنماز ایدی حالبو که قرآن کریمده نفی اولنمشدر اوله ایسه رؤیت باری ممکندر) دیو تقریر اولندیغی تقدیر جه دخی دلیللر صورته متغایر اولغله معارضه بالغیر قیلندن اولمق لازم کلور

مغالطات عامه الورود یعنی اول مغالطه لر که انلر ایله هر شیئک اوزرینه حتی یکدیگرک نقیضی اولان ایکی قضیه اوزرینه بیه استدلال اولنه بیلور . ایشته بو مغالطه لر دخی معارضه بالقلب قیلندن اولور

مثلا وجود و عدمی انسانک جاد اولسنی استلزام ایدن شی ایکیدن خالی اولمیبو بهمه حال یا موجود و یا معدوم اولمق لازم کله جکندن بونکله انسانک جاد اولدیغنه استدلال اولنور . شویله که (وجود و عدمی انسانک جاد اولسنی استلزام ایدن شیئک بهمه حال یا وجودی و یا عدمی ثابت اولیجق انسانک جاد اولسی لازم کلور مقدم ایسه حقدر یعنی وجود و عدمی انسانک جاد اولسنی استلزام ایدن شیئک بهمه حال یا وجودی و یا عدمی ثابتدر) دنیلور و (اوله ایسه انسان جاددر) دیو نتیجه ویرر بو دلیل ایسه بر مغالطه اولوب انکله مدعاک نقیضی



اولان ( انسان جاد دکلدر ) قضیه سی اوزرینه دخی  
استدلال اولنه بیلور

شویله که ( وجود و عدمی انسانک جاد اولمامسی  
استلزام ایدن شیئک یا وجودی و یا عدمی ثابت اولیحق  
انسانک جاد اولمامسی لازم کلور مقدم ایسه حقد  
اوله ایسه تالی دخی انک کبدر یعنی انسان جاد دکلدر )  
دنیلور . و دلیللرک ایکسی دخی قیاس استثنائی مستقیم  
وجزء مکررلری متحد اولدیغندن معارضه بالقلب اولور  
بو مغالطه نك حلی شو وجهله در که اول شیئک معدوم  
اولدیغنی اختیار ایله شرطیه نك ملازمه سنی منع ایلر  
شویله که مغالطک زعم ایتدیکی کبی مطلوبی استلزام  
ایتمک صفتیه مقید اولان شیئک کندی معدوم اولوبده  
بو استلزام صفتی باقی قالسه واقعا ملازمه تمام اولوردی  
بو ایسه ممنوعدر جائز که اول شی ایله برابر صفتی اولان  
استلزام دخی منتفی اوله یاخود کندو باقی اولوبده بو  
صفتی منتفی اوله . چونکه بر مقیدک انتفاسی هم کندو -  
سنک و همده قیدینک انتفاسیه اوله بیلدیکی کبی یالکز  
قیدینک انتفاسیه دخی اوله بیلور . مثلا بر او طه ده سیاه  
جبه یوقدر دنیلدکه اول او طه ده هیچ جبه بولنماق  
محتمل اولدیغنی کبی سیاه رنگلی جبه بولنمیوبده بشقهرنگلی

جبه بولنق احتمالی دخی واردر . حالبوکه بو ایکی  
صورته دخی شرطیه نك ملازمه سی تمام اولماز  
معارضه معلک دعواسنی ابطال ایله دلیلنه مقابله دن  
عبارتدر . انجق معارضه بالقلبده نقض معناسی واردر .  
زیرا بر دلیل صحیح نقیضین اوزرینه قائم اولماز . بو  
جهتله معارضه بالقلب دلیلی نقض یولنده دخی تقریر  
اولنه بیلور .

شویله که بروجه بالا بو دلیل سنک مدعا که دلالت ایلر  
ایسه ده بنم عندمده دخی انی نفی ایدر شی واردر اوده  
بعینه بو دلیلدر یولنده تقریر اولنورسه معارضه بالقلب  
اولور . واکر بو دلیل صحیح دکلدر زیرا بو دلیل  
مدعانک نقیضنده دخی جاری اولوب حکم مدعا ایسه  
متخلفدر دیو تقریر اولنور ایسه نقض قبیلندن  
اولور

مقدمده بیان اولندیغنی اوزره ناقض کبی معارض دخی  
مستدل اولور . و بو حالده معلل دخی سائل و منع و نقض  
و معارضه وظیفه لری اکا منتقل اولور بو جهتله معارضه  
دلیلنک بر مقدمه سنی منع یاخود اول دلیلی بر شاهدایله  
نقض ایده بیلور . اما معارضه یه معارضه مفید اولماز .  
زیرا معارضک دلیلی معلک اولکی دلیلنه معارض اولد



یعنی کی کتوزه جکی ایکنجی دلیلہ دخی معارض اولور  
 بو جهته معالک دعواسی ثابت اولماز . بناء علیه معارضه  
 دلیلنه یا منع ایله یا نقض ایله تعرض ایتک لازم کلور .  
 مکر که معالک ایکنجی دلیل معارضک عندنده مسلم یا خود  
 منع ضمنی بی مشتمل اوله رق معارضه دلیلنک وجه اختلافی  
 اندن مستفاد اوله اول حالده معارضه یه معارضه مفید  
 اوله بیلور

### ✽ تمرین ✽

اهل سنت عندنده صفات ازلیه الهیه دن بریده کلامدر .  
 معتزله ایسه بونی انکار ایله کلام الله مخلوقدر دیرلر  
 حالبو که قرآن کریمده ( و کلم الله موسی تکلیما ) یعنی الله  
 تعالی حضرتلری موسی علیه السلامه حقیقه سویلدی  
 دیو بیورلمشدر .

ایشته اهل سنت بو آیت کریمه ایله استدلال ایدوب  
 دیرلر که ( کلام یعنی سونلک قرآن کریمده جناب حق  
 مسنددر و هر شی که قرآن کریمده اکا مسند اوله صفت  
 ازلیه در اوله ایسه کلام دخی صفت ازلیه در یعنی  
 جناب حق انکله حقیقه متصفدر )

معتزله طرفندن بو دلیلہ طرق ثلثه ایله اعتراض ایدیلور  
 و هر برینه اهل سنت طرفندن برر و جهله جواب ویریلور

شویله که اولا معتزله طرفندن اول ایت کریمده کلامک  
 جناب حق مسند اولدیغی مسلم دکادر جائز که کلام  
 بوراده مجازا سوزی خلق ایتک معناسنه اوله دیو دلیلک  
 صغراسی منع اولنور . اهل سنت طرفندن دخی کلام  
 اکر جناب حق مسند اولسه اصل اولان معنای حقیقیدن  
 بلا قرینه مانعه عدول اولنمق لازم کلور بو ایسه جائز  
 دکادر اوله ایسه کلامک حقیقه جناب حق مسند اولدیغی  
 ثابت اولور دیو مقدمه ممنوعه اثبات قلنور

ثانیا معتزله طرفندن قرآن کریمده خلق دخی جناب حق  
 اسناد اولنمغله بو دلیل انده ده جاری اولوب خلق ایسه  
 بر امر اضافی اوله رق صفت ازلیه اولمیدیغندن حکم مدعا  
 متخلفدر دیو دلیل مذکور نقض اولنور

واهل سنت طرفندن جائز که خلق یعنی تکوین دخی  
 حیات علم قدرت اراده سمع بصر کلام کی بر صفت  
 ازلیه اولوبده تعلقاتی حادث و امر اضافی اوله دیو حکم  
 مدعائک تخلفی منع ایدیلور

ثالثا معتزله طرفندن کلام حروف حادثه دن مرکبدر و هر  
 شی که بونلردن مرکب اوله حادثدر و هیچ بر حادث صفت  
 ازلیه دکادر اوله ایسه کلام دخی صفت ازلیه دکادر  
 دیو معارضه ایدیلور . و اهل سنت طرفندن بو وجهله



جواب ویریلور که حروفدن مرکب اولان انجق کلام  
لفظی اولوب بونک حادث اولدیغنده دخی منازعه یوقدر  
فقط بزم مرادمن کلام نفسی الهی اولوب بوایسسه  
حرفلردن مرکب دکلدر بناء علی ذلک کلامدن مراد  
اگر کلام نفسی ایسه معارضه دلیلنک صغراسی ممنوعدر  
واگر کلام لفظی ایسه معارضه دلیلنک تقریبی ممنوعدر  
دنیلور

✽ فذلکه ✽

بر قضیه بی منع ایتک اول قضیه نک بطلانی افاده ایتز فقط  
خفاسنی افاده ایدر . مقدمه سی خفی اولان دلیل ایسه  
معلوم الثبوت دکل دیمکدر . ثبوتی معلوم اولمیان شی  
ایله دخی بشقه شی ثابت اولماز بر شیئی نقض انی ابطال  
دیمکدر . او یله ایسه بر دلیلی نقض دخی اول دلیلک  
بطلانی افاده ایدر . لکن دلیلک بطلانندن دعوانک  
بطلانی لازم کلمز زیرا دلیل دعوانک ملزومیدر لازمک  
ملزومدن اعم اولمسی ایسه جائزدر بوجهتله ملزومک  
انتقاسی لازمک انتقاسنی مستلزم اولماز . نهایت اول دعوا  
بودلیل ایله ثابت اولماز اما دیگر دلیلی اوله ییلور  
بناء علی ذلک منع و نقضک متعلقلرنده اثرلری متفاوت  
ایسه ده دعواده اثرلری متحددر

معارضه نک حکمی مساقطه در یعنی دلیللر متعارض  
ومتساقط اولور و دعوی بلا دلیل قالور . الحاصل معملک  
دعواسی ثابت اولماش اولور  
شو حاله نظراً وظائف ثلثه نک هپ مرجعی بر اولور که  
معملک دعواسی ثابت دکل دیمکدر

دعوا یه تعرض دلیلنک تعرضدن اقوی اولدیغنه بناء  
اعتراضاتک اشدی معارضه و بعده نقضدر . ومنع اگرچه  
اعتراضاتک اضعفیدر لکن اسلیدر و اظهار صوابده  
سائرندن زیاده دخلی وارددر زیرا انده معمل مقدمه  
ممنوعه بی اثباته مجبور اولور ولدی الاثبات دعواسنک  
حق اولدیغی ظاهر اولور . اما نقض و معارضه ده معمل  
سائل اولمغله وظائف ثلثه دن دیلدیکنی اختیار ایده ییلور  
حالبو که منع یا معارضه یولنه کیدر ایسه کندو دعواسنک  
حق اولدیغی حقیقه ظاهر اولماز و دعواسنی شبهه دن  
قور تارمق ایچون خصمنک دلیلنی نقض ایتسی لازمکلور

✽ فائده ✽

قیاس کړک مفرد اولسون و کړک مرکب اولسون بعضا  
لاجل الاختصار بعض مقدماتی طی اولنور و قیاسک  
مذکور اولان مقدمه سی مطلوبک موضوعنی مشتمل ایسه



صغری اولوب کیراسی مطویدر . و اگر مطلوبک  
محمولنی مشتمل ایسه کیری اولوب صغراسی مطویدر .  
و مطلوبک هیچ برطرفنی مشتمل دکل ایسه نظر اولنور  
اگر بسیط اوله رق مطلوبی منتج او اورسه قیاس مفرد  
استثنائیدر . و الا قیاس مرکبدر .

مثلا ( کوندوز موجوددر زیرا کونش طوغمشدر )  
دنیلدکده کونش طوغمشدر مقدمه سی مطلوبک هیچ برطرفنی  
مشتمل دکلدر فقط بسیط اوله رق مطلوبی منتج اولمغله  
قیاس استثنائی اولور .

شویله که ( زیرا هر نه زمان کونش طوغمش اولورسه  
کوندوز موجوددر حالبو که کونش طوغمشدر او یله ایسه  
کوندوز موجوددر ) دیو تقریر اولنور .

و ( عالمک بر مؤثری وارددر زیرا هر متغیر حادثدر )  
دنیلدکده مذکور اولان ( هر متغیر حادثدر ) مقدمه سی  
مطلوبک برطرفنی مشتمل دکلدر و بسیط اوله رق مطلوبی  
منتج اولماز بناء علیه قیاس مرکبدر . شویله که ( عالم  
متغیردر و هر متغیر حادثدر و هر حادثک بر مؤثری وارددر  
او یله ایسه عالمک بر مؤثری وارددر ) دیو تقریر اولنور .

—————o—————

## باب رابع

( تصورات حقنده اولوب ایکی فصلی مشتمل )

### فصل اول

( تعریف بیاندهدر )

تعریف برشیئی ذهنده تصویردن عبارت اولمغله ا کا منع  
و معارضه تعلق ایتمز . فقط شرطلرینی مستجمع دکلدر  
یا خود فسادی مستلزمدر دیو نقض اولنه بیلور

بوجهته تعریفه اعتراض ایدن مستدل و ا کا جواب و یرن  
مانع اولور

نته کیم بو تعریف افرادینی جامع یا اغیارینی مانع دکلدر  
یا خود دوری یا تسلسلی مستلزمدر دیو نقض اولنور  
صاحب تعریف طرفندن دخی منع ایله مقابله ایدیلور

شویله که ( بو تعریف صحیح دکلدر زیرا افرادینی جامع  
دکلدر و هر تعریف که افرادینی جامع اولیه صحیح دکلدر  
او یله ایسه بو تعریف صحیح دکلدر ) دنیلور . و تعریفلرده  
ماده نقض متحقق یعنی نفس الامرده محقق اولمق لازم  
کلدیکنندن صغرائک اثباتی لازمکاور . بناء علیه ( زیرا  
بو تعریف فلان شیئه شامل اولیوب معرف ایسه ا کا



صادق و هر تعریف که حال و شانی بویله اوله افرادینی جامع دکدر اوله ایسه بو تعریف دخی افرادینی جامع دکدر) دیو صغری اثبات اولنور. فقط بودلیلک صغراسی ایکی مقدمه بی متضمندر که بری تعریفک اول شیئه شامل اولماسی و دیگری معرفت اکا صادق اولمسیدر صاحب تعریف ایشته بو ایکی مقدمه ضمیمه دن برینی منع ایده بیلور شویله که تعریفک فلان کلمه سندن مراد بودر بناء علیه تعریفک اول شیئه شامل اولدیغی مسلم دکدر یاخود معرفدن مراد بودر بوجهته اول شیئه صادق اولدیغی منوعدر دیه بیلور و کذا (بو تعریف فلان شیئه شامل اولوب معرفت ایسه اکا صادق دکدر و هر تعریف که بویله اوله اغیارینی مانع دکدر و هر تعریف که اغیارینی مانع اولیه صحیح دکدر اوله ایسه بو تعریف صحیح دکدر) دنیلور. و بوجه بالا صغرانک ایکی مقدمه ضمیمه سندن بری منع اولندقدن تعریفدن یاخود معرفدن مراد شودر دیو تحریر مراد ایله جواب ویریلور کذلک (بو تعریف دوری یا تسلسلی مستلزمدر و هر تعریف که حالی بویله اوله صحیح دکدر اوله ایسه بو تعریف صحیح دکدر) دنیلور. صاحب تعریف طرفندن دخی دوری یا تسلسلی مستلزم اولدیغی مسلم دکدر دیو صغری منع اولنه بیلور.

یاخود جائز که دور معی یاخود امور اعتباریه ده تسلسل اوله دور معی و تسلسل اعتباری ایسه محال در کدر دیو کبری دخی منع اولنه بیلور

## فصل ثانی

(تقسیم بیاننده در)

تقسیم بر نوع تعریفدر. بناء علیه تقسیملره دخی منع و معارضه تعلق ایتمز. فقط شرائطنی مستجمع دکدر دیو نقض اولنه بیلور. بوجهته تقسیمه اعتراض ایدن مستدل واکا جواب ویرن مانع اولور. تقسیم ایکی نوعدر. نوع اول کلک اجزاسنه تحلیل و تقسیمیدر

نته کیم او طه درت دیوار و برسققدر. و هر جسم تراب و ما و هوا و ناردن مرکبدر. و لیوناطه براز لیون صوی و بر مقدار شکر ایله عادی صودن عبارتدر دنیلدیکی کبی تقسیمک بونوعنده مقسم اولان کل مجموع اجزادن عبارت اولمسيله هر قسمک مقسمه مباین اولسی امر ضروریدر نوع ثانی کلینک جزئیاته تقسیمیدر. نته کیم حیوان یا حیوان



ناطقدر و یا حیوان غیر ناطق در و عنصر یا تراب یا صو و یا  
هوا و یا نار در دنیلدیکی کبی

تقسیمک بو نو عنده مقسمک هر قسمنه نسبتله بحسب الحمل  
مطلقا اعم اولسی شرطدر . اقسامدن بریسی مقسمک عینی  
یا خود مباینی اولسه تقسیم باطل اولور .

نته کیم انسان یا بشر در و یا فرسدر . یا خود انسان یا بشر در  
و یا زنجیدر . و یا خود انسان یا رومیدر و یا فرسدر . دنیله  
اوج صورتده دخی تقسیم باطل اولور

و برده تقسیمک اقسامنی حاصر اولسی شرطدر  
یعنی مقسمک کافه مشتملاتی اقسامنده مندرج اوله رق خار .  
جده هیچ بر قسم قالماید و الا تقسیم نقض اولور

شویله که ( بو تقسیمک اقسامنده فلان شی داخل اولمیوب  
مقسم ایسه اکا شاملدر و هر تقسیم که بویله اوله  
اقسامنی حاصر دکدر و هر تقسیم که اقسامنی حاصر  
اولیه باطلدر اولیه ایسه بو تقسیم دخی باطلدر ) دنیلور .  
وقاسم طرفندن دخی اول شئیک اقسامدن خارج یا خود  
مقسمک اکا شامل اولدیغی منع ایدیله بیلور

انجق تقسیملرده ارا نیلان حصر ایکی قسمدر . یعنی عقلی  
و استقرائیدر

حصر عقلی نفی ایله اثبات بیننده متردد و مقسم عقلا  
اقسامنده منحصر اولور

ایشته بوکا تقسیم عقلی دنیلور که عقلک بر قسم دیگر  
تجویز ایتسیله منقوض اولور

حیوانک ناطق ایله غیر ناطقه تقسیمی کبی که حیوان یا ناطق در  
یا دکدر دیو نفی ایله اثبات بیننده متردد اوله رق حیوانک  
عقلا بشقه بر قسمی بولنه ماز

عددک زوج ایله فرده تقسیمی دخی بو قبیلنددر . زیرا  
زوجک معناسی فرد اولیان عدد و فردک معناسی زوج  
اولیان عدد دیمک اولدیغندن نفی ایله اثبات بیننده متردد  
و عدد عقلا بویکی قسمده منحصر اولور اما حصر استقرائیده  
عقلا انحصار ارا نمیوب مقسمک اقسامنده انحصارینه انجق  
استقرا و تبع ایله حکم اولور

ایشته بوکا تقسیم استقرائی دنیلور که بونده ماده نقض  
متحقق اولمق لازم کاور

بر وجه بالا عنصرک درده تقسیمی کبی که عقلک درتدن  
زیاده سنی تجویز ایتسیله بو تقسیم باطل اولماز .

بونی نقض ایچون بشنجی عنصری بولوب میدانه قومق  
لازم کاور



— ❧ خاتمه ❧ —

( آداب مناظره بیانده در )

مجلس مناظره ده مورث کلال و ملال اوله جق مرتبه  
اطناب مقال ایتمایدر

لکن فهم معنایه خلل ویره جک مرتبه اختصار کلامدن  
دخی اجتناب ایتمایدر

هله تفهم معناده ترددی جالب اولان لفظ مجمل و تعسر  
فهمی موجب اولان الفاظ غریبه استعمالندن احتراز ایتمک  
لازمدر

مناظر خصمنک مرامنی اکلامدیغی حالده کلامنی  
تکرار ایتدیره بیلور . اما مرامنی اکلامدین کلامنه دخل  
ایتمک جائز دکادر

مقصوده یعنی اظهار صوابده مدخلی اولمیان شیره تعرض  
ایله صدوددن چیقمامایدر . و الا سوز طاغیلوب سمت  
مقصوددن تباعد ایدلمش اولور

اشای مناظره ده کولمک و چرینق وحدت ایله رفع صوت  
ایتمک کبی حالر مناظرینه یا قشماز

بو مثللو معاملات نایجا ایله انجق جاهلر کندی جهلرینی  
ستر ایتمک ایسترلر . حالبوکه بو وجهله جهلرینی میدانه  
قومش اولورلر

میدان مباحثه ده کشی خصمنی حقیر کور ماملیدر . و الا  
قیدسزلق ایله کندوسندن ضعیف سوزلر صدور ایدوبده  
خصم ضعیفک مغلوبی اولمسنه سبب اوله بیلور الحاصل  
سوزی دقت و بصیرت ایله سویملی و خصمنک سوزینی  
کمال تأنی ایله دکلملی و مرامنی لایقیله اکلاملی و بعده مقابله یه  
قیام ایتلیدر

خصمنک سوزینی یاری یرده کسمک خلاف ادبدر .

هله ایکی کشی مناظره ایدرکن بر او چنجی شخص انلرک  
سوزینی کسوبده بخشه کیرشمک پک نایجا و پک یا قشقسز  
بر معامله در . فقط انسان بحسب الفطره عجول و حریص  
اولدیغندن چوق دفعه حرصنی یکه میوب من غیر رویه  
بو مثللو خطا کرده بولنور

بناء علی ذلک مناظره یه مأمور اولان مجلسلرک ریاستی  
مهام اموردندر . رئیسلرک حسن اداره یه موفق اوله ما-  
ملرندن طولایی بو مجلسلر عجیب و غریب قارغشه لقلره  
اوغرایوبده مذاکرات و مباحثاتدن بر نتیجه حاصل



ایندیله مدیکی هزار بار مشاهده اولمشدر هر مجلسده مذاکره نك  
 انضباط و انتظام تحتنده جریانى ايسه فرائض امور دندر  
 بوسوزلرمز هب اهل و ارباب مناظره يه كوره در  
 آداب و قوانین مناظره بیلینلر ایله مباحثه بیهوده یورغونلقدرد  
 اهل و ارباب یله مناظره اولنملى . اصحاب جدل ایله حسن  
 جدال اوزره بولنملى . خصمك مغالطه سندن بغایت  
 صاقملیدر .

والله الموفق للصواب  
 وهو الملهم للسداد





